

YOHAN é Gabú Danglù Laiká (The Gospel of John)

Haù Mungdang, Xângzo Byù Gùng Lé Dut É Hkyô

¹ A-nham sâng-hi má, Mungdang joq ri; Mungdang haù gi, Garai Gasang eq rahá nghut luì, haù Mungdang yhang Garai Gasang nghut ri. ² Yhang gi, a-nham sâng-hi má, Garai Gasang eq rahá nghut nyi ri.

³ Nyi mi-nyì, joq mijoq gi, Yhang dông mai hpan tô é chyat nghut lhê; Yhang dông mai a hpan é gi, haì lháng a joq nghut ri. ⁴ Asak chyungxe gi, Yhang má nghut lhê mù, asak haù gi, byu pê é matú maubó nghut ri. ⁵ Haù maubó gi, mauchut má duqbó byì nyì kôlhang, mauchut gi, haù lé a hap yù nghut ri. ⁶ Garai Gasang mai nhang kat é, Yohan gâ é byù rayuq jé lé ri.

⁷ Yhang gi, maubó haù eq sêng é hkyô lé, saksé hkám byì luì, yhang é yanmai byù lhunglhang bang wó lumjìng kó sháng gaq ga, saksé rayuq dông jé lé é sù nghut ri. ⁸ Yhang gi, haù maubó a nghut; maubó haù lé saksé hkám byì râ matú za sheq jé lé é ru nghut lhê. ⁹ Byù yuq jup lé duqbó byì é, maubó akying haù gi, mingkan htoq má jé nyi to bê.

¹⁰ Yhang gi, mingkan htoq má nyi to bê nghut ri; mingkan lé gi, Yhang dông mai hpan tô é nghut kôlhang, mingkan haù gi, Yhang lé a wú sé nghut ri.

¹¹ Yhang gi, yhumsîng mau má jé lé kôlhang, Yhang é amyû pé gi, Yhang lé a lhom hap yù kó nghut ri.

¹² Nghut kôlhang, Yhang gi, Yhang lé lhom hap yù luî, Yhâng é myìng lé lumjìng é bang lunglhang lé, Garai Gasâng é yhangzô pé dut rá ahkáng byì bê nghut ri. ¹³ Haù bang gi, sui sho đông hku kat é le a nghut, byù ô nau é đông hku kat é le a nghut, gungsho ô nau é đông hku kat é le a nghut e za, Garai Gasang chyáng mai hku kat é bang ru nghut lhê.

¹⁴ Haù Mungdang gi, xângzo byù gùng lé dut luî, ngamoq chyáng nyi wú bê nghut lhê. Ngamoq gi, haù jeju eq tengmán hkyô byíng tô é, Yhang é hpungwup shing kang lé myang wú bê nghut lhê; haù gi, haù Íwâ é zote rayuq đông, Yhang wó yu é hpungwup shing kang nghut ri.

¹⁵ Wui-myhup Sará Yohan gi, Yhang eq sêng é hkyô lé saksé hkâm é hkûn, garû taì é gi, "'Ngá é htâng má jé lé é Sû gi, ngá é hí mai nyi to bê sù nghut é yanmai, ngá htoq je gyaú sù nghut ri.' nghû, ngò taì é sù gi, shí yuq nghut bê." gâ ri. ¹⁶ Yhâng é gumjup é jeju ahkaù mai, nganhúng banshoq bang gi, shimân jeju lé ralhûm htoq ralhûm myang yu nyì bê nghut lhê. ¹⁷ Hkâsu mù gâ lé, haù jep é tarâ gi, Mosheq é loq đông mai byì é nghut lhê; jeju eq tengmán hkyô kúm gi, Yesuq Hkrisduq é yanmai lé joq é nghut lhê. ¹⁸ Garai Gasang lé, ó yuq èq le a myang wú wú é nghut lhê; nghut kôlhang, haù Íwâ é tanghkoí má lúng tô é, Yhang Zo zote gi, Garai Gasâng é gùng lé lhoq htoq shit bê nghut ri.

*Wui-myhup Sará Yohan Hko Kyô É Hkyô
Mht 3:1-12; Mrk 1:1-8; Luk 3:15-17*

19 Yerusalem wà mó mâ é Yudaq byu pé gi, hkyangjông pé eq Lewiq byu pé lé, Yohan ó yuq nghut é hkyô myí nhang kat kô é hkûn, Yohan saksé hkâm é gi, a-ô mâ é hkyô pé nghut ri.

20 Yhang gi, a hê a zaú tô e za, "Ngò gi, Hkrisduq* a nghut." ga lhom taí kyô ri.

21 Haú hkûn, yhangmoq gi, "Haú nghut jáng, nàng gi, ó yuq nghut lhê lhú? Nàng gi, Eliyaq lhú?" ga myi kôjáng, yhang gi, "A nghut." ga taí ri; "Nàng gi, haú Myiqhtoi nghut lhê lhú?" ga dum myi kôjáng, yhang gi, "A nghut." ga tû taí ri.

22 Haú mù, yhangmoq gi, "Ngamoq lé nhang kat bâng chyáng ló wó taí kyo rá matú, nàng gi, ó yuq nghut lhê lhú? Náng gûng lé nàng hkâsu nghú lhê lhú? Taí kyô wú laq." ga dum myi akô.

23 Haú hkûn, Yohan gi, myiqhtoi Esai-aq é dang eq rajung za, "Ngò gi, haú yoso má, 'Yhumsing é matú hkyô lhoq nyhang to keq.' gâ é htê lé, garû taí é sù nghut lhê." ✧ ga tû taí ri.

24 Hparishe pé mai nhang kat é bang ra-am gi, yhang lé, 25 "Nàng gi, haú Hkrisduq le a nghut, Eliyaq le a nghut, Myiqhtoi le a nghut é nhîng, haí mù luí, wui-myhup hkám byi nyi lhê lhú?" ga dangmyi myí akô.

26 Haú hkûn, Yohan tû taí é gi, "Ngò gi, wui eq za wui-myhup hkám byi lhê; nghut kôlhang, nungmoq a sê é sù rayuq nungmoq chyáng yap tô ri. 27 Yhang gi, ngá htâng má lé é sù yuq nghut

* 1:20 Grik dong Hkrisduq gâ é gi, xû but hui Sû gâ é lichyúm nghut mù, Hebre dong "Mesaia" gâ é eq rajung za nghut lhê. ✧ 1:23 Esai 40:3

bê; ngò gi, Yhâng é hkyî-tsung tui lé hpyî râ lhang a gingdán é nghut ri." gâ ri.

²⁸ Shí pé banshoq gi, Yohan wui-myhup hkám byî nyi é, Yodan làng hé hpoq mâ é Behtani wà má dut é hkyô pé chyat nghut ri.

Yesuq Gi, Garai Gasâng É Sauzo Nghut É Hkyô

²⁹ Hau htang nyí, Yohan gi, yhâng chyáng Yesuq lé lo nyi é lé myàng luí, taí é gi, "Mingkan byu pé é yubak mara lé yu pyám byî é Garai Gasâng é Sauzo lé, wú keq! ³⁰ Shí yuq gi, 'Ngá é htâng má jé lé é Sû gi, ngá é hí má nyi bê sù nghut é yanmai, ngá htoq je gyaú Sù nghut ri.' nghû, ngò taí é sù yhang nghut bê. ³¹ Ngò gi, Yhang ó yuq nghut é lé a sê é nghut lhê, nghut kôlhang, Yhang lé, Israelaq byu pé wó sé kó sháng gaq nghû, ngò lé jé mù, wui èq wui-myhup hkám byî nyi é nghut lhê." gâ ri.

³² Hau htâng, Yohan saksé hkâm é gi, "Haú Woi-nyí gi, mauhkûng mai hpûngkyui gunghkyâng sù é dông mai gyó lé mù, Yhâng chyáng lé nô tô é lé, ngò myàng ri. ³³ Ngò gi, Yhang ó yuq nghut é lé a sê é nghut kôlhang, wui èq wui-myhup hkám byi râ matú, ngo lé nhang kat é Sù, ngo lé taí kyô é gi, 'Haú Woi-nyí gyó lé lô mù, ó yuq chyáng lé nô tô é lé, nàng myàng jáng, haú yuq gi, haú Chyoiyúng Woi-nyí má wui-myhup hkám byi râ sù nghut lhê.' gâ ri. ³⁴ Haú eq rajung za ngò myàng bê nghut luí, shí yuq gi, Garai Gasâng é Yhangzo nghut lhê nghû, ngò saksé hkâm lhê." gâ ri.

Sâng-hi Lhé É Chángzô Pé

³⁵ Hau htang nyí, Yohan gi, yhâng é chángzo í yuq eq rahá, haú má dum nyi tô akô. ³⁶ Haú hkûn,

yhang gi, Yesuq laí ló nyi é lé myang kat jáng, "Hê, Garai Gasâng é sauzo lé, wú keq!" ga taí kat ri.

³⁷ Chángzo haú í yuq gi, yhang haú su gâ é lé wó gyo kôjáng, Yesuq é htâng cháng bekô nghut ri.

³⁸ Yesuq gi, lhing wú kat le, yhangnhik châng tô é lé myàng luí, "Nungnhik haí o akô lhú?" ga myi jáng, yhangnhik gi, "Rabai ê, Nàng hkâmá nyi lhê lhú?" ga taú myí kat akô nghut ri. (Rabai gâ é gi, Sará gâ é lichyúm nghut lhê.)

³⁹ Haú hkûn, Yhang gi, "Lé keq, haú jáng, nungnhik myàng kó râ nghut lhê." ga tú taí ri.

(Haú-u gi, raxê hkyíng† kô nghut ri.) Haú mù luí, yhangnhik gi, châng ê mù, Yhang hkâmá nyi é lé, ê myàng kôluí, haú nyí buigyùm shoq, Yhang eq rahá ê nyi nyi akô nghut ri.

⁴⁰ Yohan taí é dang lé wó gyo luí, Yesuq htâng châng é su nhik mâ é rayuq gi, Simun Petruq é yhanggu Andre nghut ri. ⁴¹ Andre gi, yhangmang Simun lé hí myàng luí, "Nga-nhik gi, Mesaia lé myàng bê." ga yhang lé taí kyô ri. (Mesaia gâ é lichyúm gi, Hkrisduq gâ é nghut lhê.) ⁴² Hau htâng, yhang gi, yhangmang lé Yesuq chyáng shuî e ri.

Yesuq gi, Simun lé lhom myàng jáng, "Nàng gi, Yohan é yhangzo Simun nghut ri; Kehpa‡ gâ é myìng lé, nàng wó yû râ nghut lhê." ga taí ri. (Kehpa gâ é lichyúm gi, Petruq gâ é nghut lhê.)

Hpilip Eq Nahtanelaq Lé Hkyin Yu É Hkyô

† 1:39 Raxê hkyíng gi, myinhtâng myi hkyíng záng ri. ‡ 1:42 Aramaik dang dông Kehpa gâ é eq Grik dang dông "Petruq" gâ é lichyúm gi, luqgok gâ é nghut lhê.

⁴³ Hau htang nyí, Yesuq gi, Galile mau shut ê râ matú, myit hpyit yû bê nghut ri. Yhang gi, Hpilip lé myàng jáng, "Ngá htâng cháng aq." ga tái ri.

⁴⁴ Hpilip gi, Andre eq Petruq nhik nyi é Bet-saida wà mó mâ é byù nghut ri. ⁴⁵ Yhang gi, Nahtanelaq lé myàng jáng, "Mosheq mai tarâ laiká má kê tô é eq myiqhtoí pé mai le lhoq ang luí kê tô é sù, Yosep é yhangzo, Nazaret wà byù Yesuq lé, ngamoq myàng bê." ga yhang lé tái kyô ri.

⁴⁶ Haú hkûn, Nahtanelaq gi, "Nazaret wà ô! Haú mai, ge é jung haí wa wó htoq lhê lú?" ga myi jáng, Hpilip gi, "Ru lé wú aq." ga yhang lé tái ri.

⁴⁷ Yesuq gi, Yhâng chyáng Nahtanelaq lé lo nyi é lé myàng jáng, yhang lé lhoq ang luí, "Wú keq, shí yuq gi, mhaú é myit a bo é sù, Israelaq byù akying rayuq nghut ri." ga tái ri.

⁴⁸ Haú hkûn, Nahtanelaq gi, "Nàng, ngo lé hkâsu kut sê é lú?" ga myi jáng, Yesuq gi, "Nang lé, Hpilip eq a wut yù shimá, nàng, maihpáng gâm ô má ru nyi tô ashî hkûn, Ngò, nang lé myàng bê nghut lhê." ga tû tái ri.

⁴⁹ Haú mù, Nahtanelaq gi, "Rabai ê, Nàng gi, Garai Gasâng é Yhangzo nghut ri; Nàng gi, Israelaq byu pé é Hkohlâm le nghut ri." ga tái ri.

⁵⁰ Haú hkûn, Yesuq gi, "Ngò, nang lé, maihpáng gâm ô má myang é nghû tái kyô é yanmai, nàng lumjíng lhê a nghut lú? Hau htoq je kê é muzó pé lé, nàng myàng râ nghut lhê." ga tái ri. ⁵¹ Hau htâng, Yesuq xoq tái é gi, "Ngò, nungmoq lé teng za tái kôlé, mauhkûng bóng lô luí, haú Byu Yhangzô ahtoq má, Garai Gasâng é maumang lagyô pé doq lô gyó lô kut nyi kê é lé, nungmoq myàng kó râ nghut lhê." gâ ri.

2

Wuì Lé Tsibiyiq Wing Dut Nhang É Hkyô

¹ Hau htâng, í nyí nghû râ nyí má, Galile mau má é Hkanaq wà mó má, myiháng poì ralhúm joq ri. Haù má Yesuq é yhângnu le, bo lom ri. ² Yesuq eq Yhâng é chángzô pé lé le, myiháng poì haù má ji akô nghut ri. ³ Tsibiyiq wing jaú tûm to kô é hkûn, Yesuq é yhângnu gi, "Yhangmoq, tsibiyiq wing a wó lo kó nghut ri." ga, Yesuq lé taí ri.

⁴ Haù hkûn, Yesuq gi, "Ânu ê,* haù, nàng gi, Ngò eq haì sêng lhê lhú? Ngá é ahkyíng a jé shì é nghut lhê." ga tû taí ri.

⁵ Nghut kôlhang, Yhâng nu gi, haù dui-nhâng zoshâng wuì lé, "Yhang haì taí le, haì kut keq." ga taí ri.

⁶ Haù nàm má, í sum xê galan kô wang é luqgok wúng hkyuq cham joq tô ri; haù gi, Yudaq byu pé mai, lhoq san lhoq yúng hkíng é matú, chung é jung wúng nghut ri.

⁷ Yesuq gi, haù dui-nhâng zoshâng wuì lé, "Wúng haù pé má wuì lhoq pyíng keq." ga taí ri; haù mù, yhangmoq gi, wúng haù pé má byíng shoq shoq lhoq pyíng bekô nghut ri.

⁸ Hau htâng, Yhang gi, yhangmoq lé, "Ahkuì, ratsuí hkû yù mù, poì-up lé yu ló byì keq." ga taí jáng, yhangmoq gi, yu ló byì akô nghut ri.

⁹ Poì-up hpò gi, wuì mai dut é tsibiyiq wing haù lé, shuq chyam wú ri; wuì hkam é dui-nhâng zoshâng wuì gi, tsibiyiq wing haù hkâmai lo é hkyô lé sê to kôlhang, yhang gi, a sé nghut ri. Haù mù, yhang

* **2:4** Ânu ê gá é lé, Grik đông gi, "Myiwe myhí ê" ga bo tô é nghut lhê.

gi, lusik lé, ji yù luí, ¹⁰ "Yuq hkanmó gi, tsibiyiq wing mún lé hí jaú mù, bíng pé shuq gyí bùm jáng sheq, tsibiyiq wing apyâng lé ru yu htoq lhê; nghut kôlhang, nàng gi, nghâm é tsibiyiq wing lé, ahkuí jé shoq wó hkong tô ri-nhung!" ga taí ri.

¹¹ Galile mau mâ é Hkanaq wà mó má, Yesuq tân shit é limik kumlhá gi, Yhang kut é limik kumlhá pé mâ é sâng-hî dàm nghut ri. Yhang gi, Yhâng é hpungwup shingkang lé, haú dông lhoq htoq shit é nghut mù luí, Yhâng é chángzô pé gi, Yhang lé lumjín bum akô nghut ri.

*Noqkuq Yhûm Lé Lhoq Sansêng Pyâm É Hkyô
Mht 21:12-13; Mrk 11:15-17; Luk 19:45-46*

¹² Hau htâng má, Yesuq gi, Yhâng nu, Yhâng gu yuqzo pé eq Yhâng é chángzô pé le mù, Kapernaum wà má gyó ló ri; yhangmoq gi, haú má buinyì myi ngò nyí nyi akô nghut ri.

¹³ Yudaq byu pé é Lhoqlhai Poí jé râ nghut é hkûn, Yesuq gi, Yerusalem wà mó má doq ló ri.

¹⁴ Haú hkûn, noqkuq yhûm wàng má, nojûng, sau, hpûngkyui pé lé ûng nyi é bang lé le, siboí má ngùn htaí zô zung nyi é bang lé le, Yhang ló myàng ri.

¹⁵ Haú mù, Yhang gi, tui lé, nhuq râ wase saí yù mù, banshoq bang lé le, sau eq nojûng lé le, haú noqkuq yhûm wàng mai hkat htoq luí, ngùn htaí zo bâng é ngùn htingchap lé gi, tû hut pyám byi mù, yhangmoq é siboí lé gi, tu mhuc pyám byi ri; ¹⁶ haú hpûngkyui ung zô é bang lé le, "Zè shi pé lé yu htoq ló keq! Ngá Wâ é yhûm lé, hpugá jowò hkâkut kó!" ga luí nhik-yô ri.

¹⁷ Haú mù, Yhâng é chángzô pé gi, "Ngò, Náng é yhûm lé chyitdap kâng tuí é hkyô gi, Ngo lé myi su

nyhê jôm pyám râ nghut lhê."☆ ga kê tô é lé, myit bûn kat akô nghut ri.

¹⁸ Yudaq byu pé gi, Yhang lé, "Nàng, shí pé kut râ ahko ahkáng wó é hkyô lé saksé tân shit râ matú, ngamoq lé, hái jung limik kumlhá wó tân shit râ lhú?" ga chôm myi akô nghut ri.

¹⁹ Haú hkûn, Yesuq gi, "Noqkuq yhûm shî lé nungmoq hpyoq pyám keq, sum nyi gyoro má, Ngô, haú lé dum tu shap râ nghut lhê." ga, yhangmoq lé tû taí ri.

²⁰ Haú Yudaq byu pé gi, "Noqkuq yhûm shî lé, myi xe hkyuq zân tup sai é ru nghut lhê; sum nyi gyoro má za, Nàng wó tu shap râ lhú?" ga tu myi akô nghut ri. ²¹ Nghut kôlhang, Yesuq taí é noqkuq yhûm gi, Yhâng é gùng lé lhoq ang luí taí é nghut ri.

²² Haú mù, Yhang, shi é mai lhoq dui toq huí é hkûn sheq, Yhâng é chángzô pé gi, Yhang haú su ga taí é dang lé myit bun kômù, Chyúmdang lé le, Yesuq taí é dang pé lé le, lumjínq akô nghut ri.

²³ Haú Lhoqlhai Poí nghut é u lé, Yerusalem wà mó má Yesuq nyi nyi é hkûn, byù myo myo gi, Yhang kut shit é limik kumlhá pé lé myàng kômù, Yhang lé lumjínq bum akô nghut ri. ²⁴ Nghut kôlhang, Yesuq gi, byù lhunglhang bâng é myit lé sê é yanmai, yhangmoq chyáng, Yhânggùng lé a ap to nghut ri. ²⁵ Yhang gi, byu é i-myit unghkaú má hái lúng tô é lé sê é yanmai, byù yhangchang saksé hkám byi é a ra nghut ri.

3

Nikodimu Lé, Yesuq Mhoqshit É Hkyô

☆ 2:17 Hkya-on 69:9

¹ Nikodimu gâ é Hparishe rayuq nyi ri; yhang gi, Yudaq byu pê é byìn tú wapdoq má bo é sù nghut ri. ² Yhang gi, myín lé, Yesuq chyáng lé mù, "Rabai ê, Nàng gi, Garai Gasâng chyáng mai lé é sará rayuq nghut é lé, ngamoq sê lhê. Hkâsu mù gâ le, Nàng kut shit é limik kumlhá pé gi, Garai Gasang a lom é nghut jáng, ó yuq le wó kut râ a nghut." ga taí ri.

³ Haú hkûn, Yesuq gi, yhang lé, "Ngò, nàng lé teng za taí kyo lé, ó yuq nghut kôle, dum hku é hui sù za a nghut le gi, Garai Gasâng é mingdán lé wó myâng râ a nghut." ga tû taí ri.

⁴ Haú jáng, Nikodimu gi, "Ipyat kó bê é byù gi, dum hkû é hkâsu kut wó hui râ lú? Ínû é unghkaú má dum wâng mù, dum hku é hui râ gi, gè gè yhang wó dut râ a nghut!" ga taí ri.

⁵ Haú hkûn, Yesuq gi, "Ngò, nàng lé teng za taí kyo lé, ó yuq nghut kôle, wuì eq Woi-nyí mai hku kat é hui sù za a nghut le gi, Garai Gasâng é mingdán má wó wâng râ a nghut. ⁶ Gungsho mai hku kat é gi, gungsho nghut ri; Woi-nyí mai hku kat é kúm gi, woi-nyí nghut ri. ⁷ 'Nungmoq gi, dum hku é hui râ lhê' nghû Ngò taí é dang lé, nàng hkâmaú nyí. ⁸ Haú, laì gi, yhang nau é shut ló lhê. Laì lò htê lé nàng wó gyo kôlhang, laì hkâmai lo é eq, hká shut ló é lé, nàng sé râ a nghut; haú Woi-nyí mai hku kat huí é sù, ó yuq nghut kôle, haú eq rajung za nghut lhê." ga tû taí ri.

⁹ Haú hkûn, Nikodimu gi, "Haú gi, hkâsu wó dut râ lú?" ga myí ri.

¹⁰ Yesuq tû taí é gi, "Nàng gi, Israelaq byu pê é sará rayuq nghut to luí nhîng, haú hkyô pé lé a sê gyo lú? ¹¹ Ngò, nang lé teng za taí kyo lé, ngamoq

gi, ngamoq sê é hkyô lé taí mù, ngamoq myang wú bê lé saksé hkâm lhê; nghut kôlhang, nungmoq gi, ngamoq é saksé lé a hap yù kó nghut ri. ¹² Ngò gi, nungmoq lé, mingkan eq sêng é hkyô lé taí kyô le lhang, a lumjîng kô é nghut le gi, mauhkûng mingdán eq sêng é hkyô lé taí kyô é nghut le gi, hkâsu kut wó lumjîng kó râ lhu? ¹³ Mauhkûng mingdán mai gyó lo é sù, haû Byu Yhangzo mai lai lui, mauhkûng mingdán má ó yuq lhang wó doq ló wú é a nghut. ¹⁴ Mosheq gi, yoso má lhangmui lé tu shap tô é su, haû Byu Yhangzo le tu shap tô é hui ra râ nghut lhê. ¹⁵ Haû mù, haû Byu Yhangzo lé lumjîng é yuq hkangmó gi, ahtum abyuq é asak wó yû râ nghut lhê.

¹⁶ Hkâsu mù gâ le, Garai Gasang gi, mingkan lé gyai yhang chyitdap é yanmai, Yhang Zo lé lumjîng é sù ó yuq nghut kôle, htên byoq é a huî e za, ahtum abyuq é asak wó yû sháng gaq ga, rayuq za é Yhâng é Zote lé byî pyám bê nghut ri. ¹⁷ Hkâsu mù gâ le, Garai Gasang gi, mingkan lé mara byi râ matú, Yhang Zo lé mingkan htoq má nhang kat é a nghut é za, Yhang é yanmai mingkan hkyi yu é hui râ matú sheq nhang kat é ru nghut lhê. ¹⁸ Yhang lé lumjîng é sù gi, mara byî é hui râ a nghut; nghut kôlhang, Yhang lé a lumjîng é sù kúm gi, Garai Gasang é Yhangzo zote lé a lumjîng é sù nghut é yanmai, mara byî é huî to gù bê nghut ri. ¹⁹ Maubó gi, mingkan htoq má lé jé to bê; nghut kôlhang, byu pé kut é hkyô gi, agè ashop hkyô nghut é yanmai, yhangmoq gi, maubó lé chyit râ malaî, mauchut lé chyit akô nghut ri; haû gi, mara byî é hui râ hkyô yhang nghut ri. ²⁰ Agè ashop hkyô kut é sù

ó yuq nghut kôle, maubó lé a nguì nghut ri; haú yuq gi, yhang kut é hkyô lhoq byông htoq kat râ lé gyuq é yanmai, haú maubó shut lé lô râ a nghut. ²¹ Nghut kôlhang, haú tengmán hkyô đông asak dui é sủ ó yuq le, yhumsing kut é hkyô gi, Garai Gasang lom é hkyô lé, san za byu-myàng sháng gaq ga, haú maubó shut lé lo ri." gâ ri.

Yesuq Eq Séng Luí, Wui-myhup Sará Yohan Saksé Hkâm É Hkyô

²² Hau htâng má, Yesuq gi, Yhâng é chángzô pé eq rahá, Yuda mau shut wang ló mù, haú má rayoq zo nyì luí, wui-myhup hkâm byì ri. ²³ Haú u lé, Yohan gi, Salim nàm mâ é E-nun gâ é jowò má, wui gyai myo joq é yanmai, wui-myhup hkâm byì nyi ri; byu pé gi, abyit alan lé lò kômù, wui-myhup lé hkâm yu nyi bum akô nghut ri. ²⁴ (Haú gi, Yohan lé htóng a lhoq hkyó shi é hkun lhê é hkyô nghut ri.) ²⁵ Haú hkûn, Yohan é chángzô pé ra-am eq Yudaq byù rayuq gi, lhoq san lhoq yúng hking eq séng luí, dang htíng htíng lhùm bum akô nghut ri. ²⁶ Hau htâng, yhangmoq gi, Yohan chyáng lé luí, "Rabai ê, Yodan làng hé hpoq shut nàng eq rahá nyì luí, nàng èq saksé hkâm byì é Sủ gi, ahkuí, wui-myhup hkâm byì nyi é nghut mù, yuq hkgámó gi, Yhâng chyáng e bum akô nghut ri mhai." ga, yhang lé taí akô.

²⁷ Haú eq séng luí, Yohan tũ taí é gi, "Byù rayuq gi, mauhkung mai byì é za a nghut jáng, haí le wó hap yù râ a nghut. ²⁸ 'Ngò gi, Hkrisduq a nghut, Yhang é hí má nhang kat huí é sủ za nghut lhê.' nghũ, ngò taí é lé, nungmoq yhang saksé nghut bum akô. ²⁹ Myisik wó é sủ gi, lusik nghut ri. Lusik lé, lánng yap tô é luzúm hpó gi, lusik é htê lé wó gyô

é yanmai, gyai yhang gabú nyi ri. Haû sù é gabú hkyô gi, ngá é gabú hkyô nghut mù, ngò má byíng jup nyi bê nghut ri. ³⁰ Yhang gi, kô jat lò ra rá nghut lhê; ngò gi, yom lò ra rá nghut lhê.

³¹ Ahtoq mai lé é Sù gi, lhunglhâng é ahtoq má nghut ri; myigùng htoq mâ é sù kúm gi, myigùng htoq eq sêng é nghut luí, myigùng htoq eq sêng é dông za taí ri; mauhkúng mai lé é Sù gi, lhunglhâng é ahtoq má nghut ri. ³² Yhang gi, wó myâng wó gyô é hkyô lé, saksé hkám kôlhâng, Yhang hkâm é saksé lé, ó yuq le a hap yù kó nghut ri. ³³ Yhâng é saksé lé hap yu é sù kúm gi, haû Garai Gasang gi, tengmán sù nghut ri ga, saksé shit é sù nghut bê. ³⁴ Garai Gasâng èq nhang kat é hui Sù gi, Garai Gasâng é mungdang lé taí ri; hkâsu mù gâ le, Garai Gasang gi, haû Woi-nyí lé, laké a kat e za byí é yanmai nghut ri. ³⁵ Haû Íwa gi, Zo lé chyitdap luí, jung hkanmó lé Yhâng é loq má ap byi bê nghut ri. ³⁶ Haû Zo lé lumjíng é sù ó yuq nghut kôle, ahtum abyuq é asak wó lhê; nghut kôlhâng, haû Zo lé he-ngik pyâm é sù ó yuq nghut kôle, asak haû lé myàng râ a nghut; hkâsu mù gâ le, Garai Gasâng é nhikmo-yo hkyô gi, yhâng chyáng ru joq nyi ri." gâ ri.

4

Yesuq Eq Samariq Myhí Huí É Hkyô

¹ Yesuq gi, Yohan htoq má, chángzo je lhoq myô é eq wui-myhup hkám byí nyi ri gâ é hkyô lé, haû Hparishe pé wó gyô akô nghut ri. ² (Nghut kôlhâng, gè gè ga jáng, Yesuq gi, Yhang wui-myhup hkám byí é a nghut, Yhâng é chángzô pé sheq ru nghut akô.)

³ Haû hkyô lé, Yesuq sé jáng, Yhang gi, Yuda mau

mai htoq mù, Galile mau shut dum taû lô bê nghut ri.

⁴ Ahkuî, Yesuq gi, Samariq mau mai sô lai lô ra dut bê nghut ri. ⁵ Haû mù, Yhang gi, Yakup mai yhang zo Yosep lé byî é maumyî rajap eq chyâng lhûm é, Suhka ga myhîng é, Samariq mau mâ é wà mó ralhum má lo jé ri. ⁶ Haû má, Yakup é wuîhtung le joq to luî, Yesuq gi, hkyô sô ngu é yanmai, wuîhtung hau é nàm má zung gyó tô ri. Haû u gi, nyí-káng raxe í hkyíng* nghut bê nghut ri.

⁷ Haû hkûn, Samariq myiwe myhí rayuq wuî lé hkam ri; Yesuq gi, yhang lé, "Ngo lé wuî byi shuq laq." ga taî ri. ⁸ (Haû u gi, Yhâng é chángzô pé, zoshuq wuî ra matú wà hkaû shut e byuq kô é ahkyíng nghut ri.)

⁹ Haû Samariq myiwe myhí gi, Yhang lé, "Nàng gi, Yudaq byù rayuq nghut to luî nhîng, ngò Samariq myiwe myhí chyáng, haî mù shuq wuî dúng lhê lhú?" ga taî ri. (Hkâsu mù gâ le, Yudaq byu pé gi, Samariq byu pé eq a zùm yap kó nghut ri.)

¹⁰ Haû hkûn, Yesuq gi, yhang lé, "Nàng gi, haû Garai Gasâng é chyunghuq lé le, nang lé wuî dung sô ó yuq nghut é lé le, sê é nghut le gi, noq mai Yhang lé dúng tôngbán luî, Yhang gi, nang lé asak-wuî byi berâ nghut lhê." ga tú taî ri.

¹¹ Myiwe myhí haû gi, "Yhumsîng ê, Nàng gi, wuî hkâm ra zè haî le a wó, wuîhtung le nik ri; haû asak-wuî lé, Nàng hkâmâ é wó yû ra lhú? ¹² Ngamoq é îwa Yakup gi, ngamoq lé wuîhtung shî byî to bê

* **4:6** Nyí-káng raxe í hkyíng gi, Yudaq byu pé é hkyuq hkyíng nghut ri.

nghut lhê; yhang yhang le, yhang zo pé le, yhang rêm é dusak pé le, wuhtung shî mâ é wuì shuq bekô nghut ri; Nàng gi, Yakup htoq je kô lhê lhú?" ga Yhang lé taì ri.

¹³ Yesuq gi, "Wuì shî lé shuq é sù ó yuq le, wuìshit é dum hui rà nghut lhê. ¹⁴ Nghut kôlhang, Ngò byî é wuì lé shuq é sù ó yuq nghut kôle, wuìshit é hkâ-nhám a hui lò rà nghut lhê. Ngò byî é wuì haù gi, haù yuq má, ahtum abyuq é asak matú wuìbúm dut rà nghut lhê." ga yhang lé tû taì ri.

¹⁵ Myiwe myhí haù gi, Yhang lé, "Yhumsîng ê, ngò gi, wuì le a shit lo, shî má wuì hkâm le a lé ra lo sháng gaq, wuì haù ngo lé byi laq." ga taì ri.

¹⁶ Haù hkûn, Yesuq gi, "Ló mù, nung làng lé lò wut lò aq." ga, yhang lé taì ri.

¹⁷ Yhang gi, "Ngò, làng a wó." ga taì jáng, Yesuq gi, yhang lé, "Nàng, làng a wó gâ é gi, têng ri. ¹⁸ Hkâsu mù gâ le, nàng gi, yuqgè ngo yuq wó wú bê sù nghut ri; nàng, ahkuì wó tô é yuqgè le nung làng a nghut. Nàng gi, têng é dang taì bê nghut ri." ga taì ri.

¹⁹ Haù hkûn, myiwe myhí haù gi, "Yhumsîng ê, Nàng gi, myiqhtoi rayuq nghut é hkyô lé, ngò wú sé bê. ²⁰ Ngamoq é îchýí îwâ pé gi, bùm shî má noqkuq kô é nghut lhê; nghut kôlhang, nungmoq Yudaq byu pé gi, Yerusalem wà mó za noqkuq jowò nghut lhê ga taì akô nghut ri." ga taì ri.

²¹ Haù hkûn, Yesuq taì é gi, "Myiwe myhí ê, Ngo lé jíng aq; bùm shî má le a nghut, Yerusalem wà mó má le a nghut e za, haù Îwa lé noqkuq rà ahkýing, jé lò nyì bê nghut ri. ²² Nungmoq Samariq byu pé gi, yhumsîng lháng a sê é lé, noqkuq akô; ngamoq

kúm gi, ngamoq sê é lé noqkuq lhê; hkâsu mù gâ le, hkyi yù hkyô gi, Yudaq amyû mai lo é nghut lhê.†
 23 Nghut kôlhang, haû têng é đông noqkuq é bang gi, woi-nyí mai le, tengmán hkyô mai le, haû Íwa lé noqkuq râ ahkyíng gi, jé lo nyi bê nghut luí, ahkuí lhang jé to bê nghut ri; hkâsu mù gâ le, haû Íwa gi, haû su kut noqkuq é bang lé ô nau ri. 24 Garai Gasang gi, woi-nyí nghut lhê; haû mù, Yhang lé noqkuq é bang gi, woi-nyí mai le, tengmán hkyô mai le, noqkuq ra râ nghut lhê." ga taí ri.

25 Myiwe myhí haû gi, "Hkrisduq gâ é Mesaia jé lé râ nghut é lé gi, ngò sé lhê. Yhang jé lé jáng, nganhúng lé banshoq taí sân kyo râ nghut lhê." ga taí ri.

26 Hau htâng, Yesuq gi, "Nàng eq dang nyo nyi é sù ngò gi, haû yuq nghut lhê." ga taí ri.

Haû Chángzô Pé Dum Taû Jé Lo É Hkûn Lhê Hkyô

27 Haû u lé, Yhâng é chángzô pé gi, dum taû jé lo bum akô; yhangmoq gi, Yesuq, myiwe rayuq eq dáng nyo nyi é lé lo myàng luí, maú byuq bum akô. Nghut kôlhang, "Nàng, haí ô ri l hú?" ga le, "Haí mù Yhang eq dáng nyo nyi lhê l hú?" ga le, Yhang lé ó yuq a myi kó nghut ri.

28 Hau htâng, myiwe myhí haû gi, yhâng é wui yambú lé tô pyâm to luí, wà shut taû wang ló mù, wà byù wui lé ló taí kyô é gi, 29 "Ngò kut lai lò bê hkyô pé lhunglhang lé, taí kyô é byù rayuq lé, lé wú keq! Yhang gi, Hkrisduq nghut lhê abe?" gâ ri.

† 4:22 Bun zo shí má, Yesuq taí nau é gi, hkyi yù hkyô lé, Garai Gasang gi, Yudaq byu pé đông danggidiq byi to é nghut é lé taí nau é nghut ri.

³⁰ Haú mù, yhangmoq gi, wà mai htoq lé luí, Yesuq chyáng lé lo bum akô nghut ri.

³¹ Haú u lé, Yhâng é chángzô pé gi, Yhang lé, "Rabai ê, zoshuq zo aq." ga chôm taí akô.

³² Haú hkûn, Yhang gi, yhangmoq lé, "Nungmoq a sê é jung zoshuq zo râ Ngò wó lhê." ga tû taí ri.

³³ Haú mù, Yhâng é chángzô pé gi, "Yhang lé, rayuq yuq eq zoshuq lé dé byí é abe?" ga, rayuq eq rayuq taí lhûm bum akô.

³⁴ Haú hkûn, Yesuq taí é gi, "Ngo lé nhang kat Sû ô nau é hkyô lé kut râ eq Yhâng é muzó jizó lé lhoq pán râ hkyô gi, Ngá é zoshuq nghut bê.

³⁵ 'Kyôshu yoq jé râ gi, lhamó myi hkyap râ ashí.' ga, nungmoq lhaq taí lhê a nghut kó lhú? Ngò, nungmoq lé taí kôlé, nungmoq é myoq hpóng luí, haú yò pé má wú kat wú keq! Kyôshi gi, myhíng luí, kyô shu yoq gi, jé to bê nghut ri. ³⁶ Haú kyô hkyó sù eq kyô shu sù gi, rahá wó gabú kó sháng gaq ga, ahkuí lháng, haú kyô shu sù gi, yhâng é zuihpau lé myang yù luí, ahtum abyuq é asak é matú, kyôshi shú tsíng to bê nghut ri. ³⁷ Haú su mù, 'Rayuq gi, sân hkyó, góyuq gi, shú yù.' gâ é sanghkyang gi, têng ri. ³⁸ Nungmoq a zui saí tô é jang mâ é shú yù râ matú, nungmoq lé Ngò nhang kat bê nghut lhê. Góbang gi, haú má wum kat zui saí to bê nghut mù, nungmoq gi, haú bang zui saí é akyû lé shu yù bekô nghut ri." gâ ri.

Samariq Byù Myo Myo Lumjǐng Kô É Hkyô

³⁹ "Yhang gi, ngò kut lai lò bê hkyô lhunglháng lé, taí kyô ri." ga luí, myiwe myhí haú saksé hkâm é yanmai, haú wâ má é Samariq byù myo myo gi, Yesuq lé lumjǐng bùm bekô nghut ri. ⁴⁰ Haú

mù, Samariq byu pé gi, Yesuq chyáng lé jé kômù, yhangmoq eq nyí râ matú, Yhang lé lung kô é yanmai, Yhang gi, í nyí bo nyí bê nghut ri. ⁴¹ Yhâng é dang pê é yanmai, byù myo myo gi, lumjǐng bang dut jat lò bekô nghut ri.

⁴² Yhangmoq gi, myiwe myhí haû lé, "Ahkuî, ngamoq lumjǐng é gi, nàng taî é dang yanmai za a nghut lo; ngamoq yhang wó gyo bê nghut é htoq agó, shí yuq gi, gè gè yhang, mingkan é hkyi yù Sû nghut é lé, ngamoq sé bê nghut é yanmai nghut lhê." ga chôm taî akô nghut ri.

Mingsuwún Hpó É Yhangzo Lé Lhoq Gê Byî É Hkyô

Mht 8:5-13; Luk 7:1-10

⁴³ Í nyí lai jáng, Yesuq gi, haû mai Galile mau shut htoq e ló bê nghut ri. ⁴⁴ "Myiqhtoi gi, yhumsing é mau má myoqdong a wó wú é nghut lhê." ga, Yesuq yhang saksé hkâm é nghut lhê. ⁴⁵ Yesuq gi, Galile mau má jé é hkûn, Galile byu pé gi, Yhang lé lhom hkulum yu akô; yhangmoq gi, Yerusalem wà mó má, Lhoqlhai Poî ê lòm kô é nghut é yanmai, poî u lé, Yesuq kut é hkyô lhunglháng lé, myàng kô é bang nghut ri.

⁴⁶ Yesuq gi, Yhang mai haû wuì lé tsibiyiq wing dut nhang é, Galile mau mâ é Hkanaq wà mó má, ê dum kûm ri. Haû ming suwún rayuq é yhangzo yuqzo gi, Kaperna-um wà má no nyi ri. ⁴⁷ Yesuq gi, Yuda mau mai Galile mau má jé lé bê gâ é hkyô lé, ming suwún haû wó gyo jáng, yhang gi, Yesuq chyáng ê mù, shî-nò no nyi é yhangzo lé, lé lhoq gê byi râ matú, Yhang lé dǔng tǔngbán ri.

⁴⁸ Haú hkûn, Yesuq gi, yhang lé, "Byù nungmoq gi, limik kumlhá pé eq mauhpo muzó pé lé za a myàng kô é nghut le gi, hkâ-nhám lé lumjínq kó râ a nghut." ga taí ri.

⁴⁹ Mingsuwún haú gi, "Yhumsîng ê, ngá zo a shî shimá gyó lé laq." ga taí ri.

⁵⁰ Haú hkûn, Yesuq gi, "Nàng wó ló bê; nung zo byùn râ nghut lhê." ga tû taí ri.

Suwún haú gi, Yesuq taí é dang haú lé gyô jínq luí, tau ló bê nghut ri. ⁵¹ Yhang gi, hkyô má ru nghut nyi ashî hkûn, yhâng é dui-nhâng zoshâng wui gi, yhang lé lé hui luí, zoshâng haú gè byuq é hkyô, lé taí kyô akô nghut ri. ⁵² Yhang gi, yhang zo hkâ-nhám gè byuq é ahkyíng lé myi wú é hkûn, yhangmoq gi, "A-nyí nap nyí hkyuí rahkyíng má, gùng nyé é chám ló byuq bê nghut ri." ga taí kyô akô.

⁵³ Haú hkûn, ahkyíng haú gi, "Nung zo byùn râ nghut lhê." ga, yhang lé, Yesuq taí é ahkyíng nghut é lé, haú yhângwa bûn sé bê nghut ri. Haú mù, yhang eq yhâng yhumbyù banshoq bang gi, lumjínq bekô nghut ri.

⁵⁴ Haú gi, Yesuq, Yuda mau mai Galile mau má lé jé é htâng, í dâm nghû râ dá kut shit é limik kumlhá nghut ri.

5

Wuìhtum Yàm Má, Nòhpyo Lhoq Gê Byî É Hkyô

¹ Hau htâng a myáng má, Yudaq byu pé é poí ralhum joq é yanmai, Yesuq gi, Yerusalem wà mó má doq ló ri. ² Ahkuí, haú Yerusalem wà mó é Sau Hkúmdong nàm má, Hebre myíng dông gi,

Betzahta ga myhîng é wuìhtum ralhùm joq ri; hau é lînhgkyuq má, jìrop ngo lhum joq tô ri. ³ Jìrop haú pé má, myoqjít bang, hkyî hten bang, gùngjum shî bang ajùm ayò leq tô bum akô. (Haú bang gi, wuì dui nún râ lé lánq tô é bang nghut akô. ⁴ Hkâsu mù gâ le, haú Yhumsîng é maumang lagyo gyó lé lé kut mù, wuì lé, lé lhu nhún jáng, wuìhtum haú má hí wó wang é sù gi, haí jung ana wa dap to kôlhang, ge byuq é huí é yanmai nghut ri.)* ⁵ Sùm xe shit zân tup no nyi é byù rayuq le, haú má bo tô ri. ⁶ Yesuq gi, haú yuq no leq tô é lé myàng mù, haú su no nyi é gyai myáng bê nghut é hkyô lé sé jáng, yhang lé, "Nàng, gè nau ri l hú?" ga myî ri.

⁷ Nò sù haú yuq gi, "Yhumsîng ê, wuì dui nún lo é hkûn, wuìhtum má wàng râ matú, ngo lé garúm râ byù ó a nyi; ngò wàng râ nghû jáng, góyuq hí, ngá hí má wàng wàng dut ri." ga tû taí ri.

⁸ Hau htâng, Yesuq gi, yhang lé, "Toq aq! Nàng é taphkang yu chûng luí, sô ló aq." ga taí ri. ⁹ Haú yuq gi, radá dâm nò ge byuq bê nghut luí, yhâng é taphkang yù mù, sô ló bê nghut ri.

Haú nyí gi, Bánno buinyi nghut ri. ¹⁰ Haú mù, Yudaq byu pé gi, haú nò ge byuq é hui sù lé, "Hkû-nyí gi, Bánno buinyi nyí nghut é yanmai, nàng, taphkang waq é gi, tará lu lai bê nghut ri." ga taí akô.

¹¹ Nghut kôlhang, yhang tû taí é gi, "Haú ngo lé lhoq gè byi sù gi, ngo lé, 'Nàng é taphkang yu chûng mù, sô ló aq.' ga taí é nghut lhê." gâ ri.

* **5:4** Bun zo 3 lhum mâ é ahtang túm eq bun zo 4 lhum gi, chyúmding myo myo má a bo é nghut lhê.

¹² Haû mù, yhangmoq gi, "'Náng é taphkang yu chûng mù sô ló aq.' ga, nang lé taí é sù gi, ó yuq wá nghut ri lúhú?" ga myí akô.

¹³ Nghut kôlhang, haû ó yuq nghut é lé, nò ge byuq é hui sù gi, a châng sê kat nghut ri; hkâsu mù gâ le, Yesuq gi, haú mâ é byù moq mó má wang nyó ló byuq é yanmai nghut ri.

¹⁴ Htâng má, Yesuq gi, haú yuq lé noqkuq yhûm má myàng jáng, "Wú aq, nàng wángzán bê nghut ri; hí lhê htoq má je wuîhke é hkyô a hui zo sháng gaq, mara hkâkut shut lo." ga luî, yhang lé taí ri.

¹⁵ Haú yuq gi, htoq ló mù, yhang lé lhoq gê byí é sù gi, Yesuq nghut ri ga, Yudaq byu pé lé taí kyô ri.

Asak Wó Yû Râ Hkyô

¹⁶ Haû mù, Yudaq byu pé gi, Bánno buinyì nyí má, Yesuq, haú hkyô kut é yanmai, Yhang lé gunjang lo akô nghut ri. ¹⁷ Haú hkûn, Yesuq gi, yhangmoq lé, "Ngá Wa gi, hkû-nyí jé shoq, hkâ-nhám le mù zuî nyi é nghut mù, Ngò le mù zuî nyi lhê." ga taí ri. ¹⁸ Haû mù luî, Yesuq gi, Bánno buinyì lé lhoq htên é htoq agó, Garai Gasang lé lháng, Yhâng Wa ga wut é dông, yhumsing gùng lé, Garai Gasang eq lhoq whuí é yanmai, Yudaq byu pé gi, Yhang lé sat pyám râ matú, je riyhang shikut lo akô nghut ri.

¹⁹ Yesuq, yhangmoq lé tû taí é gi, "Ngò, nungmoq lé teng za taí kôlé, haû Zo gi, yhumsing é myit dông haí le a wó kut; Yhâng Wa kut é hkyô lé myang é gù za wó kut é nghut lhê; hkâsu mù gâ le, haû Íwa kut é hkyô lé za, haû Zo châng kut é yanmai nghut lhê. ²⁰ Hkâsu mù gâ le, haû Íwa gi, Zo lé chyitdap é nghut luî, Yhang kut é hkyô lhunglháng, haû Zo lé

tûn shit ri; nungmoq maú hông shoq, shí pé htoq je ko é hkyô pé lé lhang, haú Zo lé tûn shit shirâ nghut lhê. ²¹ Haú Îwa gi, shî bê bang lé lhoq dui toq mù, yhangmoq lé asak byî é eq rajung za, haú Zo le, Yhang byî nau é bang lé, asak byi râ nghut lhê.

²² Hau htoq agó, haú Îwa lé hkunggâ é eq rajung za, haú Zo lé le, lhunglhang bang hkungga kó sháng gaq ga, haú Îwa gi, ó yuq lé le a jéyáng e za, jéyáng é hkyô lhunglhang, haú Zo lé lum to bê nghut ri.

²³ Haú Zo lé a hkunggâ é sù gi, haú Yhang lé nhang kat é sù Îwa lé le, a hkunggâ é sù nghut ri.

²⁴ Ngò, nungmoq lé teng za taí kôlé, Ngá dang lé gyo luí, Ngo lé nhang kat é Sù lé lumjîng é sù, ó yuq nghut kôle, mara byî é a hui e za, ahtum abyuq é asak wó é nghut lhê; haú yuq gi, shi é mai lut luí, asak duì bê sù nghut ri. ²⁵ Ngò, nungmoq lé teng za taí kôlé, haú Garai Gasang é Yhangzô é htê lé, shi byuq bê bang wó gyo râ ahkyíng gi, jé lo nyi bê nghut ri; ahkuí lhang jé to bê nghut ri. Htê haú lé gyô é bang gi, asak duì kó râ nghut lhê. ²⁶ Hkâ_{SU} mù gâ le, Garai Gasang gi, Yhânggùng má yhang, asak bo é eq rajung za, Yhang Zo lé le, Yhânggùng má yhang, asak bò nhang é yanmai nghut ri. ²⁷ Hau htoq agó, Yhang gi, haú Byu Yhangzo nghut é yanmai, Garai Gasang gi, tarâ jéyáng râ ahko ahkáng, Yhang lé byi bê nghut ri.

²⁸ Shí hkyô lé hkâ-maú hong nyi kó: lup pé má lúng tô é bang banshoq gi, Yhâng é htê lé wó gyo kôluí, htoq ló râ ahkyíng jé lò râ nghut lhê. ²⁹ Ge é hkyô kut é bang gi, asak duì râ matú, dui toq kó râ nghut lhê; agè ashop hkyô kut é bang gi, mara byî é hui zo râ matú, dui toq kó râ nghut lhê. ³⁰ Ngò

gi, Ngá myit đông mai haî le a wó kut é nghut lhê; Ngò wó gyô yu é eq rajung za sheq, jéyáng é nghut luî, Ngò jéyáng é hkyô gi, tengmán lhê; hkâsu mù gâ le, Ngò gi, Ngò ô nau é đông châng é a nghut e za, Ngo lé nhang kat é Sû ô nau é đông châng é sheq ru nghut lhê.

Yesuq Eq Séng Luî, Saksé Hkâm É Hkyô

³¹ Ngá gûng lé ngò saksé hkâm é nghut jáng, ngò za saksé hkâm é hkyô gi, teng râ a nghut. ³² Ngá é hkyô lé saksé hkâm byî é Sû (Ngá Wa) góyuq nyi lhê; Ngò eq séng luî, haú yuq hkâm é saksé gi, têng é hkyô lé, Ngò sê lhê.

³³ Nungmoq gi, Yohan† chyáng byù nhang kat wú bekô nghut ri; yhang gi, haú tengmán hkyô lé saksé hkâm byi bê nghut lhê. ³⁴ Ngò gi, xângzo byu pé mai saksé hkâm byi râ lé, ra luî a nghut, nghut kôlhang, nungmoq hkyi yu é wó hui râ matú sheq, haú su nghû taî é ru nghut lhê. ³⁵ Yohan gi, duq nyi é myibung su duqbó byî é nghut mù luî, nungmoq gi, haú duqbó é hkaú má, rayoq zo ngón nau nyi akô nghut ri.

³⁶ Nghut kôlhang, Ngò wó é saksé gi, Yohan byî é saksé htoq je kô lhê; hkâsu mù gâ le, ahkuî Ngò zui saî nyi é muzó gi, Ngò lhoq pán râ matú, haú Íwa, Ngo lé ap byî tô é nghut luî, haú Íwa, Ngo lé nhang kat é hkyô lé, saksé hkâm byî nyi ri. ³⁷ Hau htoq agó, haú Ngo lé nhang kat é sù Íwa le, Ngò eq séng luî saksé hkâm byî ri; nungmoq gi, Yhâng é htê lé le, a wó gyô wú kó; Yhâng é gunghkyâng lé le, a myang wú kó; ³⁸ haú Yhâng é mungdang le,

† 5:33 Yohan shî yuq gi, Wui-myhup Sará Yohan nghut lhê.

nungmoq chyáng a bò kó nghut ri; hkâsu mù gâ le, nungmoq gi, Yhang nhang kat é Sû lé a lumjǐng kô é yanmai nghut ri. ³⁹ Nungmoq gi, haû Chyúmdang mai ahtum abyuq é asak wó yû râ nghut lhê ga myit yù kô é yanmai, haû Chyúmdang má ho wú akô nghut ri; nghut kôlhang, Chyúmdang haû gi, Ngò eq séng luí saksé hkám byí ri; ⁴⁰ nghut kôlhang, asak wó yû râ matú, nungmoq gi, Ngá chyáng a kâm lé kó nghut ri.

⁴¹ Ngò gi, byu èq hkya-ôn é lé a lhom yu é nghut lhê. ⁴² Nghut kôlhang, nungmoq lé gi, Ngò sê lhê; nungmoq é i-myit hkaû má, Garai Gasang lé chyitdap é myit a bò kó nghut ri. ⁴³ Ngò gi, Ngá Wâ é myìng mai jé lé é sù nghut kôlhang, nungmoq gi, Ngo lé a lhom hap yù kó; yhâng myìng yhang lang é byù, gotû rayuq jé lé é ru nghut le gi, haú yuq lé, nungmoq lhom hap yù kó râ nghut lhê. ⁴⁴ Nungmoq gi, rayuq eq rayuq hkya-ôn lhùm é lé za hap yù luí, rayuq za nghut é Garai Gasâng chyáng mai lo é hkya-ôn hkyô lé gi, a hô kô é bang nhîng, hkâsu kut wó lumjǐng kó râ lhú?

⁴⁵ Nghut kôlhang, haû Íwâ é hí má, Ngò, nungmoq lé mara hún nhô hkâ-ngâm kó; nungmoq lé mara hun é sù gi, haû nungmoq mai myit myoqbyu tô é Mosheq ru nghut lhê. ⁴⁶ Mosheq lé nungmoq gè gè yhang lumjǐng kô é ru nghut le gi, Ngo lé le lumjǐng kó râ nghut lhê; hkâsu mù gâ le, Mosheq gi, Ngá é hkyô lé kâ tô é sù nghut ri. ⁴⁷ Nghut kôlhang, nungmoq gi, yhang kâ tô é pé lé lhang a lumjǐng kô é nhîng, Ngá dang lé, hkâsu kut wó lumjǐng kó râ lhú?" gâ ri.

6

*Byù Ngo Hkyîng Lé Zoshuq Byi Tsô É Hkyô
Mht 14:13-21; Mrk 6:30-44; Luk 9:10-17*

¹ Hau htâng a myáng má, Yesuq gi, Tiberi nhông le gâ é, Galile nhông he hpoq shut gû dap ló bê nghut ri. ² Haú hkûn, byù ajùm ayò gi, haú nò bâng htoq má, Yhang kut shit é limik kumlhá pé lé myàng kô é yanmai, Yhang htâng châng e ló bum akô nghut ri. ³ Yesuq gi, bùm shut doq ló mù, Yhâng é chángzô pé eq rahá zung tô ri. ⁴ Yudaq byu pé é Lhoqlhai Poî gi, chyâng lo nyì bê nghut ri.

⁵ Yesuq gi, tu wú kat le, byù ajùm ayò Yhâng shut lé lo bùm kô é lé byu-myang kat lui, Hpilip lé, "Shí bang zo râ muk, nga-nhúng, hkâmá é wó wuí râ lhú?" ga tâi ri. ⁶ Yesuq, haú su ga tâi é gi, yhang lé chyam wú râ matú za nghut ri; hkâsu mù gâ le, hkâsu kut râ hkyô gi, Yhâng é myit má bo to gù bê nghut ri.

⁷ Hpilip gi, Yhang lé, "Denari* í sho èq muk wui le lhang, rayuq ratsuí tsuí ngap râ a nghut." ga tâi ri.

⁸ Haú hkûn, Yhâng é chángzo nghut é, Simun Petruq é yhanggu Andre gi, Yhang lé, ⁹ "Muk-yo muk ngo long eq ngozo í du wó é yuqgè zo rayuq, shî má nyi ri; nghut kôlhang, byù shî myhô bang lé luq shoq, hkâsu kut wó gâm byi râ lhú?" ga tâi htoq kat ri.

¹⁰ Yesuq gi, "Haú shiwa byu pé lé, zùng nhâng keq." ga tâi ri. Jowò haú gi, mhán htu é jang nghut mù, yuqgè wui baú lhang, ngo hkyîng kô zung tô

* **6:7** Denari rachap gi, byù rayuq é ra-nyí é zuihpau eq wuí é nghut lhê.

bùm bekô nghut ri; ¹¹ hau htâng, Yesuq gi, muk long pé lé yù mù, jeju hkya-on lui, zung tô é bang lé, yhangmoq o é myhó tsing gàm byî ri. Haû eq rajung za, ngozo lé le haû su kut ri.

¹² Yhangmoq banshoq bang zô gyî bùm kô é htâng má Yhang gi, Yhâng é chángzô pé lé, "Myit gyó tô é ajap azo pé lé châng guq tsing yù keq. Haî le a langsâ pyám sháng gaq." ga taî ri. ¹³ Haû mù, yhangmoq gi, zô myhit tô é muk-yo muk ngo long mâ é ajap azo pé lé châng guq tsing le, raxe í mung byíng shoq wó guq tsing yu akô nghut ri.

¹⁴ Haû shiwa byu pé gi, Yesuq kut é limik kumlhá lé myàng kô é hkûn, "Shí yuq gi, mingkan htoq má jé lé lô râ gâ é, Myiqhtoi yhang nghut ri-nhung!" ga taî bum akô. ¹⁵ Yesuq gi, yhangmoq lé mù, Yhang lé hkohkâm zik kut nhâng kó râ dâ é hkyô lé, sê é yanmai, Yhang baú tsik za bùm shut dum haq doq ló bê nghut ri.

*Yesuq, Wuì Htoq Má Sô É Hkyô
Mht 14:22-27; Mrk 6:45-52*

¹⁶ Buigyum htâng, Yhâng é chángzô pé gi, haû nhông shut gyó ló mù, ¹⁷ lhaî má wang ji lui, nhông hé hpoq mâ é Kaperna-um wà shut gû e ló akô; haú hkûn, mauchut bê nghut kôlhang, Yesuq gi, yhangmoq chyáng a jé gyó lo shi nghut ri. ¹⁸ Haú u lé, laidun htan lo é yanmai, wuìlhêng toq lô bê nghut ri. ¹⁹ Yhangmoq gi, sum myi déng kô lhaî kôn e ló kô é hkûn, Yesuq gi, nhông htoq má so lui, haú lhaî shut chyáng lé lo nyi é lé myàng kômù, gyuq dan bùm bekô nghut ri. ²⁰ Nghut kôlhang, Yesuq gi, "Hkâgyuq kó, Ngò ru nghut lhê." ga yhangmoq lé taî ri. ²¹ Haû mù, yhangmoq gi, Yesuq lé gabú

myit eq lhaî hkaû má shuî hâng yù nau akô. Haú hkûn, lhaî haû gi, radá dâm yhangmoq jé nau é jang wuiyàm má jé bê nghut ri.

²² Nhões hé hpoq má nyi tô é byù moq mó gi, haú má lhaî racham za joq laî lo é hkyô eq, lhaî haú má Yesuq a bo doq jî e za, chángzô pé baú ji htoq ló kô é hkyô lé, hau htang nyí, bún sê kat akô nghut ri.

²³ Haú hkûn, haû Yhumsîng, jeju hkya-ôn é htâng, byu pé muk zô é jowò nàm má, Tiberi myuq mâ é lhaî pé jé lé bum ri. ²⁴ Haû byù moq mó gi, Yesuq eq Yhâng é chángzô pé, haú má a nyi lo kô é hkyô lé sé kô é yanmai, Yesuq lé châng hô râ matú lhaî haú pé má wang ji mù, Kaperna-um wà shut e ló akô nghut ri.

Yesuq, Asak Muk Nghut É Hkyô

²⁵ Yhangmoq gi, nhões hé hpoq má Yesuq lé myàng kôjáng, "Rabai ê, Nang gi, shî má hkâ-nhám jé lé é lhú?" ga, Yhang lé myî akô.

²⁶ Haú hkûn, Yesuq gi, "Ngò, nungmoq lé teng za taí kôlé, nungmoq gi, limik kumlhá pé lé myàng kô é yanmai, Ngo lé hô kô é a nghut, muk gyi shoq myàng zo kô é yanmai sheq, hô kô é ru nghut lhê.

²⁷ Htên byuq sê é zoshuq é matú, hkâshikut kó; haú Byu Yhangzo byi râ nghut é ahtum abyuq é asak é matú, ru gîng nyi é zoshuq wó yû râ lé sheq shikut nyi keq. Yhâng chyáng gi, haû Îwa Garai Gasang mai Yhâng é saksé dizik tap to bê nghut lhê." ga tú taí ri.

²⁸ Haû mù, yhangmoq gi, "Garai Gasang ô nau é muzó pé zui saí râ matú, ngamoq haî kut ra râ lhú?" ga Yhang lé myî akô.

²⁹ Haú hkûn, Yesuq gi, "Garai Gasang nhang kat é Sû lé, lumjínq é gi, Garai Gasang ô nau é muzó nghut bê." ga tú taí ri.

³⁰ Haú mù luî, yhangmoq gi, Yhang lé, "Ngamoq myoq eq wó myâng luî, Nàng lé lumjínq râ matú, Nàng, haí jung limik kumlhá kut shit râ l hú? Nàng, haí jung kut shit râ l hú? ³¹ Haú Chyúmdang má, 'Yhang gi, yhangmoq zo râ matú, mauhkûng mai muk byî ri. ✧ ga kê tô é eq rajung za, ngamoq é îchyí îwa pé gi, haú yoso hkaú má mannaq muk zo bekô nghut lhê." ga taí akô.

³² Haú hkûn, Yesuq gi, yhangmoq lé, "Ngò, nungmoq lé teng za taí kôlé, nungmoq lé mauhkûng mai muk byî é Sû gi, Mosheq a nghut, haú Ngá Wa sheq, nungmoq lé mauhkûng mai tengmán é muk byî é Sû ru nghut lhê. ³³ Hkâsu mù gâ le, Garai Gasang byî é muk gi, mauhkûng mai gyó lé luî, haú mingkan lé asak byî é Sû nghut lhê." ga taí ri.

³⁴ Yhangmoq gi, "Yhumsîng ê, ahkuî mai, ngamoq lé muk haú hkâ-nhám le byî nyì laq." ga chôm taí bum akô.

³⁵ Haú mù, Yesuq taí kyô é gi, "Ngò gi, asak muk nghut lhê. Ngá chyáng lé é sù gi, hkâ-nhám le zòmut é hui râ a nghut; Ngo lé lumjínq é sù le, hkâ-nhám le wuîshit é hui râ a nghut. ³⁶ Nghut kôlhang, Ngò, nungmoq lé taí wú bê eq rajung za, nungmoq gi, Ngo lé myang wú é nghut kôlhang, a lumjínq shi kó nghut ri. ³⁷ Haú Îwa mai Ngo lé ap byî tô é byù lhunglhang bang gi, Ngá chyáng lé kó râ nghut luî, Ngá chyáng lé é sù ó yuq lé le, Ngò gi, hkâ-nhám lé hkat htoq pyám râ a nghut. ³⁸ Hkâsu mù gâ le, Ngò,

✧ **6:31** Htoq Ló 16:4

mauhkûng mai gyó lé é gi, Ngò ô nau é hkyô lé kut râ matú a nghut e za, Ngo lé nhang kat Sû ô nau é hkyô lé kut râ matú ru nghut lhê. ³⁹ Haû Ngo lé nhang kat Sû ô nau é hkyô gi, Yhang mai Ngo lé ap byî tô é bang mâ é rayuq lé lhang, Ngò, a lhoq hpyuq pyâm e za, jihâm buinyi má yhangmoq lé dum lhoq dui toq yû râ matú ru nghut lhê. ⁴⁰ Hkâsu mù gâ le, Ngá Wa ô nau é hkyô gi, haû Zo lé wú mù, Yhang lé lumjing é sù yuq hkangmó, ahtum abyuq é asak lé wó yû râ matú nghut lhê; Ngò le, jihâm buinyi má haû bang lé lhoq dui toq râ nghut lhê." gâ ri.

⁴¹ Haû mù, "Ngò gi, mauhkûng mai gyó lé é muk nghut lhê." ga, Yesuq taî é yanmai, Yhang eq séng luî, Yudaq byu pé taî put kô é gi, ⁴² "Shí yuq gi, Yosep é yhangzo Yesuq a nghut lhi? Yhâng nu Yhâng wa lé, nga-nhung sê lhê a nghut kó lhu? Haû sù é nhing, ahkuî, 'Ngò gi, mauhkûng mai gyó lé é nghut lhê.' ga, Yhang hkâsu kut wó taî lhê lhu?" gâ bum akô.

⁴³ Haû hkûn, Yesuq gi, "Nungmoq ahkaû má hkâtaî put nyi kó. ⁴⁴ Haû Ngo lé nhang kat é sù Îwa mai shuîjé é sù za a nghut jâng, ó yuq le Ngá chyáng wó jé lé râ a nghut; jé lé é sù lé gi, jihâm buinyi má, Ngò lhoq dui toq râ nghut lhê. ⁴⁵ Myiqhtoi laiká pé má, 'Yhangmoq lhunglhâng bang gi, Garai Gasâng èq mhoq byî é hui kó râ nghut lhê.'[☆] ga kâ tô é eq rajung za, haû Îwâ chyáng mai gyo yù, mhoq yu é bang yuq hkangmó gi, Ngá chyáng lé kó râ nghut lhê. ⁴⁶ Haû gi, rayuq yuq mai, haû Îwa lé myang wú bê nghû nau é a nghut; Garai

☆ 6:45 Esai 54:13

Gasâng chyáng mâ é Sû za sheq, haû Îwa lé myang wú é Sû nghut lhê. ⁴⁷ Ngò, nungmoq lé teng za taí kôlé, lumjínq é sù gi, ahtum abyuq é asak wó lhê. ⁴⁸ Ngò gi, asak muk nghut lhê. ⁴⁹ Nungmoq é íchyí îwâ pé gi, haû yoso hkaû má mannaq muk zo bekô nghut lhê; nghut kôle, shi byuq bekô nghut ri. ⁵⁰ Nghut kôlhang, shî gi, mauhkûng mai gyó lé lo é muk nghut lhê; haû lé zô é sù gi, a shî lo râ nghut lhê. ⁵¹ Ngò gi, mauhkûng mai gyó lé lo é, haû asak dui é muk nghut lhê; rayuq yuq, muk shî lé zô é nghut le gi, ahtum abyuq dui nyì râ nghut lhê; muk shî gi, mingkan zô wui é asak matú, Ngò byi râ nghut é Ngá gungsho nghut lhê." ga tù taí ri.

⁵² Haû mù, haû Yudaq byu pé gi, "Byù shí yuq gi, nga-nhúng lé, Yhâng é gungsho hkâsu kut wó byi tso râ lú?" ga, yhangmoq yhangchang dang htíng htíng lhûm bum akô.

⁵³ Haú hkûn, Yesuq gi, yhangmoq lé, "Ngò, nungmoq lé teng za taí kôlé, haû Byu Yhangzô é gungsho lé zô é eq Yhâng é sui lé shuq e za a nghut le gi, nungmoq asak wó kó râ a nghut. ⁵⁴ Ngá é gungsho lé zô é eq Ngá é sui lé shuq é sù, ó yuq nghut kôle, ahtum abyuq é asak wó é nghut lhê; Ngò gi, jhtûm buinyì má, haú yuq lé lhoq dui toq yû râ nghut lhê. ⁵⁵ Hkâsu mù gâ le, Ngá é gungsho gi, zojung yhang nghut lhê; Ngá é sui gi, shuqjung yhang nghut lhê. ⁵⁶ Ngá é gungsho lé zô é eq Ngá é sui shuq é sù, ó yuq nghut kôle, Ngò má nghut nyì luî, Ngò le haú yuq má nghut nyì bê nghut lhê. ⁵⁷ Haû rú dui nyi é Îwa gi, Ngo lé nhang kat luî, Ngò gi, haû Îwâ é yanmai, dui nyi é eq rajung za, Ngá é gungsho lé zô é sù gi, Ngá é yanmai, dui nyì râ nghut lhê.

58 Shî gi, mauhkûng mai gyó lé lo é muk nghut lhê. Nungmoq é íchýí îwâ pé gi, mannaq muk zo kôle, shi byuq bekô nghut ri; nghut kôlhang, muk shî lé zô é sũ gi, ahtum abyuq dui nyi râ nghut lhê." ga taí ri. 59 Dang haú pé gi, Yesuq, Kaperna-um wà mâ é tarajong má mhoqshit nyi é u lé, taí é dang nghut ri.

Chángzô Pé Myo Myo, Yesuq Lé Kâng Pyâm To Kô É Hkyô

60 Yhâng é chángzô pé myo myo gi, haú lé wó gyo kôjáng, "Dang shî gi, gyai wuî ri. Ó yuq wá wó cháng râ lú?" ga taí bum akô.

61 Yesuq gi, haú eq séng luî, Yhâng é chángzô pé taí put nyi bùm kô é lé Yhâng é myit má sé luî, yhangmoq lé, "Dang shi é yanmai, nungmoq myit htên bum akô lú? 62 Haú Byu Yhangzo gi, Yhang nyi laí lò bê jowò shut taú doq ló é lé, nungmoq myàng kô é nghut le gi, hkâsu nghû kó râ lú?"

63 Haú Woi-nyí gi, asak byî lhê; gungsho kúm gi, haí le a wó dut nghut ri. Nungmoq lé, Ngò taí é dang pé gi, Woi-nyí le nghut lhê, asak le nghut lhê.

64 Nghut kôle, nungmoq chyáng mâ é ra-am gi, a lumjíng kó nghut ri." ga taí ri. Hkâsu mù gâ le, ô pé gi, a lumjíng kó râ eq, ó yuq gi, Yhang lé ap pyám râ nghut é hkyô lé, Yesuq gi, sâng-hi mai sê to gù bê nghut ri. 65 Yhang xoq taí é gi, "Haú su mù, haú Îwâ eq ahkáng byî é sũ za a nghut le gi, ó yuq le Ngá chyáng wó lé râ a nghut nghû, Ngò, nungmoq lé taí kyo wú bê nghut lhê." gâ ri.

66 Haú dàm mai, Yhâng é chángzô pé myo myo gi, Yhâng htâng a cháng lo kô e za, taú ló byuq bùm bekô nghut ri.

⁶⁷ Haú su mù, Yesuq gi, haú chángzo raxe í yuq lé, "Nungmoq le, ló byuq nau akô, a nghut lhú?" ga myí ri.

⁶⁸ Haú hkûn, Simun Petruq gi, "Yhumsîng ê, Nàng gi, ahtum abyuq é asak mungdang wó Sû nghut to bê lé nhîng, ngamoq gi, ó yuq chyáng ê shirâ lhú? ⁶⁹ Nàng gi, Garai Gasâng é Chyoiyúng Sû nghut é lé, ngamoq, lumjîng lhê, sê nyi lhê." ga, Yhang lé tú tai ri.

⁷⁰ Haú hkûn, Yesuq gi, "Nungmoq raxe í yuq lé, Ngò hkyin yù bê a nghut kó lhú? Nghut kôle, nungmoq mâ é rayuq gi, nat nghut ri." ga tú tai ri.

⁷¹ (Yhang gi, haú Simun Iskarut é yhangzo, Yudaq lé tai nau é nghut ri; haú yuq gi, chángzo raxe í yuq má bò sù nghut kôle, htâng má, Yhang lé ap pyám râ sù nghut ri.)

7

Yesuq Eq Yhâng É Gumang Wui

¹ Hau htâng má, Yesuq gi, Yhang lé sat râ matú, Yudaq byu pé ho nyi bùm kô é yanmai, Yuda mau má a kâm sô wún mù, Galile mau má sô lhing wún ri. ² Nghut kôlhang, haú Yudaq byu pé é Saksé Zúm Poí chyâng lo nyi é hkûn, ³ Yesuq é yhanggu yuqzô pé gi, Yhang lé, "Náng é chángzô pé gi, Nàng kut é laklaí kumlhá pé lé myàng kó sháng gaq, Nàng, shî mai htoq ló luí, Yuda mau shut e ló aq. ⁴ Myìng hu nau é sù gi, hkaû zaú luí haí le a kut wú é nghut lhê. Nàng gi, haú pé lé kut nyi bê nghut é yanmai, mingkan lé, Náng gûng tûn shit aq." ga tai akô. ⁵ Hkâsu mù gâ le, yhanggu sîng yuqzô pé lháng, Yhang lé a lumjîng kó nghut ri.

⁶ Haû mù luí, Yesuq gi, yhangmoq lé, "Ngá é ahkyíng gi, a jé shi nghut ri; nungmoq é ahkyíng kúm gi, hká hkûn le joq nyi ri. ⁷ Haû mingkan gi, nungmoq lé a jú a wó kut kó nghut ri; nghut kôlhang, Ngo lé gi, a jú kó; haî mù gâ le, yhang kut é hkyô gi, agè ashop é nghut é lé, Ngò, saksé tân shit é yanmai nghut ri. ⁸ Nungmoq gi, poî haú shut doq ló keq. Ngò kúm gi, Ngá é ahkyíng a jé shi nghut é yanmai, poî haú shut a doq ló shirâ nghut lhê." ga taí ri. ⁹ Haû su ga taí luí, Yhang gi, Galile mau má nyi gyó to bê nghut ri.

¹⁰ Nghut kôlhang, Yhang gu pé, haû poî shut doq ló byuq é htâng má, Yhang gi, de de a nghut é dông, tsik za châng doq ló bê nghut ri. ¹¹ Yudaq byu pé gi, haû poî má, Yhang lé châng hô kômù, "Haú yuq gi, hkâmá nghut lhê lhú?" ga, myi wún akô nghut ri.

¹² Haû byù hpûng hkaû má, Yhang eq séng luí taí lhûm bùm kô é má, ra-am gi, "Yhang gi, byù gè nghut ri." ga taí kôjáng, ra-am gi, "A nghut, Yhang gi, byu pé lé hkyô shuî ngoq sù nghut ri." ga tû taí akô. ¹³ Nghut kôlhang, haû Yudaq suwún wuî lé gyuq kô é yanmai, ó yuq le, Yhang eq séng é hkyô lé de de a wám taí kó nghut ri.

Haû Poî Má, Yesuq Mhoqshit É Hkyô

¹⁴ Haû poî rawuí nghut ló é hkûn, Yesuq gi, noqkuq yhûm má doq ê luí, mhoqshit hi ló bê nghut ri. ¹⁵ Haú hkûn, Yudaq byu pé gi, gyô maú byuq kômù, "Shí yuq gi, mhoq yu é hkyô le a joq wú é wá, haû-í hkâsu mù sê lhê laq?" ga myi bum akô.

16 Haû mù, Yesuq tû taí é gi, "Ngò mhoqshit é dang gi, Ngá é dang a nghut; Ngo lé nhang kat Su é dang ru nghut lhê. 17 Rayuq yuq, Garai Gasang ô nau é hkyô lé châng kut nau é nghut jáng, Ngò mhoqshit é dang gi, Garai Gasâng chyáng mâ é nghut a nghut é eq, Ngá é myit đông taí é dang nghut a nghut é lé, yhang sê gàm hkoq yû râ nghut lhê. 18 Yhumsing é myit đông taí é sù gi, yhumsing é matú aróng hô sù nghut ri; nghut kôlhang, yhumsing lé nhang kat su é matú, aróng ho é sù gi, tengmán é byû nghut ri; yhang má, a tengmán é hkyô haí le a bò nghut ri. 19 Mosheq gi, nungmoq lé jep é tarâ byí to bê, a nghut kó lúhú? Nghut kôlhang, nungmoq ó yuq le, jep é tarâ haû lé a cháng kó nghut ri. Haí mù luí, Ngo lé sat nau nyi akô lúhú?" gâ ri.

20 Haú hkûn, haû byû hpûng gi, "Nàng gi, nat gang wang to sù nghut ri-nhung! Nang lé, ó yuq wá sat nau nyi ri lúhú?" ga tû taí akô.

21 Yesuq gi, yhangmoq lé, "Ngò, laklaí kumlhá ralhum kut jáng, nungmoq banshoq bang gi, maú byuq bum akô. 22 Nghut kôlhang, nungmoq gi, ahpyo-kuq hpyit byí é hkyô lé, Mosheq byí é nghut lhê ga luí, Bánno buinyì má, zoshâng lé ahpyo-kuq hpyit byí akô (gè gè ga jáng, ahpyo-kuq hpyit é hkyô gi, Mosheq chyáng mai lo é a nghut e za, íchýí îwâ pê chyáng mai lo é ru nghut lhê.). 23 Haû, Mosheq é jep é tarâ lé a lhoq htên pyám sháng gaq nghû, Bánno buinyì má, zoshâng lé ahpyo-kuq hpyit byí é nghut le gi, haí mù luí, Bánno buinyì má, byû rayuq é gùng gón lé, Ngò lhoq gê byí é yanmai, Ngo lé nhikjum yô akô lúhú? 24 Byû du lé wú luí

hkâjéyáng kó; tengmán é dông sheq jéyáng keq." ga taí ri.

Yesuq Gi, Hkrisduq Nghut Lhê Lhú?

²⁵ Haû mù luí, Yerusalem wà mó mâ é byu pé ra-am gi, "Haû yhangmoq sat pyám nau nyi é sù gi, shí yuq a nghut lhi? ²⁶ Yhang gi, shí má de de dâng nyo nyi le, yhangmoq gi, Yhang lé, haí le a ga kó myhi-nhung! Yhang gi, Hkrisduq nghut lhê ga, haû ahkáng ayá wó bang gi, gè gè yhang, sê akô abe? ²⁷ Haû Hkrisduq jé lé é hkûn gi, Yhang hkâmai lé lo é lé, ó yuq lhang sé râ a nghut." ga taí bum akô. Nghut kôlhang, shí yuq gi, hkâmâ é sù nghut é lé, nga-nhung sê lhê;

²⁸ Haû mù, Yesuq gi, noqkuq yhûm wàng má mhôqshit uchyang, htê mó eq taí kat é gi, "Nungmoq gi, Ngo lé sê é htoq agó, Ngò, hkâmai lé é sù nghut é lé le, sê akô nghut ri. Ngò gi, Ngá myit dông shí má lé nyi tô é sù a nghut kôlhang, Ngo lé nhang kat é Sù gi, tengmán lhê; nungmoq gi, Yhang lé a sé kôlhang, ²⁹ Ngò gi, Yhang lé sê lhê; hkâsu mù gâ le, Ngò gi, Yhâng chyáng mai lé é sù eq Yhang mai nhang kat é sù nghut lhê." gâ ri.

³⁰ Haû mù, yhangmoq gi, Yhang lé chyup râ dâ akô; nghut kôlhang, Yhâng é ahkýng a jé shi é yanmai, Yhang lé chyup râ matú, ó yuq le loq a jé kó nghut ri. ³¹ Nghut kôlhang, byù hpûng hkaû mâ é bang myo myo gi, Yhang lé lumjîng bûm kôluí, "Haû Hkrisduq jé lé é hkûn, Yhang gi, shí yuq htoq má, limik kumlhá pé je wó kut shit râ lhú?" ga taí bum akô nghut ri.

³² Haû Hparishe pé gi, haû byù hpûng hkaû má, Yesuq eq sêng é hkyô lé, haû su ga dangsoq soq

lhûm nyi kô é hkyô lé wó gyô yu akô. Haû mù, haû hkyangjong agyi pé eq Hparishe pé gi, Yhang lé ê chyup râ matú, noqkuq yhûm zúng é bang lé nhang kat akô.

³³ Haú hkûn, Yesuq gi, "Ngò gi, nungmoq eq rahá rayoq zo za nyi râ nghut lhê; hau htâng, Ngo lé nhang kat Su chyáng taû ló râ nghut lhê. ³⁴ Haú hkûn, nungmoq gi, Ngo lé hô kôlhang, myang hô kó râ a nghut; Ngò nyi é jang má, nungmoq wó jé kó râ a nghut." ga taí ri.

³⁵ Hau é yanmai, Yudaq byu pé, rayuq eq rayuq taí lhum kô é gi, "Shí yuq gi, Yhang lé nga-nhúng a myang hô loshoq, hká shut e byuq râ dâ lhê l hú? Yhang gi, Grik byu pé má nyi byo myín tô é nga-nhúng é byu pé nyi é jowò má ê mù, Grik byu pé lé, ê mhoqshit râ dâ lhê l hú? ³⁶ 'Nungmoq gi, Ngo lé hô kôlhang, myang hô kó râ a nghut.' gâ é eq, 'Ngò nyi é jang má, nungmoq wó jé kó râ a nghut.' gâ é, Yhang taí é dang gi, haí jung wá gá naû é nghut lhê l hú?" gâ akô.

³⁷ Haû lô htâng é eq je ahkyak é Poí buinyi má, Yesuq toq yap luí, htê mó èq taí é gi, "Wuì shit sù gi, Ngá chyáng lé mù, shuq sháng gaq. ³⁸ Ngo lé lumjíng é sù ó yuq nghut kôle, haû Chyúmdang má taí tô é eq rajung za, 'Yhâng chyáng mai asak uchyâm é wuìlàng yui htoq lô râ nghut lhê.'" gâ ri. ³⁹ Yhang haû su gâ é gi, Yhang lé lumjíng é bang myang hap yù râ nghut é, haû Woi-nyí lé taí é nghut ri. Haú hkûn jé shoq, haû Woi-nyí lé a byi kat shi nghut ri. Hkâsu mù gâ le, Yesuq gi, hpungwup shingkang dan hû é a hui nhâng shi é yanmai nghut ri.

⁴⁰ Yhâng é dang pé lé wó gyo kôjáng, ra-am gi, "Shí yuq gi, gè gè yhang, Myiqhtoi haú nghut ri." ga taí akô.

⁴¹ Ra-am gi, "Shí yuq gi, Hkrisduq nghut ri." ga taí akô. Góbang nghut jáng, "Hkrisduq wá Galile mau mai htoq lé râ nghut lhê lhú? ⁴² Haú Chyúmdang má, Hkrisduq gi, Dawiq é awut ashín má é nghut luí, Dawiq nyi laí lo é Betlehem wà mai htoq ló râ nghut lhê gâ é, a nghut lhú?" ga myí bum akô nghut ri. ⁴³ Haú mù luí, Yesuq é yanmai, shiwa byu pé gi, gàm hkoq lò byuq bekô nghut ri. ⁴⁴ Ra-am gi, Yhang lé chyup yù nau bùm kôlhang, Yhang lé loq a záng kó nghut ri.

Yudaq Byu Pé Lé Shuî U É Bang A Lumjîng Kô É Hkyô

⁴⁵ Hau htâng má, haú noqkuq yhûm zúng bang gi, haú hkyangjong agyi pé eq Hparishe pê chyáng taú ló kô é hkûn, haú bang gi, yhangmoq lé, "Nungmoq, haí mù luí, Yhang lé a shuî lo kô é lhú?" ga lhom myí akô.

⁴⁶ Haú hkûn, haú noqkuq yhûm zúng bang gi, "Shí yuq su ga taí é byù gi, ó le a nyi wú é nghut lhê." ga taí kyô akô.

⁴⁷ Haú mù, haú Hparishe pé gi, "Nungmoq lé le, Yhang èq mhoq hpyoq yù bekô lhú? ⁴⁸ Haú zaú wui chyáng le, Hparishe pê chyáng le, Yhang lé lumjîng é byù bò akô lhú? ⁴⁹ A bò! Nghut kôlhang, haú jep é tarâ lé a sê é byù moq mó shî gi, nhîng pyâm é hui bekô nghut ri." ga nhik-yô é đông tû taí kat akô nghut ri.

⁵⁰ Nghut kôlhang, yhangmoq hpúng má bo é, hí hkûn Yesuq chyáng e wú bê sù nghut é, Nikodimu

gi, ⁵¹ "Nga-nhúng é tarâ gi, byù rayuq lé, yhâng é dang hí a gyô wú é eq, yhang haî kut é lé a sê e za, mara byi lhê lú?" ga, yhangmoq lé myî ri.

⁵² Haú hkûn, yhangmoq gi, "Nàng le, Galile mau byù nghut lhê lú? Galile mau mai myiqhtoi rayuq lháng a htoq é hkyô lé, nàng gon wú aq, haû jáng sé râ nghut lhê." ga tû taî akô.

⁵³ Hau htâng, yuq hkanmó gi, ó le ô yhûm shut taû ló byuq bùm bekô nghut ri.*

8

Yesuq Lé, Lé Myî Chyam Wú Kô É Hkyô

¹ Yesuq kúm gi, Tsanlun Bùm shut e ló bê nghut ri. ² Htang napkyó napsûn noq le, Yesuq gi, no-
qkuq yhûm wàng hkaû má dum ê luî, byu pé
lhunglháng gi, Yhâng é lhîngkyuq má lé zîng bum
akô; haû mù, Yhang gi, zung to luî, yhangmoq
lé mhoqshit ri. ³ Haú hkûn, haû tarâ sará pé eq
Hparishe pé gi, sulàng shut nyi é má myang chyup
yu é su-myi rayuq lé shuî lé lô kômù, gung gûng má
shap to kôluî, ⁴ Yesuq lé, "Sará ê, myiwe myhí shî
lé, sulàng shut nyi é má myang chyup yu é nghut
lhê. ⁵ Haû Mosheq é tarâ má gi, shî su é myiwe
lé, luqgok èq dú sat pyám keq ga, nga-nhúng lé
hkunmó hkyô tô ri. Ahkuî, Nàng gi, hkâsu nghû
râ lú?" ga myî akô. ⁶ Yhangmoq haû su ga myî é
hkyô gi, Yhang lé mara wó hûn shoq ga, chyam wú
râ matú nghut ri.

Nghut kôhang, Yesuq gi, ngóm mù, myigùng má
loqnyhuî èq htaû kê nyi ri. ⁷ Yhang lé, yhangmoq

* **7:53** Yohan Laiká 7:53 mai 8:11 jé shoq gi, chyúmding axau myo myo má a bo é nghut lhê.

ru jang myî nyi kô é hkûn, Yhang gi, yap nyhang kat mù, yhangmoq lé, "Nungmoq mâ é mara a wó é sù hí, myiwe myhí shí yuq lé luqgok èq dú sháng gaq." ga taî ri. ⁸Hau htâng, Yhang gi, dum ngóm luî, myigùng má kê nyi ri.

⁹Yhangmoq gi, haû su gâ é lé wó gyo kôjáng, je mang bang mai hî luî, rayuq htâng rayuq ló byuq bekô nghut luî, Yesuq baú za myit gyó tô é eq, myiwe myhí haû jâng yap nân tô ri. ¹⁰Yesuq gi, yap nyhang kat luî, yhang lé, "Myiwe myhí ê, yhangmoq hká ló bekô lhú? Ó yuq èq le, nàng lé mara a byi kó lhú?" ga myî ri.

¹¹Yhang gi, "Yhumsîng ê, ó yuq le mara a byi kó nghut ri." ga tû taî ri.

Haú hkûn, Yesuq gi, "Ngò le, nàng lé mara a byi, ló aq hkoi, ahkuî mai mara hkâdum kut shut lo." ga taî kat ri.

Yesuq, Mingkân É Maubó

¹²Yesuq gi, shiwa byu pé lé dum nyo é hkûn, "Ngò gi, mingkân é maubó nghut lhê; Ngá htâng châng é sù ó yuq nghut kôle, mauchut hkaú má hkâ-nhám le so râ a nghut, asak maubó lé wó râ nghut lhê." ga taî ri.

¹³Haû mù, haû Hparishe pé gi, "Wú aq, Náng gûng Náng saksé hkâm yu é nghut ri; Náng é saksé gi, teng râ a nghut." ga taî akô.

¹⁴Haú hkûn, Yesuq gi, "Ngá gûng Ngò saksé hkâm kôlhang, Ngá é saksé gi, têng lhê; hkâsu mù gâ le, Ngò gi, Ngò hkâmai lé lo é eq Ngò hká shut e ló é lé, sê lhê. Nghut kôlhang, nungmoq gi, Ngò hkâmai lé lo é lé le, Ngò hká shut e ló é lé le, a sé kó nghut ri. ¹⁵Nungmoq gi, byù hkyam dông za jéyáng akô;

Ngò gi, ó yuq lé le a jéyáng é nghut lhê. ¹⁶ Nghut kôlhang, Ngò jéyáng é nghut jáng, Ngò jéyáng é hkyô gi, jô lhê; hkâsu mù gà le, Ngò gi, Ngò baú a nghut, haû Ngo lé nhang kat é sù Íwa eq rahá nghut nyi lhê. ¹⁷ Haû nungmoq é tarâ má yhang le, í yuq mai hkâm é saksé gi, têng lhê ga kê tô ri. ¹⁸ Ngò gi, Ngá é matú saksé hkâm yù sù nghut lhê; hau htoq agó, haû Ngo lé nhang kat é sù Íwa le, Ngá é matú saksé hkâm byî é nghut lhê." ga tû taî ri.

¹⁹ Haû mù, yhangmoq gi, Yhang lé, "Náng Wa gi, hkâmá lhú?" ga myi kêjáng, Yhang gi, "Nungmoq gi, Ngo lé le, Ngá Wa lé le, a sé kó nghut ri; nungmoq, Ngo lé sé kê é nghut le gi, Ngá Wa lé le, sé kó râ nghut lhê." ga tû taî ri. ²⁰ Dang haú pé gi, haû noqkuq yhûm wàng hkaû mâ é alu kat jang nàm má, Yhang mhoshit nyi é u lé taî é dang nghut ri. Nghut kôlhang, Yhang lé, ó yuq le a chyup kó; hkâsu mù gà le, Yhâng é ahkýng a jé shi é yanmai nghut ri.

²¹ Haû mù luí, Yesuq gi, yhangmoq lé, "Ngò gi, ló byuq râ nghut lhê, haú hkûn, nungmoq Ngo lé hô kó râ, yhumsing é mara má le shî kó râ nghut lhê. Ngò ló é jang má, nungmoq wó jé kó râ a nghut." ga, radàm dum puq taî ri.

²² Hau é yanmai, haû Yudaq byu pé gi, "'Ngò ló é jang má, nungmoq wó jé kó râ a nghut.' gà é gi, Yhânggùng yhang sat shî râ gà é nghut lhê lhú?" ga myi bum akô.

²³ Nghut kôlhang, Yesuq xoq taî é gi, "Nungmoq gi, a-ô mai lo é bang nghut akô; Ngò gi, ahtoq mai lé é sù nghut lhê. Nungmoq gi, mingkan shî eq sêng é bang nghut akô; Ngò kúm gi, mingkan shî eq sêng

é sù a nghut. ²⁴ Haû mù, nungmoq gi, yhumsing é mara má shî kó râ nghut lhê nghû, Ngò taí é nghut lhê. Ngò gi, haú Yuq nghut lhê nghû taí é lé, nungmoq a lumjîng kô é nghut jáng, nungmoq gi, gè gè yhang, yhumsing é mara má shî kó râ nghut lhê." gâ ri.

²⁵ Haú hkûn, yhangmoq gi, "Nàng, ó yuq nghut lhê?" ga myi kôjáng, Yesuq gi, "Ngò ó yuq nghut é lé, Ngò, hkâ-nhám le taí nyî bê nghut lhê. ²⁶ Ngò gi, nungmoq eq séng luî, taí râ hkyô eq jéyáng râ hkyô, myo myo joq lhê. Nghut kôhang, Ngo lé nhang kat é Sù gi, tengmán é Sù nghut lhê mù, Yhâng chyáng mai wó gyô yu é gû lé, Ngò, mingkan lé taí kyô lhê." ga tû taí ri.

²⁷ Yesuq gi, yhangmoq lé, Yhâng Wa eq sêng é hkyô taí kyô nyî é lé, yhangmoq gi, a sê gyo kó nghut ri. ²⁸ Haû mù luî, Yesuq gi, "Haû Byu Yhangzo lé nungmoq tu shap* kat é hkûn sheq, Ngò gi, haú Yuq nghut é hkyô lé le, yhumsing myit dông haí le a kut e za, haú Íwa mhoq byí é dông za taí é hkyô lé le, nungmoq sé kó râ nghut lhê. ²⁹ Haû Ngo lé nhang kat é Sù gi, Ngò eq rahá nghut nyî lhê; Ngò gi, hkâ-nhám le, Yhang lé myit ngón nhang é hkyô chyat kut é yanmai, Yhang gi, Ngo lé baú za a tô pyâm to nghut ri." ga taí ri. ³⁰ Yhang, haú su taí nyî é u lé lháng, byù myo myo gi, Yhang lé lumjîng bûm bekô nghut ri.

Abraham É Awut Ashín Pê Hkyô

³¹ Haû mù, Yesuq gi, Yhang lé lumjîng é Yudaq byu pé lé, "Ngò mhoqshit é hkyô lé châng kut nyî

* **8:28** Tu shap gâ é lichyúm gi, tapzîng htoq má jén sat pyám râ gâ é nghut lhê.

bekô nghut jáng, nungmoq gi, gè gè yhang, Ngá é chángzô pé nghut bekô. ³² Nungmoq gi, haû tengmán hkyô lé sé kó râ nghut luí, haû tengmán hkyô gi, nungmoq lé lhoq lhut kat râ nghut lhê." ga taí ri.

³³ Haû hkûn, yhangmoq gi, "Ngamoq gi, Abraham é awut ashín pé nghut luí, ó yuq é jùn le hkâ-nhám a dut wú é nghut lhê. Haû mù, 'nungmoq lé lhoq lhut kat râ' nghû Nàng hkâsu kut wó taí lhê lú?" ga tû taí akô.

³⁴ Yesuq dum tû taí é gi, "Ngò, nungmoq lé teng za taí kôlé, mara kut shut é sù gi, marâ é jùn nghut lhê. ³⁵ Jùn gi, yhûm ikun eq hkâ-nhám le sêng nyi râ a nghut; zo kúm gi, ikun eq ahtum abyuq sêng lhê. ³⁶ Haû mù luí, haû Zo gi, nungmoq lé lhoq lhut kat é nghut jáng, nungmoq gi, gè gè yhang, lut berâ nghut lhê. ³⁷ Nungmoq gi, Abraham é awut ashín pé nghut é lé, Ngò sê lhê. Nghut kôlhang, nungmoq gi, Ngá é dang lé a lhom yù kô é yanmai, Ngo lé sat râ dâ akô nghut ri. ³⁸ Ngò gi, Ngá Wâ chyáng mai myang yu é eq rajung za, nungmoq lé taí kyô nyi lhê; nungmoq le, nungmoq é îwa chyáng mai wó gyô yu é eq rajung za kut nyi akô nghut ri." gâ ri.

³⁹ Haû hkûn, yhangmoq gi, "Ngamoq é îwa gi, Abraham nghut lhê." ga tû taí kôjáng, Yesuq gi, "Nungmoq, Abraham é yhangzô pé nghut é nghut le gi, Abraham kut é su kut kó râ nghut lhê. ⁴⁰ Nghut kôlhang, nungmoq gi, haû Garai Gasâng chyáng mai wó gyô yu é tengmán hkyô lé taí kyo sù nghut é Ngo lé, sat pyám nau akô nghut ri. Haû sù é hkyô gi, Abraham a kut é nghut lhê. ⁴¹ Nungmoq gi, nungmoq é îwa kut é muzó lé yhang, kut nyi

akô." ga taî ri.

Haú hkûn, yhangmoq gi, "Ngamoq gi, dezo amyû a nghut; ngamoq gi, Íwa rayuq za wó lhê; haú gi, Garai Gasang nghut lhê." ga taî he akô nghut ri.

Zô Wui É A-kyang Gi, Mó Ó Nghut É Hkyô Shit

⁴² Yesuq gi, yhangmoq lé, "Garai Gasang gi, nungmoq é Íwa nghut é nghut jáng, nungmoq gi, Ngo lé chyitdap kó rá nghut lhê; hkâsu mù gâ le, Ngò gi, Garai Gasang chyáng mai lé jé luí, ahkuí, shí má nyi tô é nghut lhê. Ngò gi, Ngá myit dông lé lo é a nghut, Yhang sheq Ngo lé nhang kat é ru nghut lhê. ⁴³ Nungmoq gi, haí mù Ngá é dang lé a sê gyo kô é lhú gâ le, Ngò taî é dang lé, nungmoq a wó lhom yù kô é yanmai nghut ri. ⁴⁴ Nungmoq gi, haú nungmoq é íwa nghut é nat Tsadán eq sêng é bang nghut luí, nungmoq é íwa ô nau é hkyô lé kut nau bum akô. Yhang gi, a-nham sâng-hi mai byù sat sù nghut ri. Yhang má tengmán hkyô a bo é yanmai, yhang gi, haú tengmán hkyô má a yap gîng nyi nghut ri. Yhang gi, mhaú é hkûn, yhang é myit má bo é dông taî ri; hkâsu mù gâ le, Yhang gi, byù mhaú nghut luí, mhaú hkyô pê é íwa nghut ri. ⁴⁵ Haú su mù, Ngò, nungmoq lé, haú tengmán hkyô taî kyô é yanmai, nungmoq gi, Ngo lé a lumjîng kó nghut ri. ⁴⁶ Nungmoq mâ é ó yuq wá, Ngo lé mara bo lhê nghû saksé wó tân shit akô lhú? Ngò gi, haú tengmán hkyô lé taî nyi é nghut le nhîng, nungmoq, Ngo lé haí mù a lumjîng kô é lhú? ⁴⁷ Garai Gasang eq sêng é sù gi, Garai Gasang taî é dang lé gyô lhê. Nungmoq a gyo kô é gi, nungmoq,

Garai Gasang eq a séng kô é yanmai nghut ri." ga taí ri.

Yesuq Eq Abraham

⁴⁸ Haú hkûn, haú Yudaq byu pé gi, Yhang lé, "Nàng gi, Samariq byù nghut é htoq agó, nat gang wang júng to sù nghut lhê nghû, ngamoq taí é dang gi, jô lhê a nghut lhú?" ga myí akô.

⁴⁹ Yesuq gi, "Ngò gi, nat gang wang júng é hui sù a nghut; Ngò gi, Ngá Wa lé sheq hkunggâ é ru nghut lhê; nungmoq kúm gi, Ngo lé taí hpoí nyi akô nghut ri. ⁵⁰ Ngò gi, Ngá é matú aróng ho nyi é a nghut; nghut kôlhang, hô byi Sù rayuq nyi lhê, haú yuq jéyáng sháng gaq. ⁵¹ Ngò, nungmoq lé teng za taí kôlé, Ngá dang lé châng é sù gi, hkâ-nhám le, shî râ a nghut." ga taí ri.

⁵² Hau é yanmai, haú Yudaq byu pé gi, "Nàng gi, nat gang wang júng to sù nghut é lé, ahkuí, ngamoq sé bê! Abraham gi, shi byuq bê; haú myiqhtoí pé le, shi byuq bekô nghut ri; nghut kôlhang, Nàng gi, 'Ngá dang lé châng é sù gi, hkâ-nhám le, shî râ a nghut.' ga taí ri. ⁵³ Nàng gi, ngamoq é îwa Abraham htoq hkik lhê lhú? Yhang gi, shi byuq bê; haú myiqhtoí pé le, shi byuq bekô nghut ri. Náng gûng nàng ó yuq su ngàm lhê lhú?" ga taí akô.

⁵⁴ Yesuq gi, "Ngá gûng Ngò lhoq gyaú yu é nghut jáng, Ngá é aróng gi, hai hpaudap é a nghut; nghut kôlhang, haú nungmoq é Garai Gasang nghut lhê ga nungmoq taí é sù, Ngá Wa gi, Ngo lé lhoq gyaú é sù ru nghut lhê. ⁵⁵ Nungmoq gi, Yhang lé a sé kó nghut ri; nghut kôlhang, Ngò gi, sê lhê. Yhang lé a sé nghû Ngò taí é ru nghut le gi, Ngò le nungmoq su byù mhaú dut râ nghut lhê; nghut kôlhang, Ngò

gi, Yhang lé sé luí, Yhâng é dang gyo sù nghut lhê.
⁵⁶ Nungmoq é îwa Abraham gi, Ngo lé râ buinyì lé myoqbyu gabú nyi é nghut luí, myàng mù, gabú bê nghut ri." ga tû taí ri.

⁵⁷ Haú hkûn, haú Yudaq byu pé gi, Yhang lé, "Nàng gi, asak ngo xê zàn lhang a nghut shî é nhîng, Abraham lé myàng wú é nghut lhê l hú?" ga taí akô.

⁵⁸ Yesuq gi, "Ngò, nungmoq lé teng za taí kôlé, Abraham lhang a hkû shi má, Ngò nyi gù bê nghut lhê." ✧ ga tû taí ri. † ⁵⁹ Haú mù luí, yhangmoq gi, Yesuq lé, dú râ ga luqgok kui yu akô; nghut kôlhang, Yesuq gi, haú noqkuq yhûm mai haq htoq ló byuq bê nghut ri.

9

Myoqjit Sù Lé Lhoq Gê Byî É Hkyô

¹ Yesuq gi, sô yông ló nyi é u lé, hku lé é mai myoqjit to gù nghut é byù rayuq lé myang ri. ² Haú hkûn, Yhâng é chángzô pé gi, Yhang lé, "Rabai ê, shí yuq, myoqjit gù hku lé é gi, ó yuq kut shut é yubak é yanmai nghut lhê l hú? Yhang kut shut é l hú? A nghut jáng, yhâng nu yhâng wa kut shut é l hú?" ga myî akô.

³ Yesuq tû taí é gi, "Haú gi, yhang kut shut é yanmai le a nghut, yhâng nu yhâng wa kut shut é yanmai le a nghut; haú Garai Gasâng é muzó lé, yhang má wó lhoq htoq shit râ matú, haú dut é ru nghut lhê. ⁴ Nga-nhúng gi, haú Ngo lé nhang kat Su é muzó lé, nyí nghut tô ashî hkûn, zui saí nyi ra râ dut lhê; myín jé jáng gi, ó yuq le, mù wó zui saí râ

✧ **8:58** Htoq Ló 3:14 † **8:58** Bun zo shî má, Yesuq gi, Yhânggùng yhang Garai Gasang nghut lhê gâ nyi nghut ri.

a nghut. ⁵ Ngò gi, mingkan htoq má nyi tô é u lé, mingkân é maubó nghut lhê." gâ ri.

⁶ Yhang gi, haû su ga taí luí, myigùng má sôkan byé hkyó mù, tse-nyhaq saí yù luí, haú yuq é myoqjí má but byí ri. ⁷ Hau htâng, haú yuq lé, "Haú Siloam wuìhtum má ê chí pyám aq." ga taí ri. (Siloam gâ é gi, nhang é gâ é lichyúm nghut lhê.). Haû mù, haú yuq gi, ê chí mù, myoq myàng luí, yhûm shut ló bê nghut ri.

⁸ Haû yhâng é yhumkyo bang eq yhang dung zô wún é lé myang wú é bang gi, "Shí yuq gi, haû zung to mù, dung zo zo lhaq kut é sù, a nghut kó lhú?" ga myí bum akô. ⁹ Ra-am gi, "Haú yuq nghut lhê." gâ bum akô.

Góbang gi, "A nghut, haú yuq su dut e za ru nghut lhê." ga taí akô.

Nghut kôlhang, yhang gi, "Ngò, haú yuq yhang nghut lhê." ga taí ri.

¹⁰ Haú hkûn, yhangmoq gi, "Haû nghut le gi, náng myoq hkâsu kut wó myang é lhú?" ga myí akô.

¹¹ Yhang gi, "Haû Yesuq gâ é byù rayuq, tse-nyhaq ratsuí saí yù luí, ngá é myoqjí má but byi mù, 'Siloam wuìhtum má ê chí pyám aq.' ga ngo lé taí ri; haû mù, ngò ê chí pyâm é htâng má, ngá myoq wó myang é nghut lhê." ga tû taí ri.

¹² Haú hkûn, yhangmoq gi, "Byù haú yuq gi, hkâmá nyi ri lhú?" ga, yhang lé myí akô.

Yhang gi, "Ngò a sé." ga taí ri.

Myoq Dum Myang Byuq É Hkyô Lé, Hparishe Pé Gôn Wú É Hkyô

13 Yhangmoq gi, haû myoqjit wú bê sù lé, Hparishe pé chyáng shuí lé akô. 14 Yesuq, tse-nyhaq saí yù mù, haú yuq é myoq lé lhoq myâng byî é buinyì gi, Bánno buinyì nghut ri. 15 Haû mù, yhang, myoq hkâsu kut wó myang é hkyô lé, haû Hparishe pé le dum myî akô. Haû jáng, yhang gi, "Haú yuq gi, ngá é myoqjí má tse-nyhaq but byi mù, ngò gi, é chí pyám jáng, ngá myoq myàng bê nghut lhê." ga tû taí ri.

16 Haû Hparishe pé ra-am gi, "Shí yuq gi, Bánno buinyi é tarâ lé a châng é sù nghut é yanmai, Garai Gasâng chyáng mai lé é sù a nghut." ga taí akô.

Nghut kôlhang, ra-am gi, "Yubak dap sù rayuq gi, haû su é limik kumlhá pé lé, hkâsu wó kut htoq râ lhú?" ga myî akô. Haû mù, yhangmoq gi, myit a huî lhum bùm lò kó nghut ri.

17 Haû mù, yhangmoq gi, haû myoqjit wú sù shut lhíng mù, "Nang lé myoq lhoq myâng byî é sù gi, hkasû é byù nghut lhê nghû, nàng taí râ lhú?" ga dum myi kôjáng, "Yhang gi, myiqhtoi rayuq nghut ri." ga, yhang tû taí ri.

18 Haû Yudaq byu pé gi, haú yuq myoqjit wú é hkyô lé le, ahkuí myoq dum myàng bê nghut é hkyô lé le, haû yhâng nu eq yhâng wa lé, é ji lò nhang é hkûn jé shoq, a lumjíng kó nghut ri.

19 Haû mù, Yhangmoq gi, haû yhâng nu eq yhâng wa lé, "Shí yuq gi, nungnhik é yhangzo nghut lhê lhú? Hku lé é hkûn mai, myoqjit gù nghut lhê lhú? Yhang, ahkuí, hkâsu kut wó myang é lhú?" ga myí akô.

20 Haú hkûn, yhâng nu eq yhâng wâ nhik gi, "Yhang gi, ngá-nhik é yhangzo nghut é lé le, hku lé é hkûn mai myoqjit gù nghut é lé le, ngá-nhik sê

lhê. ²¹ Nghut kôlhang, yhang, ahkuî hkâsu kut wó myang é hkyô lé le, yhâng é myoq lé ó yuq èq lhoq myâng byî é hkyô lé le, ngá-nhik a sé. Yhang, asak wáng bê, yhang lé myí wú keq, yhânggùng yhang dat taí kyo râ nghut lhê." ga tù taí akô. ²² Haû yhâng nu eq yhâng wâ nhik gi, Yudaq byu pé lé gyuq kô é yanmai, haû su ga taí kô é nghut ri; hkâsu mù gâ le, Yesuq gi, haû Hkrisduq nghut lhê ga yín yu é sù, ó yuq lé nghut kôle, haû tarajong mai lhoq htoq pyám râ nghut lhê ga, haû Yudaq suwún wuî chôm myit hpyit to bekô nghut é yanmai nghut ri. ²³ Hau é yanmai, yhâng nu eq yhâng wâ nhik gi, "Yhang, asak wáng bê, yhang lé myí wú keq." ga taí kô é nghut ri.

²⁴ Haû Hparishe pé gi, myoqjit wú bê sù haú yuq lé dum ji yù mù, "Garai Gasang lé za hkya-on waq toq aq! Haú yuq gi, yubak dap sù rayuq nghut é lé ngamoq sê lhê." ga taí akô.

²⁵ Haú hkûn, yhang tù taí é gi, "Yhang gi, yubak dap sù rayuq nghut lhê luq, a nghut é luq, ngò a sé. Ngò gi, hí lé myoqjit sù nghut kôle, ahkuî wó myâng bê nghut é lé za, ngò ru sê lhê." gâ ri.

²⁶ Hau htâng, yhangmoq gi, "Yhang, nang lé haí kut byî ri lú? Náng é myoq lé, yhang, hkâsu kut lhoq myâng byî ri lú?" ga, yhang lé myí akô.

²⁷ Haú hkûn, yhang gi, "Ahkuî za, ngò, nungmoq lé taí kyo bê le, nungmoq sheq a gyo kôluî nhîng! Nungmoq gi, haí mù dum gyô nau akô lú? Nungmoq le, Yhâng é chángzô pé dut nau akô lú?" ga taú myí ri.

²⁸ Haû mù, yhangmoq gi, yhang lé gyaí rhoi é dông mai, "Nàng gi, haú yuq é chángzo nghut ri-

nhung! Ngamoq kúm gi, Mosheq é chángzô pé ru nghut lhê! ²⁹ Garai Gasang gi, Mosheq lé dáng nyo é hkyô lé, ngamoq sê lhê; nghut kôlhang, haú yuq eq séng luí, Yhang gi, hkâmai lé é sù nghut é lé lhang, ngamoq a sé." ga taí akô.

³⁰ Haú hkûn, haú yuq gi, "Yhang, ngo lé myoq wó lhoq myang byi kôlhang, Yhang gi, hkâmai lé é sù nghut é lé, nungmoq a sé kô é gi, mauhpo yhang nghut bê! ³¹ Garai Gasang gi, yubak dap bâng é dang lé a gyo byí é hkyô lé, nga-nhúng sê lhê. Garai Gasang gi, Yhang lé noqkuq luí, Yhâng ô nau é hkyô lé, kut é sù é dang lé kúm gyo byí lhê. ³² Hku lé é hkûn mai myoqjit gù nghut é byù lé, ó yuq èq myoq lhoq myâng byí é gâ é hkyô lé, mingkan lé joq é hkûn mai, ó yuq le a wó gyô wú é nghut lhê.

³³ Haú yuq gi, Garai Gasâng chyáng mai lé é sù za a nghut le gi, haí le wó kut râ a nghut." ga tû taí ri.

³⁴ Haú su ga jáng, yhangmoq gi, "Nàng gi, yubak htui má hku lé é sù nghut to luí nhîng, ngamoq lé wám mhoqshit lhê lhú?" ga tû taí kôluí, yhang lé hkat htoq pyâm akô nghut ri.

Woi-nyí Má Myoqjit É Hkyô

³⁵ Yesuq gi, haú yuq lé yhangmoq hkat htoq pyâm é hkyô lé wó gyo luí, yhang lé myàng hui jáng, "Nàng gi, haú Byu Yhangzo lé lumjîng lhê lhú?" ga myí ri.

³⁶ Haú hkûn, haú yuq gi, "Yhumsîng ê, haú gi, ó yuq nghut lhê lhú? Yhang lé, ngò wó lumjîng sháng gaq, taí kyo laq." ga myí ri.

³⁷ Yesuq gi, "Nàng, haú yuq lé myàng wú bê nghut lhê; ahkuí, nàng eq dáng nyo nyi é sù gi, haú yuq yhang nghut lhê." ga taí ri.

38 Haû mù, haú yuq gi, "Yhumsîng ê, ngò lumjîng lhê!" ga taí luî, Yhang lé noqkuq ri.

39 Haú hkûn, Yesuq gi, "Haû myoqjit bang myoq myàng kó râ hkyô eq myoq myàng bang myoqjit kó râ hkyô lé, tarâ jéyáng râ matú, mingkan shî má Ngò jé lé é nghut lhê." ga tâ ri.

40 Yhang eq rahá nghut nyi é Hparishe pé ra-am gi, Yhang haû su ga tâi é lé wó gyo kôjáng, "Hkâsu htà? Ngamoq gi, myoqjit bang dut bê lhú?" ga myî akô.

41 Haú hkûn, Yesuq gi, "Nungmoq, myoqjit é bang ru nghut le gi, yubak mara a bò kó râ nghut lhê; nghut kôlhang, ahkuí, nungmoq gi, myoq myàng bang nghut lhê ga kô é yanmai, nungmoq má yubak mara bo ashî kó nghut ri.

10

Sau Zúng Sû Eq Sau Hpúng

1 Ngò, nungmoq lé teng za taí kôlé, haû sau hkup má, hkúmdong mai a wang e za, gó hkyô dông doq lut wang é sû gi, hkau sû eq damyaq nghut ri.

2 Haû hkúmdong mai wang é sû kúm gi, sau zúng sû nghut ri. 3 Haû hkum zúng sû gi, yhang lé hkum hpóng byî é htoq agó, haû sau pé gi, yhâng é htê lé gyo byî akô. Yhang gi, yhâng é sau pé lé, myìng lang luî wut yù mù, yhangmoq lé shuí htoq htoq kut nyi ri. 4 Yhâng é sau pé banshoq lé hpông htoq yù mù, yhang gi, hí má sô ri; sau pé gi, yhâng é htê lé sê gyo kô é yanmai, yhâng é htâng má châng akô nghut ri. 5 Nghut kôlhang, yhangmoq gi, byù bíng é htâng má, hkâ-nhám lháng cháng kó râ a nghut e za, yhâng chyáng mai kúm hpang byuq kó

râ nghut lhê; hkâsu mù gâ le, haû byù bíng é htê lé, yhangmoq a sê gyo kô é yanmai nghut ri." ga taí ri. ⁶ Yesuq gi, dangtú haû lé yù mù, yhangmoq lé taí kyô ri; nghut kôlhang, yhangmoq gi, Yhang haí taí kyô nyi é lé, a sê gyo kó nghut ri.

⁷ Haû mù, Yesuq dum taí é gi, "Ngò, nungmoq lé teng za taí kôlé, Ngò gi, haû sau pé wang é hkúmdong nghut lhê. ⁸ Ngá é hí má lé é lhunglhang bang gi, hkau bang eq damyaq pé nghut akô; haû sau pé kúm gi, yhangmoq é dang lé a lhom gyo byi kó nghut ri. ⁹ Ngò gi, hkúmdong nghut lhê; Ngò mai wang é sù ó yuq nghut kôle, hkyi yu é hui râ nghut lhê. Haú yuq gi, htoq htoq wàng wàng wó kut râ eq mhan-yô myang hô râ nghut lhê. ¹⁰ Haû hkau sù gi, hkau râ, sat râ eq lhoq htên pyám râ matú, lé e za nghut lhê. Ngo lé é gi, yhangmoq, asak wó yû râ eq byíngjup é asak lé wó yû râ matú sheq nghut lhê.

¹¹ Ngò gi, ge é sau zúng sù nghut lhê; haû ge é sau zúng sù gi, sau pé é matú, yhumsing é asak lé ap byi pyám é nghut lhê. ¹² Haû langchyang kut sù gi, sau pé lé sing é sau zúng sù a nghut; haû mù, yhang gi, haû wamhkui lé lo é lé myàng jáng, saû pé lé pyám to mù hfang ló byuq râ nghut lhê; haú hkún, wamhkui gi, sau hpúng lé ê htim luí, lhoq pyo pyám râ nghut lhê. ¹³ Yhang gi, langchyang hpó nghut luí, haû sau pé é matú haí le a myit chiq byí é yanmai, hfang é nghut ri.

¹⁴ Ngò gi, haû ge é sau zúng sù nghut lhê; haû Íwa gi, Ngo lé sê é nghut luí, Ngò le, haû Íwa lé sê é eq rajung za, ¹⁵ Ngá é sau pé lé, Ngò sê lhê; Ngá é sau pé le, Ngo lé sê akô nghut ri; Ngò gi, haû sau pé é

matú, yhumsing é asak lé ap byî pyâm é nghut lhê. ¹⁶ Ngò gi, sau hkup shî mâ é a nghut é gotù sau pé wó ashî; sau haú pé lé le, Ngò, shuí yù ra râ nghut lhê; sau haú pé le, Ngá é htê lé gyo kó râ nghut lhê; haú hkûn, sau hpúng rahpúng za dut luí, sau zúng sù le rayuq za, nghut râ nghut lhê. ✧ ¹⁷ Ngò gi, Ngá é asak lé dum wó taú yù sháng gaq nghû, yhumsing é asak lé ap byî pyâm é yanmai, Ngá Wa gi, Ngo lé chyitdap é nghut lhê. ¹⁸ Ngá é asak lé, ó yuq eq le wó yu pyâm é a nghut, Ngá é myit dông byi pyâm é ru nghut lhê. Ngò gi, yhumsing asak lé ap byi pyám rà ahko ahkáng eq haú lé dum taú yù rà ahko ahkáng wó sù nghut lhê. Haú gi, Ngá Wâ chyáng mai Ngò wó yu é hkunmó nghut lhê." gâ ri.

¹⁹ Dang haú pê é yanmai, haú Yudaq byu pé gi, myit a huí lhum dum dut byuq bekô nghut ri.

²⁰ Haú mâ é bang myo myo gi, "Yhang gi, nat gang wang júng to luí, nâ byuq bê nghut ri. Yhâng é dang lé, haí mù gyô nyi akô lú?" ga taí bum akô.

²¹ Nghut kôhang, góbang gi, "Dang shi pé gi, nat gang wang júng tô é byù taí é dang a nghut. Nat gang gi, myoqjit sù lé, myoq wó lhoq myâng nhâng rà lú?" ga taí bum akô nghut ri.

Yudaq Byu Pé A Lumjǐng Kô É Hkyô

²² Yerusalem wà mó má, Ap Nóng Poi* jé bê nghut ri. Haú gi, gyoqmyò nám nghut ri. ²³ Haú hkûn, Yesuq gi, haú noqkuq yhûm wàng mâ é, Sholumon é Jirop má sô yông wún ri. ²⁴ Haú u lé, haú Yudaq byu pé gi, Yhâng é lhǐnghkyuq má lé zǐng bùm kômù, "Nàng gi, ngamoq lé hkâ-myháng

✧ **10:16** Esai 56:8 * **10:22** Ap Nóng Poi gâ é gi, Garai Gasâng é yhûm lé ap nóng lé gâ lhê.

jé shoq úng-áng nhang nyi râ lúh? Nàng, Hkrisduq nghut le gi, ngamoq lé san za taí kyô pyám laq." ga taí akô.

²⁵ Yesuq gi, "Ngò, nungmoq lé taí kyo bê nghut lhê; nghut kôlhang, nungmoq a lumjínq kó nghut ri. Ngá Wá é myìng mai, Ngò kut é laklaí kumlhá haú pé gi, Ngá é matú saksé hkám byi nyi ri.

²⁶ Nghut kôlhang, nungmoq gi, Ngá é sau a nghut kô é yanmai, a lumjínq kó nghut ri. ²⁷ Ngá é sau pé gi, Ngá é htê lé dat gyô akô; Ngò gi, yhangmoq lé sê lhê; yhangmoq le, Ngá htâng châng akô nghut ri. ²⁸ Ngò gi, yhangmoq lé, ahtum abyuq é asak byi é nghut mù, yhangmoq gi, hkâ-nhám le htên byoq kó râ a nghut; ó yuq èq le, yhangmoq lé, Ngá é loq mai wó lú yû râ a nghut. ²⁹ Yhangmoq lé, Ngá é loq má ap byi tô é sù, haú Ngá Wa gi, lhunglhang htoq má je gyaú Sù nghut lhê; ó yuq èq le, yhangmoq lé, Ngá Wá é loq mai wó lú yû râ a nghut. ³⁰ Ngò eq haú Îwa gi, rayuq za nghut lhê." ga tû taí ri.

³¹ Haú hkûn, haú Yudaq byu pé gi, Yesuq lé, dú râ matú luqgok dum kui akô. ³² Nghut kôlhang, Yesuq gi, yhangmoq lé, "Haú Îwâ chyáng mâ é laklaí kumlhá mó pé myo myo, Ngò, nungmoq lé tûn shit bê nghut lhê. Nungmoq, Ngo lé dú râ gi, hká lhûm é yanmai nghut akô lúh?" ga myi ri.

³³ Haú Yudaq byu pé gi, "Ngamoq, Nang lé dú râ gi, haú pé hká lhûm é yanmai le a nghut; Nàng gi, byù rayuq nghut to lúí, Garai Gasang nghut é đông taí whuí lúí, Yhang lé rhoi dang taí é yanmai, dú râ nghu lhê." ga tû taí akô.

³⁴ Haú hkûn, Yesuq gi, yhangmoq lé, "Nungmoq

gi, garaî pé nghut akô nghû, Ngò taí bê nghut lhê. [☆]
 ga nungmoq é tarâ má kâ to lhê a nghut kó lú? ³⁵
 Chyúmdang haû lé gi, a ge lhoq hpyoq pyâm é
 nghut luî, haû Garai Gasâng é mungdang lé wó yu
 é bang lé, 'garaî pé' gâ é nghut le gi, ³⁶ haû Íwa
 mai, Yhang é matú hkyin htoq yû luî, mingkan
 má nhang é Sû eq séng luî gi, hká dông nghû kó
 râ lú? 'Ngò gi, Garai Gasâng é Yhangzo nghut
 lhê.' nghû taí é yanmai, Ngò gi, Garai Gasang lé
 taí hpoî ri nghû, nungmoq, haû mù Ngo lé mara
 hûn akô lú? ³⁷ Ngá Wâ é muzó pé lé, Ngò kut é a
 nghut jáng, Ngo lé hkâlumjínng kó. ³⁸ Nghut kôlhang,
 Ngò, haû pé lé kut é nghut le gi, nungmoq, Ngo
 lé a lumjínng kôlhang, haû muzó pé lé lumjínng keq;
 haû hkûn, haû Íwa gi, Ngò má nghut nyi é hkyô
 lé le, Ngò gi, haû Íwa má nghut nyi é hkyô lé le,
 nungmoq wó sé luî, sê gyo kó râ nghut lhê." ga tú
 taí ri. ³⁹ Yhangmoq gi, Yhang lé chyup râ dum hen
 akô; nghut kôlhang, Yhang gi, yhangmoq é loq mai
 wó lut ló bê nghut ri.

⁴⁰ Hau htâng, Yesuq gi, haû Yodan làng he hpoq
 mâ é, Yohan, wui-myhup hkám byí hi é jowò má ló
 jé ri. Haû má, Yhang nyi nyi é nghut luî, ⁴¹ byù myo
 myo gi, Yhâng chyáng lé jé bum akô. Yhangmoq gi,
 "Yohan gi, limik kumlhá a kut wú é nghut kôlhang,
 shí yuq eq séng luî, Yohan taí é hkyô lhunglhang gi,
 têng ri." ga taí bum akô. ⁴² Haû jowò má, byù myo
 myo gi, Yesuq lé lumjínng bùm bekô nghut ri.

11

Lazaruq Shi Byuq É Hkyô

[☆] 10:34 Hkya-on 82:6

¹ Ahkuî, Lazaruq gâ é byù rayuq gi, no nyi ri. Yhang gi, haû Mariq eq yhângnhá Mahtaq nhik nyi é Behtani wà mâ é sù nghut lhê. ² Mariq haû gi, Yhumsîng lé namngón-xù hut gyun luî, hkyî má yhâng xam èq sùt byî é sù nghut ri; yhang gi, haû no nyi é Lazaruq é yhângnhá nghut ri. ³ Haû mù, haû yhângnhá nhik gi, "Yhumsîng ê, Nàng chyitdap é sù gi, no nyi ri." ga, Yesuq chyáng é taí nhang akô.

⁴ Yesuq gi, dang haû lé wó gyo jáng, "Nòhpyo haû gi, shî-nò a nghut. Haû Garai Gasâng é Yhangzo gi, hau é yanmai, hpungwup shingkang wó dan hú é hui sháng gaq ga, Garai Gasâng é hpungwup shingkang é matú dut é ru nghut lhê. ⁵ Yesuq gi, Mahtaq eq yhanggu Mariq lé le, Lazaruq lé le, chyitdap ri. ⁶ Haû su mù, Yhang gi, haû Lazaruq no nyi ri gâ é lé, wó gyô é hkûn, haû Yhang nyi é jowò má, í nyí nyi tô ashî nghut ri.

⁷ Hau htâng, Yhang gi, Yhâng é chángzô pé lé, "Nga-nhúng gi, Yuda mau shut dum taû ló sháng." ga taí ri.

⁸ Haú hkûn, yhangmoq gi, "Rabai ê, hkû-yoq za, haû Yudaq byu pé, Nang lé luqgok èq dú sat râ da kô é nghut le nhîng, ahkuî, haú shut dum taû ló râ lhú?" ga Yhang lé myî akô.

⁹ Yesuq gi, "Nyí gi, hkyíng hkum raxe í hkum bo lhê a nghut kó lhú?*" Nyí má hkyô sô é sù gi, mingkan shi é maubó é yanmai myoq myàng luî, lengbat râ a nghut. ¹⁰ Myín lé hkyô sô é sù kúm gi, maubó lé a wó é yanmai, lengbat lhê." ga tû taí ri.

* **11:9** Nyí gi, hkyíng hkum raxe í hkum bo lhê a nghut kó lhú? gâ é gi, ahkyíng a jé shimá, muzó nô é gi, a ge é nghut lhê gâ é nghut ri.

¹¹ Haû su ga taî é htâng má, Yhang, yhangmoq lé xoq taî kyô é gi, "Nga-nhông é luzúm Lazaruq yhup myhî byuq bê nghut ri; nghut kôlhang, Ngò gi, yhang lé ê nhaû toq râ nghut lhê." gâ ri.

¹² Haû hkûn, Yhâng é chángzô pé gi, "Yhumsîng ê, yhang yhup myhî tô é nghut le gi, ge lò râ nghut lhê." gâ taî akô. ¹³ Yesuq gi, Lazaruq shi byuq bê hkyô lé taî é nghut ri; nghut kôlhang, Yhâng é chángzô pé gi, gè gè yhup myhî tô é lé taî é su ngam pyâm akô nghut ri.

¹⁴ Haû mù luî, Yesuq, yhangmoq lé san za jáng taî kyô é gi, "Lazaruq gi, shi byuq bê nghut lhê. ¹⁵ Ngò haû má a nyi záng é gi, nungmoq wó lumjîng râ matú nghut luî, nungmoq é matú Ngò gabú byî ri; yhâng chyáng e ló sháng hkoi." gâ ri.

¹⁶ Haû mù, haû Zozûm le gâ é Htomaq gi, gotû chángzô pé lé, "Nga-nhông le, Yhang eq rahá shî sháng gaq, châng e ló sháng." ga taî ri.

Haû Ê-nhâ Nhik Lé, Yesuq Nhik Tîng É Hkyô

¹⁷ Yesuq gi, jé e é hkûn, haû Lazaruq lé lup má kat pyâm é myi nyi nghut bê hkyô lé, lhom taî kyô akô. ¹⁸ Behtani wà gi, Yerusalem wà mó eq í déng kô za wê lhûm ri. ¹⁹ Haû mù, Yudaq byu pé myo myo gi, Mahtaq eq Mariq nhik é yhanggu shi byuq é yanmai, nhik tîng byi kó râ ga lé jé nyi bum akô nghut ri. ²⁰ Mahtaq gi, Yesuq jé lé lo é hkyô lé wó gyo jáng, htoq ê mù, Yhang lé ê huî ri; nghut kôlhang, Mariq gi, yhûm má nyi tô ri.

²¹ Mahtaq gi, Yesuq lé, "Yhumsîng ê, Nàng, shî má nyi tô é ru nghut le gi, ngá gu shi byuq râ a nghut. ²² Nghut kôlhang, ahkuî le, Garai Gasâng

chýáng Nàng haî dung kôlhang, Yhang byi râ nghut é lé, ngò sê lhê." ga taî ri.

²³ Yesuq gi, yhang lé, "Nung gu, dum dui toq râ nghut lhê." ga taî ri.

²⁴ Haú hkûn, Mahtaq gi, "Haú jhtûm buinyî má dum dui toq é hkûn, yhang le dum dui toq râ nghut é lé, ngò sê lhê." ga tâ taî ri.

²⁵ Haú hkûn, Yesuq gi, yhang lé, "Ngò gi, dum dui toq hkyô eq asak nghut lhê. Ngo lé lumjîng é sù gi, shî byuq kôlhang, dum dui râ nghut lhê. ²⁶ Asak dui nyî luî, Ngo lé lumjîng é sù ó yuq nghut kôle, hkâ-nhám le shî é hui râ a nghut. Nàng gi, dang shî lé lumjîng lhê lhú?" ga taî ri.

²⁷ Haú hkûn, yhang gi, "Yhumsîng ê, ngò lumjîng lhê. Nàng gi, haú mingkan má jé lé lô râ nghut é, Garai Gasâng é Yhangzo, Hkrisduq† nghut é lé, ngò lumjîng lhê." ga, Yhang lé taî kyô ri.

²⁸ Yhang gi, haú su ga taî é htâng má, taû lô mù, yhanggu Mariq lé, tsik za wut yù luî, "Haú Sará jé tô ri; Yhang gi, nang lé myî nyi ri." ga taî kyô ri. ²⁹ Mariq gi, haú lé wó gyo jáng, hân za toq mù, Yesuq chyáng ê bê nghut ri. ³⁰ Haú u lé, Yesuq gi, haú wâ hkaû má a wang lô shî e za, Mahtaq eq huî é jowò má ru nyi tô ashî nghut ri. ³¹ Haú yhúmhaû má, Mariq lé nhik tîng nyi é Yudaq byu pé gi, yhang hân za toq luî, htoq lô é lé myàng kôjáng, yhang, lup má ê ngaû râ dâ lhê abe ga, myit yù kômù, yhang htâng châng e lô bum akô nghut ri.

³² Mariq gi, Yesuq nyi tô é jang má jé mù, Yhang lé myàng jáng, Yhâng é hkyî wang má ngóm gop to

† 11:27 Hkrisduq lé Mesaia le gà lhê.

luí, "Yhumsîng ê, Nàng, shî má nyi tô é ru nghut le gi, ngá gu shi byuq râ a nghut." ga taí ri.

³³ Yesuq gi, Mariq ngaù nyi é lé le, haù yhang eq rahá lé lo é Yudaq byu pé ngaù nyi kô é lé le, myàng jáng, Yhâng é myit má gyai yhang hkâm zo wuî é eq myit wui myit hke dut nyi ri. ³⁴ Haù mù, Yhang gi, "Yhang lé, hkâmá tô tô akô l hú?" ga myi jáng, yhangmoq gi, "Yhumsîng ê, lé wú wú aq." ga tû taí akô.

³⁵ Yesuq gi, ngaù bê nghut ri.

³⁶ Haù mù, haù Yudaq byu pé gi, "Wú keq, Yhang gi, Lazaruq lé, haù-í yhang chyit ri-nhung!" ga taí akô.

³⁷ Nghut kôlhang, ra-am gi, "Haù myoqjit sù lé, myoq wó lhoq myâng byî é Sù gi, shí yuq lé le, a shî lo shoq a wó kut é l hú?" ga taí bum akô nghut ri.

Lazaruq Lé Lhoq Dui Toq É Hkyô

³⁸ Yesuq gi, Yhâng é myit má radàm dum gyai yhang hkâm zo wuî é èq, lup má lé jé ri. Lup haù gi, luqhkýung dong nghut luí, luqgok rachâm èq chí tô akô. ³⁹ Haù mù, Yhang gi, "Luqgok haù lé yu pyám keq." ga taí ri.

Haù hkûn, haù shi byuq su é yhângnhá Mahta q gi, "Yhumsîng ê, yhang lé, haù má tô tô é myi nyí l háng nghut bê yanmai, ahkuí gi, bup nàm berá nghut lhê." ga taí ri.

⁴⁰ Haù mù, Yesuq gi, "Nàng, lumjîng é nghut le gi, haù Garai Gasâng é hpungwup shing kang lé, wó myâng râ nghut lhê nghû, Ngò, nang lé taí kyô wú bê a nghut l hú?" ga taí ri.

⁴¹ Haû mù luî, yhangmoq gi, luqgok haû lé yu pyâm akô. Hau htâng, Yesuq gi, mauhkông shut tu wú luî, "Áwa ê, Nàng, Ngá é dang lé gyo byî é yanmai, Ngò, Nang lé jeju hkya-ôn lhê. ⁴² Nàng gi, hkâ-nhám le, Ngá é dang lé gyo byî nyi é lé, Ngò sê lhê; nghut kôlhâng, Nàng, Ngo lé nhang kat é hkyô lé, shí má yap tô é bang lumjínng kó sháng gaq nghû, yhangmoq é matú, Ngò, isu nghû taî é nghut lhê." ga taî ri.

⁴³ Yhang gi, haû su ga taî luî, "Lazaruq ê, htoq lô aq." ga htê mó èq wut kat ri. ⁴⁴ Haú hkûn, haû shi byuq bê sù gi, yhâng é loq hkyî pé má pân èq htup yup to gû eq, yhâng é myoqdong má hpajet èq htup to gù htoq lo ri.

Haû mù, Yesuq gi, yhangmoq lé, "Yhang lé hpyi pyám byi mù, nhang kat keq." ga taî ri.

Yesuq Lé Sat Pyám Râ Haq Dâ É Hkyô

Mht 26:1-5; Mrk 14:1-2; Luk 22:1-2

⁴⁵ Haû mù luî, Mariq chyáng lé kûn é Yudaq byu pé myo myo gi, Yesuq kut é hkyô lé myàng jáng, Yesuq lé lumjínng bùm bekô nghut ri. ⁴⁶ Nghut kôlhâng, yhangmoq chyáng mâ é ra-am gi, haû Hparishe pê chyáng ló mù, Yesuq kut é hkyô lé, ló taî kyô akô. ⁴⁷ Haû mù, haû hkyangjong agyi pé eq Hparishe pé gi, Yudaq byìn tú wapdoq† zuphpong lé ji tsíng to mù, "Byù shí yuq gi, limik kumlhá myo myo kut shít nyi ri. Nga-nhúng, hkâsu kut le gè râ lhú? ⁴⁸ Nga-nhúng, Yhang lé haû su ru kut nyî nhang é nghut jáng, yuq hkangmó gi, Yhang lé lumjínng kó râ nghut lhê; haú hkûn, Romaq byu

† **11:47** Yudaq byìn tú wapdoq lé Grik dông gi, San-hedrin gâ lhê.

pé gi, jé lé mù, nga-nhông é jowò eq nga-nhông é byuhú lé, lé lhoq htên pyám kó râ nghut lhê." ga taí akô nghut ri.

⁴⁹ Haú hkûn, yhangmoq chyáng mâ é, haú zân má hkyangjong mó nghut nyi é sù, Kayahpaq gi, yhangmoq lé, "Nungmoq gi, haí lháng a sé kó nghut ri-nhung! ⁵⁰ Haú byuhú gón htên byoq byuq râ htoq má, byuhú hau é matú, byù rayuq shî hkâm byi le gi, nungmoq é matú je gè râ hkyô lé, nungmoq, a myit jé kó nghut ri." ga taí kat ri.

⁵¹ Yhang haú su ga taí é gi, yhumsing myit dông a nghut e za, haú zân má, yhang gi, hkyangjong mó nghut é eq rajung za, haú Yudaq byuhú é matú, Yesuq shî hkâm byi râ nghut é hkyô lé le, ⁵² byuhú hau é matú baú a nghut e za, haú byo myín tô é, Garai Gasâng é yhangzô pé lé, shuî tsing yù mù, rading ralhum za dut nhâng râ matú, shî hkâm byi râ nghut é hkyô lé le, myiqhtoi dang taí é ru nghut lhê. ⁵³ Haú nyí mai, yhangmoq gi, Yesuq lé sat râ matú chôm da bekô nghut ri.

⁵⁴ Hau é yanmai, Yesuq gi, Yudaq byu pè gyoro má, de de a sô shit wún e za, haú mai htoq luí, haú yoso eq chyâng lhûm é mau mâ é, Ehprim gâ é wà má ê mù, Yhâng é chángzô pé eq rahá nyi nyi ri.

⁵⁵ Haú Yudaq byu pè é Lhoqlhai Poí jé râ za nghut é hkûn, byù myo myo gi, Lhoqlhai Poí a jé shi má, lhoq san lhoq yúng hking dông yhumsing gùng lé lhoq sân-yúng yú râ matú, yosô wà pé mai, Yerusalem wà mó shut doq ló bum akô. ⁵⁶ Haú mù, yhangmoq gi, Yesuq lé ho nyi kô é nghut luí, haú noqkuq yhûm wàng má yap to uchyang, rayuq eq rayuq, "Nungmoq, hkâsu wó myit akô lhú? Yhang

gi, Poi má a lé lô râ gâ lhê là?" ga myî lhûm bum akô. ⁵⁷ Nghut kôlhang, haû hkyangjong agyi pé eq Hparishe pé gi, Yesuq lé wó chyup yû râ matú, Yesuq hkâmá nyi é lé, sê é sû ó yuq nghut kôle, yhangmoq lé lo shit kyo râ lhê ga dangmó hkyó tô akô nghut ri.

12

Yesuq, Namngón-xû But Byi Huî É Hkyô

Mht 26:6-13; Mrk 14:3-9

¹ Haû Lhoqlhai Poi jé râ hkyuq nyi râ ashî hkûn, Yesuq gi, Yhâng èq shi é mai lhoq dui toq yu é sû, Lazaruq nyi é Behtani wà má ló jé ri. ² Haû má, Yesuq lé hkunggâ é dông myinzang byi tsô akô; Mahtaq gi, zoshuq jaú ri; Lazaruq gi, haû Yesuq eq rahá siboî má zô zung nyi bang mâ é rayuq nghut ri. ³ Haú hkûn, Mariq gi, haû nardu amyit mai za saî yu é, gyai hpaû é namngón-xû raxe í rûng kô yu lé mù, Yesuq é hkyî má hut gyun byi luî, yhâng é uxam èq sùt byi ri. Haû mù, yhûm haû gi, namngón-xû shôm bying to bê nghut ri.

⁴ Nghut kôlhang, Yesuq lé ap pyám râ nghut é, Yhâng é chángzo rayuq nghut sû, Yudaq Iskarut gi, ⁵ "Haû myùng bang lé byi pyám râ matú, haû namngón-xû lé denari sum sho èq haî mù a ûng pyâm é lú?" ga taî ri. ⁶ Yhang haû su ga taî é gi, myùng bang lé chiq byi é yanmai taî é a nghut, yhang gi, ngùn htûng chûng sû nghut luî, haú má kat tô é ngùn lé, yhumsing é matú lhaq yu chûng chûng kut é, hkau sû nghut é yanmai taî é nghut ri.

⁷ Yesuq gi, "Nghut shang gaq; yhang gi, Ngo lé myhup yhum râ buinyi é matú, namngón-xû shi

lé hkong to byî é nghut lhê. ⁸ Haû myùng bang gi, nungmoq eq rahá hkâ-nhám le nyi râ nghut lhê; nghut kôlhang, Ngò gi, nungmoq eq rahá ayang nyi nyi râ sù a nghut." ga tû taî ri.

⁹ Haû u lé, Yudaq byu pé ajùm ayò gi, haû má Yesuq nyi é lé sé kôluî, lé lo akô; haû bang gi, Yesuq é yanmai za lé kô é a nghut, haû Yhâng eq shî bê mai lhoq dui toq yu é Lazaruq lé, lé myâng naù kô é yanmai le nghut ri. ¹⁰ Haû mù, haû hkyangjong agyi pé gi, Lazaruq lé le, sat pyám râ matú chôm hpyê lhùm akô. ¹¹ Hkâsu mù gâ le, yhâng é yanmai, haû Yudaq byu pé myo myo gi, Yesuq chyáng lhing ló kômù, Yhang lé lumjǐng bùm kô é yanmai nghut ri.

Yesuq, Yerusalem Wà Mó Má Wang E Ló É Hkyô Mht 21:1-11; Mrk 11:1-11; Luk 19:28-40

¹² Hau htang nyi, haû Poî má lé jé é byù moq mó gi, Yerusalem wà mó shut Yesuq jé doq ló é hkyô lé, wó gyô bum akô. ¹³ Haû mù, yhangmoq gi, byùm-haq pé yu chùng mù, Yhang lé é tê uchyang, "Hosana!"*

Haû Yhumsing é myìng mai jé lé lô Sù gi, hkungsô wó nyi sháng gaq ô!

Haû Israelaq byu pé é Hkohkâm gi, hkungsô wó nyi sháng gaq!"[✧]

ga, taî garû bum akô nghut ri. ¹⁴ Haû hkûn, Yesuq gi, logúng zo radu lé myàng luî, doq jî ri;

¹⁵ haû gi, "Zi-un byizo† ê, hkâgyuq; wú keq, nung-

* **12:13** Hebre dang má, hosana gâ é gi, "ahkuí hkyi yù aq" gâ é nghut lhê. Nghut kôlhang, bun zo shî má gi, hkya-on dang dông chung é nghut lhê. ✧ **12:13** Hkya-on 118:25-26 † **12:15** Hebre myíng dông Zi-un byizo gâ é gi, Yerusalem mâ é byu pé lé gâ é nghut lhê.

moq é hkohkâm gi, logúng zo má ji mù lé lo nyi ri."☆

ga, kê tô é eq rajung za nghut ri.

¹⁶ Haú pé banshoq lé, Yhâng é chángzô pé gi, sâng-hi lé a sê gyo kó; nghut kôhâng, Yesuq gi, hpungwup shingkang dan hu huí é htâng má za sheq, haú pé gi, Yhang eq séng luí kê tô é hkyô lé le, haú eq rajung za, Yhang lé, yhangmoq mai kut bê hkyô lé le, bûn sê kat akô nghut ri.

¹⁷ Haú Yesuq gi, lup hkaú mâ é Lazaruq lé wut luí, shi é mai lhoq dui toq yu é hkûn, Yhang eq rahá nghut é shiwa hpúng gi, haú hkyô lé, saksé hkám byí nyi akô. ¹⁸ Haú mù, byù myo myo gi, Yesuq tún shit é limik kumlhá hau é hkyô lé, wó gyo kô é yanmai, Yhang lé hui râ matú htoq e akô. ¹⁹ Hau é yanmai, haú Hparishe pé gi, "Wú keq, nga-nhúng, hkâsu yhang a ge kut lo nhung! Haú mingkan gón gi, Yhâng htâng châng bùm bekô." ga, rayuq eq rayuq taí lhùm bum akô nghut ri.

Yesuq, Yhang Shî Râ Hkyô Lé Te Taí É Hkyô

²⁰ Haú hkûn, noqkuq râ matú Poí má doq ló é bang má, Grik pé ra-am le bo tô akô. ²¹ Yhangmoq gi, Galile mau, Bet-saida wà mó mâ é Hpilip chyáng lé jé kômù, "Âhkaú ê, ngamoq gi, Yesuq lé myàng nau ri." ga, dung tôngbán akô. ²² Haú mù, Hpilip gi, Andre lé, ê taí kyô ri; Andre eq yháng nhik gi, Yesuq lé, ê taí kyô akô.

²³ Haú mù, Yesuq gi, "Haú Byu Yhangzo gi, hpungwup shingkang dan hû é hui râ matú, ahkyíng jé bê nghut ri. ²⁴ Ngò, nungmoq lé teng za taí kôlé, sungso racham gi, myigùng má gyó luí,

☆ 12:15 Zhk 9:9

shi byuq e za a nghut jáng, acham roq za dut nyi râ nghut lhê. Nghut kôlhang, shi byuq é nghut le gi, ashî myo myo lhoq htoq râ nghut lhê. ²⁵ Haû yhumsing é asak lé chyitdap é sù gi, asak sùm byuq râ nghut lhê. Míngkan shî má, haû yhumsing é asak lé a jú é sù kúm gi, ahtum abyuq é asak matú, yhumsing é asak lé wó sing to râ nghut lhê. ²⁶ Ngo lé dojaú é sù ó yuq nghut kôle, Ngá htâng cháng râ lhê; Ngò, hkâmá nyi le, Ngá é dui-nhâng zoshâng le nyi râ nghut lhê. Ngá Wa gi, haû Ngo lé dojaú é sù lé, shigyaú râ nghut lhê.

²⁷ Ahkuí, Ngò, myit wuîhke nyi ri; Ngò hkâsu nghû táí râ lhi? 'Áwa ê, ahkyíng shî mai Ngo lé lhoq lhut yù laq.' nghû táí râ lhu? Nghut kôle, Ngò gi, ahkyíng shî é matú za sheq jé lé é ru nghut lhê. ²⁸ Áwa ê, Náng é myìng lé hpungwup shíngkang dan hu nhâng aq hkoi!" ga táí ri.

Haú hkûn, "Ngò gi, Ngá é myìng lé hpungwup shíngkang dan hu nhâng bê nghut luí, dum dan hu nhâng shirâ nghut lhê." gâ é htê, mauhkûng mai htoq lo ri. ²⁹ Haû má nyi tô é byù moq mó gi, haû lé wó gyo kôjáng, "Maugum gum ri." gâ bum akô; ram gi, "Yhang lé, maumang lagyo rayuq nyo ri." ga táí bum akô nghut ri.

³⁰ Haú hkûn, Yesuq gi, "Danghtê shî gi, Ngá é matú a nghut, nungmoq é matú ru nghut lhê. ³¹ Ahkuí gi, míngkan shî lé jéyáng râ ahkyíng nghut bê; míngkan shî é zau gi, ahkuí hkat htoq pyâm é hui râ nghut lhê. ³² Nghut kôlhang, Ngò gi, myigùng mai tu shap kat é huí é hkûn, byù lhunglhang bang lé, Ngá chyáng shê yù râ nghut lhê." ga táí ri.

³³ Yhang haû su ga taî é gi, Yhang hkâsu kut shî râ nghut é hkyô lé shit é nghut ri.

³⁴ Haú hkûn, haû byù moq mó gi, "Haû tarâ laiká má, Hkrisduq gi, ahtum abyuq dui nyî râ nghut lê gê é lé sheq, ngamoq wó gyô wú é ru nghut le nhîng, 'Haû Byu Yhangzo gi, tu shap é hui ra râ nghut lê.' nghû, Nàng hkâsu kut wó taî lê lhú? Haû Byu Yhangzo gi, ó yuq nghut lê lhú?" ga, myî akô.

³⁵ Haû mù, Yesuq gi, yhangmoq lé, "Nungmoq chyáng, haû maubó joq nyî râ ahkyíng gi, a lúm myáng lo nghut ri. Mauchut gi, nungmoq chyáng a hkyit jé sháng gaq, nungmoq chyáng, haû maubó joq nyî ashî hkûn sô nyî keq; hkâsu mù gê le, haû mauchut má sô nyî é sù gi, yhang hká shut e ló nyî é lé, a sé nghut ri. ³⁶ Nungmoq gi, maubó é yhangzô pé wó dut kó sháng gaq, haû maubó joq nyî ashî hkûn, haû lé lumjíng keq." ga taî ri. Yesuq gi, dang haû ban taí jáng, yhangmoq chyáng mai htoq ló luî, haq byuq bê nghut ri.

Yudaq Byu Pé, A Lumjíng Ru Dut Nyî Kô É Hkyô

³⁷ Yesuq gi, yhangmoq é hí má, limik kumlhá haú pé banshoq kut shit kôlhang, yhangmoq gi, Yhang lé a lumjíng shi kó nghut ri. ³⁸ Haû gi, "Yhumsîng ê, nga-nhûng é danglù lé, ó yuq wá lumjíng byî wú é lhú? Haû Yhumsîng é loq[†] gi, ó yuq lé htoq shit wú é lhú?"[☆]

ga, myiqhtoi Esai-aq taî tô é dang lo dik é nghut ri.

³⁹ Yhangmoq a wó lumjíng kô é hkyô gi, Esai-aq taî é dang má,

[†] **12:38** Yhumsîng é loq gê é gi, Yhumsîng é hpungwup a-tsam lé gê é nghut lê. [☆] **12:38** Esai 53:1

40 "Yhang gi, yhangmoq é myoqjí lé lhoq chit byi lui, yhangmoq é i-myt lé lhoq htan to byi bê nghut ri;

haû mù, yhangmoq gi, myoqjí èq a wó myâng, i-myt èq a wó sê gyo, Ngò, yhangmoq lé yâ ge byi râ matú, a wó lhing taû lò kó dut râ nghut lhê."✧

ga le bo tô é yanmai nghut lhê. 41 Esai-aq gi, Yesuq é hpungwup shingkang lé myang é yanmai, Yhang eq sêng é hkyô lé, haû su ga taí é nghut ri.

42 Nghut kôhang, haû uphkâng bang myo myo lhang gi, haû u má, Yesuq lé lumjínq bum akô. Nghut kôle, yhangmoq gi, Hparishe pé èq tarajong mai lhoq htoq pyâm é hui râ lé, gyuq kô é yanmai, yhangmoq lumjínq bê hkyô lé a yín yu bùm kó nghut ri. 43 Hkâsu mù gâ le, yhangmoq gi, Garai Gasâng chyáng mâ é aróng lé, ô nau é htoq má, byu pé chyáng mâ é aróng lé, je ô nau kô é yanmai nghut ri.

44 Haû mù, Yesuq, htê mó èq taí é gi, "Ngo lé lumjínq é sù gi, Ngo lé baú lumjínq é a nghut; haû Ngo lé nhang kat é Sù lé le, lumjínq é nghut lhê.

45 Ngo lé myang é sù gi, haû Ngo lé nhang kat é Sù lé le myang é nghut lhê. 46 Ngò gi, Ngo lé lumjínq é sù ó yuq le, mauchut hkaû má a nyi sháng gaq nghû, maubó dông mingkan má lé jé é nghut lhê.

47 Ngò gi, Ngá é dang lé wó gyo lui, a châng é sù ó yuq lé le, jéyáng râ a nghut; hkâsu mù gâ le, Ngò gi, mingkan lé jéyáng râ matú jé lé é a nghut; haû mingkan lé hkyi yù râ matú sheq, jé lé é ru nghut lhê. 48 Ngo lé he-ngik lui Ngá é dang lé a hap yu é sù

lé, jéyáng râ Sû rayuq nyi lê; Ngò taí é danghkun haú gi, haú jìhtùm buinyì má, haú yuq lé mara byi râ nghut lê. ⁴⁹ Hkâsu mù gâ le, Ngò gi, Ngá é myit đông taí é a nghut; nghut kôlhang, Ngò haí taí râ eq hkâsu nghu taí râ lé gi, haú Ngo lé nhang kat é sù Íwa mai, Ngo lé hkunmó hkyô to bê nghut lê. ⁵⁰ Haú Yhâng é hkunmó gi, ahtum abyuq é asak nghut é lé, Ngò sê lê. Haú mù luí, Ngò, haí taí kôlé, haú Íwa mai Ngo lé taí kyô é lé za, taí é nghut lê." gâ ri.

13

Chángzô Pé É Hkyî Chi Byî É Hkyô

¹ Haú Lhoqlhai Poí jé râ hí má za, Yesuq gi, Yhang, mingkan shî mai Yhâng Wâ chyáng htot ló râ ahkyíng jé bê hkyô lé, sê ri. Yhang gi, mingkan má nyi é, Yhâng é byu pé lé chytđap nyi é nghut luí, jìhtùm jé shoq Yhâng é chytđap myit lé shit râ nghut lê.

² Myinzang zô nyi bùm kô é u lé, nat Tsadán gi, Simun é yhangzo Yudaq Iskarut chyáng, Yesuq lé ap pyám râ myit kat byî to gû nghut ri. ³ Yesuq gi, haú lhunglhang lé Íwa mai Yhâng é loq má ap byi to bê nghut é lé le, Yhang gi, Garai Gasâng chyáng mai lé é sù nghut luí, Garai Gasâng chyáng dum taú ló râ sù nghut é lé le, sê ri. ⁴ Haú mù, Yhang gi, zohpoq mai toq luí, Yhâng é bumó lé hkyut pyám mù, hpyidum má hpajet ralhùm eq hpyihit hit tô ri. ⁵ Hau htâng, Yhang gi, jirung má uchyam hut kat mù, Yhâng é chángzô pé é hkyî chi byi luí, haú Yhâng é hpyidum má hit tô é hpajet eq sut huí byi ri.

⁶ Yhang gi, Simun Petruq chyáng jé jáng, Simun Petruq gi, "Yhumsîng ê, Nàng gi, ngá hkyî lé chi byi râ nghut lê lú?" ga myî ri.

⁷ Haú hkûn, Yesuq gi, "Ngò, haî kut nyi é hkyô lé, ahkuî, nàng sê gyo râ a nghut; nghut kôlhang, htâng má sê gyo râ nghut lê." ga tù taî ri.

⁸ Petruq gi, "Ngá hkyî lé, Nàng, hkâ-nhám le wó chi byi râ a nghut." ga taí jáng, Yesuq gi, "Nang lé, Ngò a chi byî é nghut jáng, nàng gi, Ngò eq séng rá a nghut." ga tù taî ri.

⁹ Haú hkûn, Simun Petruq gi, "Yhumsîng ê, haú su nghut jáng gi, ngá é hkyî lé baú za a nghut, ngá é loq eq ulhum lé le chi byi laq!" ga tù taî ri.

¹⁰ Yesuq gi, "Gùng chi bê sê gi, hkyî za chi jáng, ragùngdû é sanséng bê nghut ri. Nungmoq gi, sanséng bekô; nghut kôlhang, yuq hkangmó gi, sanséng é a nghut." ga tù taî ri. ¹¹ Hkâsu mù gâ le, Yhang gi, Yhang lé ap pyám râ sê ó yuq nghut é lé, sê é yanmai, "Nungmoq gi, sanséng é bang chyat a nghut." ga taí é nghut ri.

¹² Yesuq gi, yhangmoq é hkyî lé ban chi byi jáng, Yhâng é bumó lé wut mù, Yhâng é jowò má ló dum zùng luî, yhangmoq lé myi é gi, "Nungmoq gi, ahkuî, ngò kut byî é hkyô lé, sê gyo akô lú?"

¹³ Nungmoq, Ngo lé, 'Sarâ' ga le, 'Yhumsîng' ga le, wut kô é gi, a shut; hkâsu mù gâ le, Ngò gi, haú yuq yhang nghut lê. ¹⁴ Ngò, nungmoq é Sarâ eq Yhumsîng nghut sê lhang, nungmoq é hkyî lé chi byî é nghut le gi, nungmoq le, rayuq eq rayuq é hkyî lé chi byî lhum râ dut lê. ¹⁵ Nungmoq gi, Ngò, nungmoq lé kut byî é su kut kó sháng gaq nghû, Ngò, nungmoq lé alik kut shit tô é nghut

lhê. ¹⁶ Ngò, nungmoq lé teng za taí kôlé, dui-nhâng zoshâng gi, yhumsîng htoq je kô é a nghut; lagyo gi, nhang kat é sù htoq je kô é a nghut. ¹⁷ Ahkuî, nungmoq gi, haú pé lé sé bekô nghut luî, châng kut kô é nghut jáng, hkungsô wó kó râ nghut lhê.

Yesuq Lé Ap Pyám Râ Lé, Te Tai Ê Hkyô

¹⁸ Ngò gi, nungmoq banshoq bang lé lhoq ang luî taí é a nghut; Ngò hkyin yu é bang lé gi, Ngò sê lhê. Nghut kôlhang, 'Haú ngá é muk lé bo zô é sù gi, ngo lé, yhâng é hkyihtáng la-nhik èq nâng htíng râ nghut lhê.'* gâ é Chyúmdang lé, lhoq dik râ matú ru nghut lhê.

¹⁹ Haú a dut htoq shimá, Ngò, nungmoq lé taí kyô nyi é gi, haú dut é hkûn, Ngò gi, haú Yuq* nghut é lé, nungmoq wó lumjîng kó râ matú nghut lhê. ²⁰ Ngò, nungmoq lé teng za taí kôlé, Ngò nhang kat é sù lé, lhom hap yu é sù ó yuq nghut kôle, Ngo lé hap yu é nghut bê; Ngo lé hap yu é sù ó yuq nghut kôle, haú Ngo lé nhang kat é Sù lé hap yu é nghut bê." gâ ri.

²¹ Yesuq gi, haú su ga taí é htâng má, myit wuîhke nyi mù, saksé hkâm é gi, "Ngò, nungmoq lé teng za taí kôlé, nungmoq mâ é rayuq sù gi, Ngo lé ap pyám râ nghut lhê." gâ ri.

²² Haú mù, Yhâng é chángzô pé gi, ó yuq lé taí záng nyi é hkyô lé, rago a sé kô é yanmai, rayuq eq rayuq wú tsuq lhûm bum akô nghut ri.

²³ Haú Yesuq chyitdap é chángzo rayuq gi, Yesuq é tanghkoí nâm má leq nge zung tô ri. ²⁴ Haú mù, Simun Petruq gi, chángzo haú yuq lé, loq lik kat

* **13:18** Hkya-on 41:9 * **13:19** Haú Yuq gâ é gi, Hkrisduq lé gâ é nghut lhê.

mù, "Yhang, ó yuq lé lhoq ang luí, taí nyi é hkyô lé, myi wú aq." ga taí ri.

²⁵ Haû mù, chángzo haû gi, Yesuq é tanghkoí má saí leq nge zung mù, "Yhumsîng ê, haû gi, ó yuq nghut lhê lhú?" ga, Yhang lé myí ri.

²⁶ Yesuq gi, "Ngò, muk jap zo shí lé jum yù mù, byí é sù gi, haú yuq nghut lhê." ga tû taí luí, muk jap zo haú lé jum yù mù, Simun é yhangzo Yudaq Iskarut lé byí ri. ²⁷ Yudaq gi, muk haû lé yù zo kat é eq, Tsadán gi, yhâng chyáng wàng bê nghut ri.

Haû mù, Yesuq gi, "Nàng kut râ é hkyô lé, hân kut aq hkoi." ga yhang lé taí kat ri. ²⁸ Nghut kôlhang, yhang lé, Yesuq haû su ga haí mù taí é hkyô lé, zohpoq haú má nyi tô é bang gi, rayuq lhang a sê gyo kó nghut ri. ²⁹ Haû Yudaq gi, ngùn zum sù nghut é yanmai, ra-am gi, haû Poí má râ é hkyô lé, ê wuî râ matú, Yesuq taí ri ga luí le, myùng bang lé rajung jung byí nhang ri ga luí le, myit yu bum akô nghut ri. ³⁰ Yudaq gi, muk haû lé lhom yù eq, htoq ló byuq bê nghut ri. Haû u gi, mauchut bê nghut ri.

Petruq He-ngik Pyám Râ Lé, Yesuq Te Taí É Hkyô Mht 26:31-35; Mrk 14:27-31; Luk 22:31-34

³¹ Haú yuq htoq ló byuq jáng, Yesuq taí é gi, "Ahkuí, haû Byu Yhangzo gi, hpungwup shingkang dan hú é nghut luí, Garai Gasang gi, haû Byu Yhangzô é yanmai, hpungwup shingkang dan hu bê nghut ri. ³² Garai Gasang gi, haû Byu Yhangzô é yanmai, hpungwup shingkang dan hú é nghut jáng, Yhang le, Yhang má haû Zo lé hpungwup shingkang dan hu nhâng râ nghut lhê; radá dâm dan hu nhâng râ nghut lhê.

³³ Ngá zo pé ê, Ngò, nungmoq eq rahá nyi râ gi, razup za ru nghut alô. Nungmoq gi, Ngo lé hô kó râ nghut lhê; nghut kôhang, 'Ngò lô é jang má, nungmoq wó jé kó râ a nghut.' nghû, haû Yudaq byu pé lé, Ngò taî é eq rajung za, ahkuî, nungmoq lé le, Ngò taî lhê.

³⁴ Ngò, nungmoq lé, hkunmó asik byi to kô lé, nungmoq yhangchang chyitdap lhum keq. Ngò, nungmoq lé chyitdap é su, nungmoq yhangchang chyitdap lhum râ dut lhê. ³⁵ Nungmoq yhangchang chyitdap lhum kô é nghut jáng, nungmoq gi, Ngá é chángzô pé nghut é hkyô lé, byù lhunglhang bang sé kó râ nghut lhê." gâ ri.

³⁶ Haú hkûn, Simun Petruq gi, "Yhumsîng ê, Nàng, hká shut lô râ lhú?" ga, Yhang lé myi jáng, Yhang gi, "Ngò lô é jang má, nungmoq, ahkuî a wó châng kó râ nghut lhê. Nghut kôhang, htâng má gi, nungmoq châng ra kó râ nghut lhê." ga tû taî ri.

³⁷ Petruq gi, "Yhumsîng ê, haî mù luî, ahkuî ngò Náng htâng a wó châng é lhú? Ngò gi, Náng é matú, shî hkám râ rì rì nghut lhê." ga taî ri.

³⁸ Haû mù, Yesuq taî é gi, "Nàng gi, gè gè yhang, Ngá é matú shî hkám râ lhú? Ngò, nàng lé teng za taî lé, woq a tûn shimá, nàng, Ngo lé sum dâm he-gnik pyám râ nghut lhê.

14

Yesuq, Yhâng É Chángzô Pé Lé Nhik Tîng É Hkyô

¹ Nungmoq é i-myt nhiklhum lé, myit wui myit hkê hkâdut nhâng kó. Garai Gasang lé lùm keq; Ngo lé le lùm keq. ² Ngá Wâ é yhûm má, nyi jowò myo myo joq lhê; a joq é ru nghut le gi, noq mai, Ngò,

nungmoq lé taí kyo râ nghut lhê. Ngò, haú má ló é gi, nungmoq é nyi jowò ló hên láng râ matú ru nghut lhê. ³ Ngò gi, ló mù, nungmoq é matú nyi jowò ló hen é nghut jáng, Ngò nyi é jang má nungmoq le wó nyi shoq, Ngò eq rahá nyi râ matú, Ngò dum taú lé mù, nungmoq lé, lé shuí yù râ nghut lhê. ⁴ Ngò ló é jang má jé é hkyô lé, nungmoq sê lhê." gâ ri.

Yesuq Za Hkyô

⁵ Haú hkún, Htomaq gi, Yhang lé, "Yhumsîng ê, Nàng hká shut ló é lé lháng, ngamoq a sê le nhîng, hkyô haú lé, ngamoq hkâsu kut wó sé râ l hú?" ga myí ri.

⁶ Yesuq gi, "Ngò gi, hkyô nghut lhê; haú tengmán hkyô eq asak le nghut lhê. Ngò mai za a nghut jáng, ó yuq le, Íwâ chyáng wó jé é a nghut. ⁷ Nungmoq, gè gè yhang, Ngo lé sé kô é nghut le gi, Ngá Wa lé le, nungmoq sé kó râ nghut lhê. Ahkuí mai, nungmoq gi, Yhang lé sé kô é htoq agó, myàng le myang wú bekô nghut lhê." ga tû taí ri.

⁸ Haú hkún, Hpilip gi, "Yhumsîng ê, ngamoq lé, haú Íwa tân shit laq, haú hkún, ngamoq nhik shî râ nghut lhê." ga taí ri.

⁹ Yesuq tû taí é gi, "Hpilip ê, Ngò, nungmoq eq shî myáng lháng nyi lò bê le nhîng, nàng, Ngo lé a sé l hú? Ngo lé myang é sù gi, haú Íwa lé myàng bê nghut ri; haú nghut le nhîng, 'Ngamoq lé, haú Íwa tân shit laq.' nghû, nàng hkâsu wó taí lhê l hú?"
¹⁰ Ngò gi, haú Íwa má nghut nyí luí, haú Íwa gi, Ngò má nghut nyi é hkyô lé, nàng a lumjîng l hú? Ngò, nungmoq lé taí é dang haú pé gi, Ngá é myit mai taí

é a nghut; haû Gò má lúng nyi é Íwa sheq, Yhâng é mũ zuí nyi é ru nghut lhê. ¹¹ Gò gi, haû Íwa má nghut nyi luí, haû Íwa gi, Gò má nghut nyi lhê nghû é lé lumjúng keq; haû a nghut jáng, kut shit é limik kumlhá pé dông za lháng, lumjúng keq. ¹² Gò, nungmoq lé teng za tái kôlé, Ngo lé lumjúng é sũ gi, Gò kut é muzó lé kut râ nghut lhê. Gò gi, haû Íwâ chyáng ló râ nghut é yanmai, haû yuq gi, hau htoq je kô é muzó pé lé lháng kut râ nghut lhê. ¹³ Haû Yhangzô é yanmai, Íwâ é hpungwup shingkang wó hũ ló shoq, Ngá é myìng lé lang luí, nungmoq hái jung dung kôlhang, Gò gyo byi râ nghut lhê. ¹⁴ Nungmoq gi, Ngá é myìng lé lang luí, hái dung kôlhang, Gò gyo byi râ nghut lhê.

Chyoiyúng Woi-nyí Byi Râ Danggidiq

¹⁵ Nungmoq gi, Ngo lé chyitdap kô é nghut jáng, Gò hkyô tô é hkunmó pé lé, cháng kó râ nghut lhê. ¹⁶ Haû Íwa gi, nungmoq eq ahtum abyuq nyi nyi râ nghut é, hpaqchyí byi Sũ gotû rayuq, nungmoq lé byi râ matú, Gò gi, haû Íwa lé dung râ nghut lhê. ¹⁷ Haû yuq gi, tengmán é Woi-nyí nghut lhê. Haû mingkan gi, Woi-nyí haû lé a myàng a sê é yanmai, Yhang lé a wó hap yu é nghut lhê. Nghut kôlhang, Yhang gi, nungmoq eq rahá nyi nyi é nghut luí, nungmoq má nyi to râ Sũ nghut é yanmai, nungmoq gi, Yhang lé sê akô. ¹⁸ Gò gi, nungmoq lé, chuizô pé dông pyâm to râ a nghut; nungmoq chyáng Gò dum jé lé râ nghut lhê. ¹⁹ Adê myáng má, haû mingkan gi, Ngo lé a myàng lo râ nghut lhê; nghut kôlhang, nungmoq gi, Ngo lé myàng kó râ nghut lhê. Hkâsu mù gâ le, Gò

gi, asak dui nyi é nghut mù, nungmoq le duì kó râ nghut lhê. ²⁰ Ngò gi, Ngá Wâ chyáng nghut nyi é lé le, nungmoq gi, Ngò má nghut nyi é lé le, Ngò gi, nungmoq má nghut nyi é lé le, haú buinyì má, nungmoq sé kó râ nghut lhê. ²¹ Ngá é hkunmó pé lé wó mù, châng kut é sù ó yuq nghut kôle, Ngo lé chyitdap é sù nghut ri. Ngo lé chyitdap é sù lé gi, Ngá Wa chyitdap râ nghut lhê; Ngò le, haú yuq lé chyitdap luì, Ngá gûng lé yhang, yhang lé shit râ nghut lhê." gâ ri.

²² Hau htâng, (Yudaq Iskarut a nghut sù) Yudaq gi, "Yhumsîng ê, Nàng gi, haú mingkan lé Náng gûng a shit e za, ngamoq lé shit râ nghut é gi, haì mù nghut lhê l hú?" ga myî ri.

²³ Haú hkûn, Yesuq tû taí gi, "Rayuq yuq, Ngo lé chyitdap é nghut le gi, Ngá dang lé gyo râ nghut lhê. Ngá Wa le, haú yuq lé chyitdap râ nghut luì, Ngá hpe gi, haú yuq chyáng lé mù, yhang eq rahá nyi râ nghut lhê. ²⁴ Ngo lé a chyitdap é sù gi, Ngá dang lé gyo râ a nghut. Nàng wó gyô é dang shí pé gi, Ngá myit mai taí é a nghut; dang haú pé gi, Ngo lé nhang kat é Sù, haú Íwâ é ru nghut lhê.

²⁵ Ngò gi, shî pé banshoq lé, nungmoq eq rahá nyi tô ashî u lé taí bê nghut lhê. ²⁶ Nghut kôlhang, Ngá é myîng dông, haú Íwa nhang kat râ nghut é, hpaqchyî byi Sù nghû é, haú Chyoiyúng Woi-nyí gi, nungmoq lé, jung hkanmó mhoq byi râ eq, Ngò, nungmoq lé taí kyo bê hkyô lunglhang, nungmoq lé lhoq pun râ nghut lhê. ²⁷ Ngò gi, nungmoq chyáng, nguingón hkyô tô to byi bê; Ngá é nguingón hkyô, Ngò, nungmoq lé byî é nghut lhê. Ngò gi, mingkan byî é dông, nungmoq lé byî é a

nghut. Nungmoq é i-myt nhiklhum lé, myit wui myit hke é eq gyuq kyûm é hkâdut nhâng kó.

²⁸ 'Ngò gi, ló byuq luî, nungmoq chyáng dum taû lé râ nghut lhê.' nghû, Ngò taî é lé, nungmoq wó gyô yù bê nghut lhê. Nungmoq, Ngo lé chytidap kô é nghut le gi, haû Íwâ chyáng Ngò ló râ nghut é hkyô lé, nungmoq gabú kó râ nghut lhê; hkâsu mù gâ le, haû Íwa gi, Ngá htoq je ko Sû nghut lhê.

²⁹ Haû dut é hkûn, nungmoq lumjîng kó sháng gaq nghû, ahkuî, haû a dut shimá, Ngò, nungmoq lé taî kyô é nghut lhê. ³⁰ Ahkuî mai, Ngò gi, nungmoq lé, dang myo myo wó nyô râ a nghut lo; hkâsu mù gâ le, mingkan shi é zau gi, jé lé lo nyì bê nghut ri. Haú yuq gi, Ngo lé up râ ahkáng haî a wó é sù nghut ri.

³¹ Nghut kôlhang, haû Íwa lé Ngò chytidap é hkyô, mingkan sé sháng gaq nghû, Ngò gi, Ngá Wa hkyô tô é hkunmó eq roq za kut nyi lhê.

Toq keq, e ló sháng hkoi.

15

Tsibiyiq Nuî Eq Akoq Pê É Hkyô

¹ Ngò gi, haû tsibiyiq nuî akyîng nghut lhê; Ngá Wa gi, tsibiyiq hkyâm yhumsîng nghut lhê. ² Yhang gi, ashi a zuî é akoq hkangmó lé, Ngá chyáng mai kyik pyám luî, ashi zuî é akoq hkangmó lé kum gi, ashi je myo zui sháng gaq ga, shang pyám byî ri.

³ Nungmoq gi, Ngò, nungmoq lé taî é mungdang hau é yanmai, sanséng gû nghut bekô nghut ri.

⁴ Ngò má nyi nyì keq; Ngò le, nungmoq má nyi nyì râ nghut lhê. Akoq hkangmó gi, tsibiyiq nuî má nui nyi é za a nghut jáng, yhang baú ashi wó zuî é a

nghut. Haû eq rajung za, nungmoq le, Ngò má nyi nyi e za a nghut jang, ashi wó zui kó râ a nghut.

⁵ Ngò gi, tsibiyiq nuî nghut lhê; nungmoq gi, akoq pé nghut akô. Byù rayuq yuq, Ngò má nyi nyi é nghut luî, Ngò gi, yhang má nyi nyi é nghut jáng, haú yuq gi, ashi myo myo zui râ nghut lhê; hkâsu mù gâ le, Ngò mai gang jáng, nungmoq gi, haî le a wó kut kô é nghut lhê. ⁶ Ngò má a nyi nyi é sù gi, haû dú pyâm é hui luî, kyuq shi byuq é akoq eq wui ri; haû sù é akoq pé gi, byu pé eq guq yù mù, myihkyóm má dú kat pyâm é hui luî, nyé gyó byuq râ nghut lhê. ⁷ Nungmoq gi, Ngò má nyi nyi luî, Ngá é dang pé gi, nungmoq má bo nyi é nghut le gi, nungmoq ô nau é haî nghut kôhang, dung keq; haú hkûn, nungmoq lé byi râ nghut lhê. ⁸ Nungmoq gi, haû ashi ga-myhó zui é dông, Ngá Wâ é hpungwup shing kang lé lhoq htoq shit é nghut luî, Ngá é chángzô pé nghut é hkyô lé tân shit nyi bekô nghut ri.

⁹ Haû Íwa gi, Ngo lé chyitdap é su, Ngò gi, nungmoq lé chyitdap é nghut lhê. Ahkuî, Ngá é chyitdap myit má gîng nyi keq. ¹⁰ Ngò gi, Ngá Wâ é hkunmó lé châng é nghut luî, Yhâng é chyitdap myit má gîng nyi é su, Ngá é hkunmó lé, nungmoq châng nyi kô é nghut jáng, nungmoq gi, Ngá é chyitdap myit má gîng nyi kó râ nghut lhê. ¹¹ Nungmoq má Ngá é gabú hkyô joq nyi râ eq, nungmoq é gabú hkyô wó byíng jup râ matú, Ngò, nungmoq lé, dang shí pé taî é nghut lhê. ¹² Ngò, nungmoq lé chyitdap é su, nungmoq yhangchang chyitdap lhum keq; haû gi, Ngá é hkunmó nghut lhê. ¹³ Haû yhumsing é luzúm wui é matú, yhumsing é asak

ap byi pyâm é chyitdap myit htoq kô é, chyitdap myit gi, ó yuq chyáng le a bò nghut ri. ¹⁴ Ngò hkyô tô é hkunmó pé lé, nungmoq châng kut é nghut jáng, nungmoq gi, Ngá é luzúm wui nghut bekô. ¹⁵ Ngò gi, Ngá Wâ chyáng mai Ngò wó gyô yu é hkyô lhunglhang, nungmoq lé sé nhâng bê nghut é yanmai, nungmoq lé, dui-nhâng zoshâng wui nghû, a wut lô e za, luzúm wui nghû wut é nghut lhê; hkâsu mù gâ le, dui-nhâng zoshâng gi, yhâng yhumsing hpô é muzó lé a châng sé nghut ri. ¹⁶ Nungmoq, Ngo lé hkyin yu é a nghut, Ngò sheq, nungmoq lé, htoq e ló mù, gîng nyi é ashi zui râ matú hkyin masat tô é ru nghut lhê. Hau hkun sheq, Ngá é myìng lé lang mù, haû Îwâ chyáng nungmoq hai jung dung kôle, Yhang byi râ nghut lhê. ¹⁷ Nungmoq yhangchang chyitdap lhum keq; haû gi, Ngá é hkunmó nghut lhê.

Haû Mingkan Gi, Chángzô Pé Lé A Jú É Hkyô

¹⁸ Haû mingkan, nungmoq lé a jú é nghut jáng, Ngo lé hí a jú kut bê nghut é lé, sé nyi keq. ¹⁹ Nungmoq gi, haû mingkan eq sêng é bang nghut é nghut jáng, haû mingkan gi, yhang eq sêng é bang nungmoq lé chyitdap râ nghut lhê. Nghut kôlhang, nungmoq lé gi, Ngò, haû mingkan mai hkyin htoq yû bê nghut lui, nungmoq gi, haû mingkan eq a séng lo kô é yanmai, mingkan gi, nungmoq lé a jú é nghut ri. ²⁰ 'Dui-nhâng zoshâng gi, yhâng é yhumsing htoq je kô é a nghut.' nghû, Ngò, nungmoq lé taí é dang pé lé bûn nyi keq. Ngo lé lhang, yhangmoq zing-rî yû bekô nghut le gi, nungmoq lé le, zing-ri kó râ nghut lhê. Ngò mhoqshit é hkyô lé, yhangmoq châng kô é nghut

le gi, nungmoq mhoqshit é lé le, cháng kó râ nghut lhê. ²¹ Nghut kôlhang, yhangmoq gi, Ngá é mying é yanmai, nungmoq lé haú su kut kó râ nghut lhê; hkâsu mù gâ le, haú Ngo lé nhang kat é Sû lé, yhangmoq a sé kôluí nghut ri. ²² Yhangmoq lé, Ngò a lé nyo wú é nghut le gi, yhangmoq mara bò kó râ a nghut; nghut kôlhang, ahkuí gi, yhangmoq mara wó taí hkyut râ a nghut lo. ²³ Ngo lé a jú é sù gi, Ngá Wa lé le a jú é sù nghut ri. ²⁴ Haú ó yuq lhang a wó kut é muzó lé, Ngò, yhangmoq chyáng a kut é nghut le gi, yhangmoq mara bò kó râ a nghut; ahkuí kúm gi, laklai kumlhá haú pé lé yhangmoq myang nyi kôlhang, Ngò eq Ngá Wa lé a jú kô é nghut ri. ²⁵ Haú gi, 'Yhangmoq gi, jumgúyô má Ngo lé a jú kut akô nghut ri.' ✧ ga, yhangmoq é tarâ má kâ tô é dang lé lhoq dik é nghut ri.

²⁶ Haú Íwâ chyáng mâ é, Ngò nhang kat râ nghut é, Íwa mai htoq lé lo é tengmán é Woi-nyí nghut é, haú hpaqchyí byi Sû jé lé é hkûn, Ngá é hkyô lé saksé hkám byi râ nghut lhê. ²⁷ Nungmoq le, Ngò eq rahá sâng-hi mai nyi bekô nghut é yanmai, saksé hkám byi ra kó râ nghut lhê.

16

¹ Nungmoq gi, myit lingbat jowò a joq kó sháng gaq nghû, haú pé banshoq lé, Ngò, nungmoq lé taí kyo bê nghut lhê. ² Yhangmoq gi, nungmoq lé, tarajong mai hkat htoq pyám kó râ nghut lhê; ó yuq nghut kôle, yhang mai nungmoq lé sat pyâm é hkûn, yhang gi, haú dông mai Garai Gasang lé dojaú nyi lhê ga myit yu é ahkyíng, gè gè yhang,

✧ 15:25 Hkya-on 35:19; 69:4

jé râ nghut lhê. ³ Yhangmoq gi, haû Íwa lé le, Ngo lé le, a sé kô é yanmai, haû su kut kó râ nghut lhê. ⁴ Nghut kôlhang, nungmoq lé, Ngò sidiq byí é hkyô lé, ahkyíng jé jáng nungmoq bûn nyi kó sháng gaq nghû, Ngò haú hkyô taí kyô é nghut lhê. Ngò gi, nungmoq eq rahá nghut nyi é yanmai, haú hkyô lé, hí hkûn nungmoq lé a taí kyô é nghut lhê.

Chyoiyúng Woi-nyí é muzó

⁵ Nghut kôlhang, ahkuí, Ngò gi, Ngo lé nhang kat Su chyáng ló râ nghut lhê. Nghut kôlhang, nungmoq ó yuq le, 'Nàng, hká shut ló râ lú?' ga, Ngo lé a myi kó nghut ri. ⁶ Ngò, nungmoq lé, haú hkyô pé taí kyô é yanmai, nungmoq é i-myit unghkaú má iyon hkyô byíng to bekô nghut ri. ⁷ Nghut kôlhang, Ngò, nungmoq lé teng za taí kôlé, Ngò ló byuq é gi, nungmoq é matú je gè râ hkyô ru nghut lhê. Ngò ló byuq e za a nghut jáng, haú hpaqchyí byi Sû gi, nungmoq chyáng lé râ a nghut; Ngò ló jáng sheq, Yhang lé, Ngò, nungmoq chyáng nhang kat byi râ nghut lhê. ⁸ Yhang jé lé é hkûn, Yhang gi, haû mara wó é eq séng luí le, dingmán hkyô eq séng luí le, tarâ jéyáng hkyô eq séng luí le, haû mingkan lé tân shit rá nghut lhê. ⁹ Haû yubak mara wó é eq séng luí ga jang, byu pé gi, Ngo lé a lumjíng kô é yanmai nghut ri. ¹⁰ Haû dingmán hkyô eq séng luí ga jang, Ngò gi, haû Íwâ chyáng ló râ nghut luí, nungmoq, Ngo lé a myàng lo kó râ nghut é yanmai nghut ri. ¹¹ Haû tarâ jéyáng hkyô eq séng luí ga jang, mingkan shi é zau gi, mara byí é huí é nghut é yanmai nghut ri.

¹² Ngò gi, nungmoq lé taí râ hkyô myo myo wó ashí; nghut kôlhang, ahkuí, nungmoq wó hkâm

kó rã a nghut. ¹³ Nghut kôlhang, haû tengmán é Woi-nyí jé lé é hkûn, Yhang gi, tengmán hkyô lhunglhang lé shuí sé rã nghut lhê. Yhang gi, Yhâng myit đông táí rã a nghut; Yhang, wó gyô yu é hkyô lé za táí luî, dut lò rã hkyô pé lé le, nungmoq chyáng tâi pyô rã nghut lhê. ¹⁴ Yhang gi, Ngò wó é lé, yù mù, nungmoq lé tâi kyô é eq sé nhang é đông, Ngá é hpungwup shing kang lé hû ló nhang rã nghut lhê. ¹⁵ Haû Íwa wó é lhunglhang gi, Ngá é chyat nghut lhê. Hau é yanmai, haû Woi-nyí gi, Ngò wó é lé yù mù, nungmoq lé sé nhang rã nghut lhê nghû, Ngò tâi é nghut lhê.

¹⁶ Adê myáng má, nungmoq gi, Ngo lé a myàng lo kó rã nghut lhê; hau htâng, dum adê myáng má, nungmoq gi, Ngo lé myàng kó rã nghut lhê." gâ ri.

Changzô Pê É Iyon Hkyô Gi, Gabú Hkyô Taû Dut Rã

¹⁷ Yhâng é chángzô pé ra-am gi, "'Adê myáng má, nungmoq gi, Ngo lé a myàng lo kó rã nghut lhê; hau htâng, dum adê myáng má, nungmoq gi, Ngo lé myàng kó rã nghut lhê.' gâ é eq 'Ngò gi, Íwa chyáng ló rã nghut é yanmai nghut lhê.' ga, Yhang tâi é gi, haí jung gá nau é nghut lhê lú?" ga, rayuq eq rayuq myí lhum bum akô. ¹⁸ Hau htoq agó, yhangmoq gi, "'Adê myáng má,' gâ é gi, Yhang haí jung gá nau lhê lú? Nga-nhúng gi, Yhang haí táí nau é lé a sê gyo." ga, tâi lhum bum akô nghut ri.

¹⁹ Yesuq gi, yhangmoq myi naû kô é hkyô lé sê ri; haû mù, Yhang, yhangmoq lé tâi é gi, "'Adê myáng má, nungmoq gi, Ngo lé a myàng lo kó rã nghut lhê; hau htâng, dum adê myáng má, nungmoq gi, Ngo lé myàng kó rã nghut lhê.' nghû, Ngò tâi é lé, haí jung

gá nau lhê laq nghû, rayuq eq rayuq myi lhum nyi akô lhu? ²⁰ Ngò, nungmoq lé teng za taí kôlé, haú mingkan gi, gabú nyi é u lé, nungmoq gi, ngaù é eq iyon yón é hui kó râ nghut lhê. Nungmoq gi, iyon yón é hui kó râ nghut lhê; nghut kôlhang, nungmoq é iyon hkyô gi, gabú hkyô taù dut râ nghut lhê. ²¹ Myiwe gi, zoshâng hkû râ nghut jáng, zohkû-nò nò râ ahkyíng jé bê nghut é yanmai, myit chiq nyi ri; nghut kôlhang, zoshâng lé wó hku htoq kat é hkûn gi, mingkan htoq má zoshâng rayuq wó hku to bê nghut luí, yhang gabú é yanmai, haú no hpu é hkyô lé a bun byuq lo nghut ri. ²² Haú eq rajung za, ahkuí gi, nungmoq iyon yón é ahkyíng nghut ri; nghut kôlhang, Ngò, nungmoq lé dum huí é hkûn, nungmoq gi, gabú kó râ nghut lhê; nungmoq é gabú hkyô haú lé, nungmoq chyáng mai ó yuq èq le wó yu pyám byi râ a nghut. ²³ Haú buinyì má, nungmoq gi, Ngo lé, haí le a dung lo kó râ nghut lhê. Ngò, nungmoq lé teng za taí kôlé, nungmoq gi, Ngá myíng lang luí, Ngá Wâ chyáng haí dung kôle, Yhang byi râ nghut lhê. ²⁴ Ahkuí jé shoq, nungmoq gi, Ngá myíng lé lang luí, haí le a dúng wú shi kó nghut ri. Dung keq, haú hkûn, nungmoq myang hap yù kó râ nghut luí, nungmoq é gabú hkyô gi, byíng jup lò râ nghut lhê.

²⁵ Ngò gi, nungmoq lé, dangtú dông haú pé taí kyo bê nghut lhê; nghut kôlhang, Ngò gi, dangtú a chùng lô e za, haú Íwa eq sêng é hkyô, nungmoq lé san za taí kyô é ahkyíng jé râ nghut lhê. ²⁶ Haú buinyì má, nungmoq gi, Ngá é myíng lé lang luí dung kó râ nghut lhê. Ngò gi, nungmoq é matú, haú Íwâ chyáng dung byi râ nghut taí nyi é a nghut.

27 Hkâsu mù gâ le, nungmoq gi, Ngo lé chyitdap kô é eq, Ngò gi, Íwa Garai Gasâng chyáng mai jé lé é Sû nghut é lé, nungmoq lumjínk kô é yanmai, haû Íwa yhang, nungmoq lé chyitdap é nghut lhê. 28 Ngò gi, haû Íwâ chyáng mai htoq lé mù, mingkan má lé jé wang é nghut lhê; ahkuí, Ngò gi, mingkan mai htoq mù, haû Íwâ chyáng dum taû ló râ nghut lhê." gâ ri.

29 Haú hkûn, Yesuq é chángzô pé gi, "Ahkuí, Nàng gi, dangtú a chùng é dông, san za taí kyô nyi é nghut bê! 30 Nàng gi, lhunglháng lé sê é sù nghut é lé le, Nàng lé, ó yuq èq le dangmyi myi nó a râ é hkyô lé le, ahkuí, ngamoq wó sé bê. Hau é yanmai, Nàng gi, Garai Gasâng chyáng mai lé é sù nghut é lé, ngamoq lumjínk lhê." ga taí bum akô.

31 Haú hkûn, Yesuq tû taí é gi, "Nungmoq, ahkuí lumjínk bekô lhú? 32 Nghut kôlhang, nungmoq gi, lhoq pyo pyâm é hui luí, Ngo lé baú za tô pyâm to kômù, ó le ô yhûm shut ló byuq râ ahkyíng jé lo nyi bê nghut ri; ahkuí lháng jé to bê. Nghut kôlhang, Ngò gi, Ngò baú za a nghut; hkâsu mù gâ le, Ngá Wa gi, Ngò eq rahá nghut nyi lhê.

33 Nungmoq gi, Ngò má nuingón hkyô wó kó sháng gaq nghû, Ngò gi, haú hkyô pé lé taí kyô é nghut lhê. Nungmoq gi, mingkan shí má, wuîhke hkyô hui kó râ nghut lhê; nghut kôlhang, myit wum lhoq kíng keq. Ngò gi, mingkan lé ung pyám bê nghut lhê." gâ ri.

17

Yesuq Kyûdûng É Hkyô

¹ Yesuq gi, haû su ga taî é htâng má, mauhkûng shut tu wú luî, kyûdûng é gi, "Áwa ê, ahkyíng jé bê nghut ri; haû Nung Zo gi, Nang lé hpungwup shingkang wó hu nhâng sháng gaq, Nung Zo lé hpungwup shingkang hû ló nhâng laq ô! ² Hkâsu mù gà le, Nàng mai Yhang lé ap byi tô é bang banshoq lé, Yhang, ahtum abyuq é asak wó byi sháng gaq ga, Nàng gi, byù lhunghâng bang lé up râ ahkáng, Yhang lé byi tô é yanmai nghut ri. ³ Nàng za tengmán é Garai Gasang nghut é eq Nàng nhang kat é sù Yesuq Hkrisduq lé, sê é gi, ahtum abyuq é asak nghut lhê. ⁴ Ngò gi, Nàng, Ngo lé wùn waq nhang é muzó lé lhoq pán é dông, myidàm htoq má, Náng é hpungwup shingkang lé lhoq htoq shit bê nghut lhê. ⁵ Áwa ê, haû mingkan lháng a joq shî mai, Ngò, Nàng eq rahá chôm wó é hpungwup shingkang èq, ahkuî, Náng é myoq hí má, Ngo lé hpungwup shingkang dan hu nhâng laq.

Chángzô pé matú, Yesuq kyûdung byi é hkyô

⁶ Mingkan mai, Nàng, Ngo lé hkyin htoq yû byi é bang lé, Ngò gi, Náng é myìng lhoq htoq shit bê nghut lhê. Yhangmoq gi, Náng é byu pé nghut bekô; Nàng gi, yhangmoq lé, Ngá é loq má ap byi bê nghut luî, yhangmoq gi, Náng é dang lé châng kut bekô nghut ri. ⁷ Nàng, Ngo lé byi é lhungháng gi, Náng chyáng mâ é nghut é lé, ahkuî, yhangmoq sé bekô nghut ri. ⁸ Hkâsu mù gà le, Nàng, Ngo lé byi kat é mungdang pé lé, Ngò, yhangmoq lé byi bê nghut luî, yhangmoq gi, haú pé lé hap yû bekô nghut ri; Ngò gi, Náng chyáng mai lé é sù nghut é lé le, yhangmoq hkyak sê akô; Nàng, Ngo lé nhang

kat é hkyô lé le, yhangmoq lumjínq bekô nghut ri. ⁹ Ngò gi, yhangmoq é matú kyúdung byi lhê. Ngò gi, haú mingkan byu pé é matú dung byi nyi é a nghut; Nàng, Ngo lé ap byi tô é bâng é matú sheq dung byi nyi é ru nghut lhê; hkâsu mù gâ le, yhangmoq gi, Náng é byu pé nghut akô. ¹⁰ Ngò wó é lhunglháng gi, Náng é chyat nghut mù, Nàng wó é lhunglháng le, Ngá é chyat nghut lhê. Haú mù, Ngò gi, yhangmoq má hpungwup shingkang hû é hui bê nghut lhê. ¹¹ Ngò gi, Nàng chyáng lò râ nghut lhê mù, mingkan htoq má nyi nyi râ a nghut lo; nghut kôlháng, yhangmoq gi, mingkan htoq má nyi nyi shirâ nghut lhê; chyoiyúng é Áwa ê! Ngá hpe gi, ragùng za nghut é su, yhangmoq le ragùng za wó dut nyi kó sháng gaq, Nàng, Ngo lé byi é, haú Náng mying é a-tsam eq yhangmoq lé upzúng nyi aq. ¹² Ngò gi, yhangmoq eq rahá nghut nyi é u lé, yhangmoq lé upzúng bê nghut luí, Nàng, Ngo lé byi é mying hau eq, yhangmoq lé rago zúng bê nghut lhê. Haú Chyúmdang lhoq dik sháng gaq ga, haú bang mâ é htên byoq hui râ sù mai lai luí, ó yuq le a byuq byuq é nghut lhê.

¹³ Ngò gi, ahkuí, Náng chyáng lò râ nghut bê; nghut kôlháng, Ngá é gabú hkyô gi, yhangmoq chyáng bying jup sháng gaq nghû, Ngò gi, haú pé lé mingkan má tai é nghut lhê. ¹⁴ Ngò gi, yhangmoq lé, Náng é mungdang byi bê nghut lhê; haú mingkan gi, yhangmoq lé a jú nghut ri; hkâsu mù gâ le, Ngò gi, mingkan mâ é a nghut é su, yhangmoq le, mingkan mâ é a nghut kô é yanmai nghut ri. ¹⁵ Ngò kyúdûng é gi, Nàng, yhangmoq lé mingkan mai shuí htoq yû râ matú dúng é a

nghut, haû agè ashop su chyáng mai, yhangmoq lé upzúng yû râ matú sheq dúng é ru nghut lhê. ¹⁶ Ngò gi, mingkan mâ é a nghut é su, yhangmoq le, mingkan mâ é a nghut kó. ¹⁷ Yhangmoq lé, haû tengmán hkyo èq lhoq sân-yúng yû laq; Náng é mungdang gi, tengmán hkyô nghut ri. ¹⁸ Nàng, Ngo lé, mingkan má nhang hâng kat é su, Ngò le, yhangmoq lé, mingkan má nhang hâng kat é nghut lhê. ¹⁹ Yhangmoq lé, tengmán hkyô má wó lhoq sân-yúng yû kó sháng gaq nghû, Ngò gi, yhangmoq é matú, yhumsing gùng lé lhoq sân-yúng yu é nghut lhê.

Lumjínq Bang Lhunglhâng É Matú, Yesuq Kyûdung Byî É Hkyô

²⁰ Ngò gi, yhangmoq é matú baú za kyûdung byî é a nghut; Yhangmoq é danglu é yanmai, Ngo lé lumjínq kó râ bâng é matú le, Ngò kyûdung byî é nghut lhê. ²¹ Haû mù, yhangmoq banshoq bang gi, rading ralhum za dut nyi kó sháng gaq. Haû mingkan gi, Nàng, Ngo lé nhang kat é hkyô lé wó lumjínq sháng gaq; Áwa, Nàng gi, Ngò má nyi nyi mù, Ngò gi, Nàng má nyi nyi é su, yhangmoq le, ngá hpe má nyi nyi kó sháng gaq. ²² Ngá hpe gi, ragùng za nghut é su, yhangmoq le, rading ralhum za dut nyi kó sháng gaq nghû, Ngò gi, Nàng, Ngo lé byî é hpungwup shíngkang lé, yhangmoq lé byi bê nghut lhê. ²³ Nàng, Ngo lé nhang kat bê hkyô eq Nàng, Ngo lé chyitdap é su, yhangmoq lé chyitdap é hkyô lé, haû mingkan wó sé râ matú, yhangmoq gi, gumjup shoq rading ralhum za wó dut kó sháng gaq nghû, Ngò gi, yhangmoq má nyi nyi luî, Nàng gi, Ngò má nyi nyi é nghut lhê.

²⁴ Âwa ê, haû mingkan lhang a joq shi mai, Nang, Ngo lé chytidap luî byi tô é hpungwup shingkang haû lé, Nang, Ngo lé byi tô é bang, wó myàng kó râ matú le, Ngò nyi é jang má, Ngò eq rahá wó nyi kó râ matú le, Ngò ô nau ri.

²⁵ Dingmán é Âwa ê, haû mingkan gi, Nang lé a sé kôlhang, Ngò gi, Nang lé sê lhê; Nang, Ngo lé nhang kat é hkyô lé gi, yhangmoq sé akô nghut ri. ²⁶ Nang, Ngo lé chytidap é chytidap myit gi, yhangmoq má wó joq nyi râ matú le, Ngò gi, yhangmoq má wó nyi nyi râ matú le, yhangmoq lé, Ngò, Nang é hkyô sé nhâng bê nghut luî, xoq mù sé nhang nyi shirá nghut lhê." gâ ri.

18

Yesuq Chyup Yû Huî É Hkyô

Mht 26:47-56; Mrk 14:43-50; Luk 22:47-53

¹ Yesuq gi, haû su ga kyûdûng é htâng má, Yhâng é chángzô pé eq rahá, Kedron wuìhkung mai lai byit dap ló luî, haû hpoq má joq é hkyâm ralhum má wang e akô nghut ri.

² Hkyâm haû gi, Yesuq eq Yhâng é chángzô pé lhaq hui hui kut é jowò nghut é yanmai, haû Yesuq lé ap pyám râ sù Yudaq le sê ri. ³ Haû mù, Yudaq gi, haû hkyangjong agyi pé eq Hparishe pé chyáng mai nhang kat é noqkuq yhûm zúng bang ra-am eq gyezo rajùm lé, haû jowò shut shuí wang lé lo ri. Haû bang gi, myihu, myibung eq shâm lhâm pé chung lé lo akô.

⁴ Yesuq gi, Yhang má dut lò râ hkyô lhunglhang lé sé gû nghut mù, htoq ê luî, yhangmoq lé, "Nungmoq, ó yuq lé ho akô lhú?" ga myi ri.

⁵ Haú hkûn, yhangmoq gi, "Nazaret wà byù Yesuq lé ho lhê." ga tû taí kôjáng, Yesuq gi, "Ngò gi, haú yuq nghut lhê." ga taí ri. (Yesuq lé ap pyám sú Yudaq le, yhangmoq eq rahá yap tô ri.) ⁶ "Ngò gi, haú yuq nghut lhê." ga Yesuq taí kat é hkûn jáng, yhangmoq gi, nungzut zut mù, myigùng má lêng leq ló bum akô nghut ri.

⁷ Yhang gi, "Nungmoq, ó yuq lé ho akô lhú?" ga, yhangmoq lé dum myí kat jáng, yhangmoq gi, "Nazaret wà byù Yesuq lé ho lhê." ga taí akô.

⁸ Haú hkûn, Yesuq gi, "Ngò gi, haú yuq nghut lhê nghû, nungmoq lé taí kyo bê nghut lhê; nungmoq, Ngo lé hô kô é nghut le gi, shí bang lé ló nhang pyám keq." ga tû taí ri. ⁹ Haú gi, "Nàng, Ngo lé byí tô é bang rayuq le lhang, Ngò, a lhoq hpyuq pyám." ga, Yhang taí tô é dang dik râ matú nghut ri.

¹⁰ Haú hkûn, Simun Petruq gi, shâm wun tô é nghut luí, shâm shê mù, haú hkyangjong mó é dui-nhâng zôshang é loqyo nohkyap lé zân hpyit kat byí ri. (Dui-nhâng zoshâng haú yuq é myìng gi, Malhku gâ ri.)

¹¹ Haú mù, Yesuq gi, Petruq lé, "Nàng é shâm lé, shambyâng má xâng pyám aq! Haú Îwa, Ngo lé byí é góm* lé, Ngò a shuq é wó nyí râ lhú?" ga taí kat ri.

Yesuq Lé, Anna Chyáng Shuî E É Hkyô

Mht 26:57-58; Mrk 14:53-54; Luk 22:54

¹² Hau htâng, gyezo haú jûm eq yhangmoq é gyezau hpó, Yudaq byu pé é mingsuwún wuí gi, Yesuq lé chyup yû mù, tuí akô nghut ri.

¹³ Yhangmoq gi, haú zân má é hkyangjong mó

* **18:11** Góm lé shuq gâ é gi, jamjau hui râ eq shí hkám râ lé, tai nau é nghut lhê.

Kayahpaq é yhâng-tsa Anna chyáng hí, Yhang lé shuí ló akô nghut ri. ¹⁴Kayahpaq gi, byu pé é matú rayuq shî hkám byî le je gè râ nghut lhê ga, haû Yudaq byu pé lé hpaqchyî byî é sù yuq nghut ri.

Yesuq Lé, Petruq Sâng-hi Dam He-ngik Pyâm É Hkyô

Mht 26:69-70; Mrk 14:66-68; Luk 22:55-57

¹⁵ Simun Petruq eq gotû chángzo rayuq gi, Yesuq htâng châng e ló akô nghut ri. Gotû chángzo haû yuq gi, hkyangjong mó lé rago sê lhê nghut mù luî, hkyangjong mó é yhumwàng hkaû shut, Yesuq é htâng má châng wang ló ri. ¹⁶ Petruq kúm gi, hkúmdong shinggan má lánq yap tô ri. Haû hkyangjong mó lé rago sê é sù, gotû chángzo haû yuq gi, taû htoq ló mù, hkum zúng é myiwe myhí lé tái luî, Petruq lé shuí hâng yu ri.

¹⁷ Haû hkún, haû hkum zúng é myiwe myhí gi, Petruq lé, "Nàng gi, haû yuq é chángzô pé mâ é rayuq a nghut lhú?" ga myi jáng, yhang gi, "Ngò a nghut." ga tû tái ri.

¹⁸ Haû u lé, gyoq é yanmai, dui-nhâng zoshâng wuì eq noqkuq yhûm zúng bang gi, yhangmoq gyoq gâng râ matú myigyê èq mut tô é myihkyóm má, gyoq gang yap nyi bum akô. Petruq le, yhangmoq eq rahá gyoq gang yap tô ri.

Yesuq Lé, Hkyangjong Mó Myî Choq Wú É Hkyô

Mht 26:59-66; Mrk 14:55-64; Luk 22:66-71

¹⁹ Haû u lé, haû hkyangjong mó gi, Yesuq lé, Yhâng é chángzô pé hkyô eq Yhâng mhoqshit é hkyô eq séng luî myî ri.

²⁰ Haú hkûn, Yesuq gi, "Haú mingkan htoq má, Ngò, de de taí bê nghut lhê. Ngò gi, haú Yudaq byu pé banshoq bang chôm zîng é, tarajong pé má le, noqkuq yhûm má le, ayang mhoqshit é nghut lhê. Ngò gi, haq zaú luí taí é hkyô haí le a joq. ²¹ Nang, haí mù Ngo lé myi lhê lhú? Haú, Ngò taí é lé wó gyô é bang lé myi aq; Ngò haí taí é hkyô lé, yhangmoq gè gè sê akò nghut ri." ga tû taí ri.

²² Yesuq haú su ga taí jáng, haú nàm má nyi tô é noqkuq yhûm zúng sù rayuq gi, Yhang lé pyuq kat luí, "Hkyangjong mó lé wá, Nang, haú su nghú dang tû lhê lhú?" ga taí ri.

²³ Haú hkûn, Yesuq gi, "Ngò taí shut é nghut le gi, shut é hkyô lé saksé tûn shit aq. Nghut kôhang, Ngò gi, têng é dông ru taí le nhîng, nang, haí mù Ngo lé pyuq lhê lhú?" ga tû taí ri. ²⁴ Hau htâng, Anna gi, Yhang lé tû to gù, haú hkyangjong mó Kayahpaq chyáng dé kat nhang ri.

*Yesuq Lé, Petruq Xoq He-ngik Pyâm É Hkyô
Mht 26:71-75; Mrk 14:69-72; Luk 22:58-62*

²⁵ Haú Simun Petruq gyoq gang yap tô é hkûn, "Nang gi, Yhâng é chángzô pé mâ é rayuq a nghut lhú?" ga, yhang lé myi kôjáng, yhang gi, "Ngò a nghut." ga, dum he pyâm ri.

²⁶ Haú Petruq eq nohkyap zân hpyit pyám byí é huí su é buinùm nghut é sù, haú hkyangjong mó é dui-nhâng zoshâng rayuq gi, yhang lé, "Haú hkyâm má, nang, Yhang eq rahá nghut nyi é lé, ngò a myang é su ngam lhê lhú?" ga taí ri. ²⁷ Haú hkûn, Petruq gi, xoq he pyám ri; haú u yhang, woq tûn bê nghut ri.

Pilat É Myoq Hí Má, Yesuq Jé Nyi É Hkun Lhé Hkyô

Mht 27:1-2, 11-14; Mrk 15:1-5; Luk 23:1-5

²⁸ Hau htâng, yhangmoq gi, Yesuq lé, Kayahpaq chyáng mai, haû mauzau hpô é yhûmwàng shut shuí e ló akô. Haú u gi, napsûn noq ashî nghut ri. Yhangmoq gi, agot a-û a dut e za, htûngli dông Lhoqlhai Poî lé wó zo râ matú, yhúmhkaû má a wàng kó nghut ri. ²⁹ Haû mù luí, mauzau Pilat gi, yhangmoq chyáng htoq ê mù, "Shí yuq lé, nungmoq hai mara hûn nau akô l hú?" ga myî ri.

³⁰ Haú hkûn, yhangmoq gi, "Shí yuq, a ge é muzó kut é a nghut le gi, Yhang lé, náng é loq má ngamoq lé ap byî râ a nghut." ga tû taí akô.

³¹ Pilat gi, "Yhang lé, nungmoq yhang shuí ló mù, nungmoq é tarâ dông ló jéyáng keq." ga taí jáng, haû Yudaq byu pé gi, "Nghut kôlhang, ngamoq gi, ó yuq lé sat râ ahkáng le a wó é nghut lê." ga tû taí akô nghut ri. ³² Haû su dut é hkyô gi, Yesuq, Yhang hká dông shî râ ga taí é dang lé lhoq dik râ matú nghut lê.

³³ Haû mù, Pilat gi, yhúmhkaû má taû wang ló mù, Yesuq lé wut yû luí, "Nàng gi, Yudaq byu pé é hkohkâm nghut lê l hú?" ga myî ri.

³⁴ Haú hkûn, Yesuq gi, "Haû gi, náng é myit dông taí é nghut lê l hú? A nghut jáng, góbang mai, nang lé, Ngá é hkyô taí kyo luí nghut lê l hú?" ga taû myî ri.

³⁵ Pilat gi, "Ngò gi, Yudaq byû nghut lê l hú? Haû Náng é byû myû eq Náng é hkyangjong agyi pé sheq, Nang lé, ngá loq má ap byî é ru nghut lê. Nàng gi, haí kut é nghut lê l hú?" ga dum myî ri.

36 Haú hkûn, Yesuq gi, "Ngá é mingdán gi, mingkan shî eq a sêng. Mingkan shî eq sêng é ru nghut le gi, haú Yudaq byu pé, Ngo lé a wó chyup yu lo shoq, Ngá é dui-nhâng zoshâng wuì, Ngo lé chôm hung yù kó râ nghut lhê. Nghut kôlhang, Ngá é mingdán gi, mingkan shî eq a sêng é ru nghut lhê." ga taî ri.

37 Haú mù, Pilat gi, "Haú jáng, Nàng gi, hkohkâm nghut bê lú?" ga myi jáng, Yesuq gi, "Ngo lé, hkohkâm nghut lhê ga, nàng taî nyi é jô ri. Gè gè ga jáng, Ngò gi, hau é yanmai hku lé lo é sù nghut lhê; haú tengmán hkyô lé saksé hkám râ matú, Ngò, mingkan htoq má jé lé é nghut lhê. Haú tengmán hkyô eq sêng é sù ó yuq le, Ngá é dang lé gyô ri." ga tû taî ri.

38 Haú hkûn, Pilat gi, "Tengmán hkyô gâ é gi, haí jung lú?" ga myi ri. Yhang gi, haú su ga myi luî, haú Yudaq byu pé chyáng dum htoq ê mù, "Shí yuq chyáng mara hûn râ hkyô, ngò a myàng nghut ri.

39 Nghut kôlhang, haú Lhoqlhai Poî u lé, nungmoq é matú, ngò, htóng byû rayuq nhang htoq kat byi byi kut é htûng, nungmoq wó akô. Haú mù, 'Yudaq byu pé é hkohkâm' lé, nhang htoq kat byi râ lé, nungmoq ô nau akô lú?" ga myi ri.

40 Haú hkûn, yhangmoq gi, "Haú yuq lé a nghut! Barabaq lé sheq nhâng byi aq." ga, garû kat akô. Barabaq gi, damyaq nghut ri.

19

Yesuq Lé, Tapzîng Má Jén Sat Râ Matú Doqdân É Hkyô

Mht 27:15-31; Mrk 15:6-20; Luk 23:13-25

¹ Haû mù luî, Yesuq lé lâng she yù mù, nhuq bat râ matú, Pilat hkunmó hkyô ri. ² Haû gyezô pé gi, zujanmaú saî yù kôluî, Yesuq é ulhum má tsung byi kômù, Yhang lé, buhîng nè hut byî akô nghut ri. ³ Hau htâng, yhangmoq gi, Yhâng chyáng dum huî ê ê kut luî, "Yudaq byu pê é hkohkâm ê! Chyung hîng xê hîng nyî sháng gaq ô!" ga taí kômù, Yhâng é myoqdong má pyuq byî akô nghut ri.

⁴ Pilat gi, haû Yudaq byu pê chyáng radàm dum htoq ê mù, "Wú keq, shí yuq chyáng mara hún râ hkyô, ngò a myang é lé nungmoq sé sháng nghû, Yhang lé, ngò nungmoq chyáng shuî htoq lé byî lhê." ga taí ri. ⁵ Yesuq gi, haû zumuq tsûng tô é eq bu nè hîng wut to mù htoq lé jáng, Pilat gi, yhangmoq lé, "Wú keq, Yhang, shí yuq nghut lhê." ga taí ri.

⁶ Haû hkyangjong agyi pé eq yhangmoq é no-
qkuq yhûm zúng bang gi, Yhang lé myang kat kôjáng, "Yhang lé tapzîng má jén sat pyám aq! Yhang lé tapzîng má jén sat pyám aq!" ga garû bum akô.

Nghut kôlhang, Pilat gi, "Nungmoq shuî yù mù, tapzîng má jén sat keq. Ngò gi, Yhâng chyáng mara hún râ hkyô a myàng." ga tû taí ri.

⁷ Haú hkûn, haû Yudaq byu pé gi, "Ngamoq chyáng tarâ rahkat joq lhê; tarâ haú dông ga jang, Yhang gi, shî gîng bê nghut ri; hkâsu mù gâ le, Yhang gi, Garai Gasâng é Yhangzo haû nghut lhê gâ ri." ga xoq taí akô.

⁸ Pilat gi, dang haû lé wó gyo jáng, je gyô gyuq luî, ⁹ yhúmhaû shut dum wang ló mù, Yesuq lé, "Nàng, hkâmâ é sù nghut lhê lú?" ga myî ri. Nghut

kôlhang, Yesuq gi, dang rahkun lháng a tû taí byi nghut ri. ¹⁰ Haú hkûn, Pilat gi, "Nàng, ngo lé a tû taí kut lhê lhú? Ngò gi, Nàng lé, wó lhoq lhut kat é eq tapzîng má wó jén sat pyâm é ahkáng wó sù nghut é lé, Nàng a sé lhú?" ga myî ri.

¹¹ Yesuq gi, "Nàng lé, haú ahtoq mai ahkáng byî e za a nghut le gi, nàng, Ngo lé haí kut râ a-tsam le wó râ a nghut. Haú mù luí, Ngo lé, náng é loq má ap byî é sù gi, mara je bo é nghut lhê." ga tû taí ri.

¹² Haú hkûn mai, Pilat gi, Yesuq lé lhoq lhut kat byi nau nyî bê nghut ri. Nghut kôlhang, haú Yudaq byu pé gi, "Nàng, haú yuq lé nhang pyâm é nghut jáng, nàng gi, hkoséng Kehta q é luzúm a nghut lo; yhumsing gùng lé, hkohkâm gâ é sù gi, hkoséng Kehta q eq shai lhûm é sù nghut lhê." ga, ru jâng garû nyî bum akô nghut ri.

¹³ Haú lé wó gyo jáng, Pilat gi, Yesuq lé shuí htoq é mù, Hebre myíng dông Gabahta gâ é Luqgok hkâng myhang to jang nghu é jowò mâ é tarâ jéyáng tanghkuq má zung tô ri. ¹⁴ Haú u gi, Lhoql-hai Poí é matú, Hên Lajâng é Buinyî nyí-káng raxe í hkyíng nghut ri.

Pilat gi, haú Yudaq byu pé lé, "Nungmoq é hkohkâm lé wú keq." ga taí ri.

¹⁵ Nghut kôlhang, yhangmoq gi, "Yhang lé yu pyám aq! Yhang lé yu pyám aq! Yhang lé tapzîng má jén sat pyám aq!" ga garû bum akô.

Haú hkûn, Pilat gi, "Nungmoq é hkohkâm lé wá, ngò, tapzîng má jén sat pyám râ lhú?" ga myi jáng, haú hkyangjong agyi pé gi, "Haú hkoséng Kehta q mai lai luí, gotû hkohkâm ngamoq a wó." ga, tû taí akô nghut ri.

¹⁶ Hau htâng má, Pilat gi, Yesuq lé tapzîng má jén sat pyám râ matú, yhangmoq é loq má ap byî kat bê nghut ri. Haû mù luî, yhangmoq gi, Yesuq lé shuí ló bekô nghut ri.

Tapzîng Má Jén Pyâm É Hkyô

Mht 27:32-44; Mrk 15:21-32; Luk 23:26-43

¹⁷ Yesuq gi, yhumsing é tapzîng lé waq mù, Hebre myíng dông Golgahta gâ é, Ugyap joq é Jowò gâ é jang má htoq jé e ri. ¹⁸ Yhangmoq gi, haú má, Yesuq lé tapzîng htoq má jén tap pyám akô; Yhang eq rahá, gotú í yuq lé le, rahkyam shut rayuq kut jén to kô é nghut luî, Yesuq gi, gyoro má nghut ri.

¹⁹ Pilat le, masat laiká kê yù luî, haû tapzîng htoq má tap tô ri. Haú má gi, "YUDAQ BYU PÊ É HKOHKÂM, NAZARET WÀ BYÛ YESUQ" gâ tô ri. ²⁰ Yesuq lé jén tô é jowò gi, myuq eq chyâng lhûm é htoq agó, haû masat laiká gi, Hebre dông le, Latin dông le, Grik dông le, kê tô é yanmai, haû Yudaq byu pé myo myo gi, masat laiká haû lé nghap bum akô nghut ri. ²¹ Haû Yudaq byu pé é hkyangjong agyi pé gi, Pilat lé, "'Yudaq byu pé é hkohkâm' nghû hkâká, 'Ngò gi, Yudaq byu pé é hkohkâm nghut lhê ga, Yhang taî ri.' nghû luî sheq ká aq." ga taî akô.

²² Haú hkûn, Pilat gi, "Ngò kê é dông, ngò kê to bê nghut lhê." ga tû taî ri.

²³ Haû gyezô pé gi, Yesuq lé tapzîng má jén tap pyâm é htâng má, Yhâng é mebu pé lé yù mù, myí hkyam gàm luî, rayuq rahkyam yu akô; haû ahte bu lé le, gàm râ dâ akô; nghut kôlhang, haû gi, hkyupshi a bo e za, awang mai ahpyo hpyot kut woq tô é nghut ri.

24 Haû mù, yhangmoq gi, "Bu shî lé gi, a lîng cheq e za, ó yuq myang yù ang râ laq, hkyîn shosé she wú sháng." ga, rayuq eq rayuq taí lhum akô.

Haû gi,

"Yhangmoq, Ngá é mebu lé chôm gam yù kó râ; Ngá é ahtê bû é matú, hkyîn shosé shê kó râ nghut lhê."✧

gá é Chyúmdang lé lhoq dik râ matú dut é nghut lhê. Haû mù, gyezô pé gi, haû su kut bekô nghut ri.

25 Haû Yesuq é tapzîng nàm má gi, Yhângnu, Yhângnû é yhanggu byizo eq, Klopa é yhangmyi Mariq eq Magadalaq wà má é Mariq pé, yap tô bum akô. 26 Yesuq gi, Yhang nàm má, Yhang chyitdap é chángzo eq Yhâng nu yap tô é lé myang kat jáng, Yhâng nu lé, "Ânu ê* nung zo lé wú aq." ga taí mù, 27 chángzo haû lé le, "Náng nu lé wú aq." ga taí ri. Haú hkûn mai, chángzo haú yuq gi, Yesuq é yhângnu lé, yhâng é yhûm shut shuí ló bê nghut ri.

Yesuq Soqkâng Byit É Hkyô

Mht 27:45-56; Mrk 15:33-41; Luk 23:44-49

28 Hau htâng, Yesuq gi, ahkuí, muzó bàn bê nghut é lé sé luí, haû Chyúmdang lhoq dik râ matú, "Ngò, wuì shit ri." ga taí ri. 29 Haú má, tsibiyiq wing chyîn rayambú joq tô ri; haû mù, yhangmoq gi, wuìmaù lé tsibiyiq wing chyîn haú má jum yù luí, jàm-yang ahpyo má tuí tap mù, Yhâng é nhutwuí jé shoq yhun byî akô nghut ri. 30 Yesuq gi, tsibiyiq wing chyîn haú lé shuq yû mù, "Mû bàn bê." ga taí ri. Yhang, haû su ga taí eq yhang, ulhum nguq ló mù, kâng byit bê nghut ri.

✧ 19:24 Hkya-on 22:18 * 19:26 Ânu ê, gá é lé, Grik dông gi, "myiwe myhí ê" ga bo tô é nghut lhê.

³¹ Htang nyí gi, ahkyak é Bánno buinyì nghut luí, haú nyí gi, Hên Lajang Buinyì nghut ri. Haú mù, Yudaq byu pé gi, Bánno buinyì má, màng pé lé tapzîng htoq má a joq to nhâng naù kô é yanmai, hkyî pé lé bat hkyuî pyám mù, màng pé lé yù hkyô pyám nhâng râ matú, Pilat chyáng dúng tôngbán akô. ³² Haú mù luí, gyezô pé gi, lé mù, Yesuq eq jén hui su nhik mâ é, rayuq é hkyî lé hí bat hkyuî pyám mù, rayuq é hkyî lé dum bat hkyuî pyám akô nghut ri. ³³ Nghut kôlhang, yhangmoq gi, Yesuq chyáng jé é hkûn, Yhang shi to lánng bê nghut é lé myàng kômù, Yhâng é hkyî lé a bat hkyuî byi kó nghut ri. ³⁴ Nghut kôlhang, gyezo rayuq gi, Yesuq é namcham má lham èq htaú kat byi jáng, radá dâm sui eq wuì yui htoq lo ri. ³⁵ Haú lé myàng é sù gi, saksé hkám byi ri; yhâng saksé hkâm é hkyô gi, tengmán ri. Haú yhang taí kyô é hkyô gi, têng é lé, yhang sé mù, nungmoq le wó lumjîng kó sháng gaq ga, saksé hkám byi é nghut ri. ³⁶ Haú hkyô pé dut é gi, "Yhâng é showuì rahkat lháng a lhoq hkyuî râ nghut lhê." ✧ gâ é Chyúmdang haú lhoq dik râ matú nghut lhê. ³⁷ Chyúmdang gotû ralhum má le, "Yhangmoq èq htau htông é sù lé, yhangmoq tu wú kó râ nghut lhê." ✧ gâ é bo tô ashî nghut ri.

Yesuq Lé, Myhup Yhum É Hkyô

Mht 27:57-61; Mrk 15:42-47; Luk 23:50-56

³⁸ Hau htâng, Yesuq é chángzo dut nyi é Aramahti myuq byû Yosep gi, haú Yudaq byu pé lé gyuq é yanmai, tsik za Pilat chyáng Yesuq é gungsôm lé, lé dúng ri. Pilat èq ahkáng byi kat jáng, yhang gi,

✧ **19:36** Htoq Ló 12:46; Gyung So 9:12; Hkya-on 34:20 ✧ **19:37** Zhk 12:10

gungsôm haû lé, lé yu ló bê nghut ri. ³⁹ Yhang gi, hí hkûn, myín lé, Yesuq lé ê huí é sù, Nikodema eq rahá lé é nghut ri; Nikodema gi, mura eq achyo nyhò tô é namngón jung sum xê jói kô yu lé ri. ⁴⁰ Yhangnhik gi, Yesuq é gungsôm lé yù mù, Yudaq byu pê é màng yhum htûng eq rajung za, namngón jung eq rahá, pán yúng eq htup yup to byî akô. ⁴¹ Haû Yesuq lé tapzîng má jén sat pyâm é jowò nàm má, hkyâm ralhum joq ri; ó yuq lé le a lheq wú shî é, lup sik ralhum hkyâm hkaû má joq tô ri. ⁴² Haú nyí gi, Yudaq byu pê é Hên Lajang Buinyì nghut é yanmai le, lup haû le chyâng é yanmai le, yhangnhik gi, Yesuq lé, haú má ê lheq tô akô nghut ri.

20

Lup Akôm

Mht 28:1-10; Mrk 16:1-8; Luk 24:1-12

¹ Bánno buinyì htâng, napsûn noq le mau a bó shimá, Magadalaq wà mâ é Mariq gi, haû lup má é jé le, lup hkum mâ é luqlong huí hpyuq to lánq é lé myang ri. ² Haû mù, yhang gi, Simun Petruq eq Yesuq chyitdap é chángzo góyuq chyáng din jé ló mù, "Haû Yhumsîng lé, lup mai yu htoq ló byuq bekô; hkâmá ê kat to kô é lé, ngamoq a sé." ga taí ri.

³ Haû mù, Petruq eq chángzo haû gi, lup shut e ló akô. ⁴ Yhangnhik í yuq é din akô; nghut kôhang, chángzo haû gi, Petruq htoq má wô dîn luí, lup má hí din jé e ri. ⁵ Haû mù, yhang gi, ahkaû shut ngóm wú kat é hkûn, haû pán yúng htui leq tô é lé myang ri; nghut kôhang, yhang gi, a wang ê nghut ri. ⁶ Hau htâng, Simun Petruq gi, châng jé luí, lup

hkaû shut wang e ri; haú hkûn, yhang gi, haú má pán yúng htui joq tô é lé le, ⁷ haú Yesuq é ulhum má htup é panchoq lé le, myang ri. Panchoq haú gi, pán yúng htui eq rahá a nghut e za htui jup leq tô ri. ⁸ Haú lup má hí jé é chángzo le, ahkaû má wang ê luí, myàng jáng, lumjúng bê nghut ri. ⁹ (Yesuq gi, shi é mai dum dui toq lô râ nghut lhê ga bo tô é Chyúmdang lé, yhangnhik gi, a sê gyo shi kó nghut ri.) ¹⁰ Hau htâng, haú chángzô nhik gi, yhûm taú ló bekô nghut ri.

Magadalaq Wà Mã É Mariq Lé, Yesuq Htoq Shit É Hkyô

Mrk 16:9-11

¹¹ Nghut kôlhang, Mariq gi, lup shinggan má ngau yap tô ri. Yhang gi, ngaù uchyang lup hkaû má ngóm wú kat ri. ¹² Haú hkûn, yhang gi, Yesuq é gungsôm lheq tô é jang má, hpyu é mebu wut é maumang lagyo í yuq hkyî htâng shut rayuq, umhtúng shut rayuq, zung to kô é lé, myang ri.

¹³ Yhangnhik gi, "Myiwe myhí ê, nàng, haí mù ngau nyi lhê lhú?" ga myi kôjáng, yhang gi, "Ngá é Yhumsîng lé yù ló hpyuq kôluí, Yhang lé hkâmá ló lheq to kô é lé, ngò a sê é yanmai nghut lhê." ga tú taí ri. ¹⁴ Haú su ga luí, yhang, lhing wú kat é hkûn, Yesuq yap tô é lé myàng kôlhang, Yesuq nghut é lé yhang a wú sé nghut ri.

¹⁵ Yesuq gi, "Myiwe myhí ê, nàng, haí mù ngau nyi lhê lhú? Nàng gi, ó yuq lé ho wún lhê lhú?" ga myi jáng, yhang gi, hkyâm saí zo sù su ngam pyâm mù, "Sará ê, nàng, Yhang lé waq htot pyâm é nghut le gi, hkâmá ê lheq tô é, ngo lé taí kyo laq, ngò, Yhang lé yu ló râ." ga taí ri.

16 Haú hkûn, Yesuq gi, yhang lé, "Mariq ê" ga wut kat ri.

Mariq gi, Yhâng shut lhîng mù, Hebre myíng dông, "Raboni!" ga wut kat ri. (Haú gi, "Sarâ ê" gâ é lichyúm nghut ri.)

17 Yesuq gi, "Ngo lé hkâzáng shi; hkâsu mù gâ le, Ngò gi, haú Íwâ chyáng a taú doq ló shî é nghut lhê. Nàng gi, Ngá é gumang wui chyáng ló mù, yhangmoq lé, 'Ngò gi, Ngá Wa eq nungmoq é Yhângwa, Ngá é Garai Gasang eq nungmoq é Garai Gasang nghut su chyáng doq ló zó nghut lhê.' gâ ri nghû, ló taí kyo aq." ga, yhang lé taí kat ri.

18 Magadalaq wà mã é Mariq gi, chángzô pé chyáng ló mù, "Yhumsîng lé, ngò myàng bê!" ga taí luí, yhang lé shit kat é pé lé, taí kyô ri.

*Yesuq, Yhâng É Chángzô Pé Lé Htoq Shit É Hkyô
Mht 28:16-20; Mrk 16:14-18; Luk 24:36-49*

19 Haú nyí, Bánno buinyì htang myìn lé, haú chángzô pé gi, Yudaq byu pé lé gyuq kô é yanmai, hkum tsing myhî pyám mù, zîng tô bum kô é u lé, Yesuq gi, lé jé mù, yhangmoq é agùng má yap to luí, "Nungmoq nguínón yuqyo nyì sháng gaq!" ga taí ri. 20 Yhang gi, haú su ga taí é htâng má, yhangmoq lé, Yhâng é loq pé eq namcham lé tân shit ri. Chángzô pé gi, haú Yhumsîng lé myàng kôjáng, gyai gabú bùm bekô nghut ri.

21 Yesuq gi, "Nungmoq nguínón yuqyo nyì sháng gaq! Haú Íwa gi, Ngo lé nhang kat é su, Ngò gi, ahkuí, nungmoq lé nhang kat é nghut lhê." ga dum taí ri. 22 Haú su ga taí mù, Yhang gi, yhangmoq é ahtoq má soq mut luí, "Haú Chyoiyúng Woi-nyí lé hap yù keq. 23 Ó yuq é mara pé lé nghut

kôle, nungmoq hkyut byî é nghut jáng, mara haú pé gi, hkyut pyám byî é hui râ nghut lhê; nungmoq a hkyut byî é nghut jáng, mara haú pé gi, hkyut pyâm é hui râ a nghut." ga tâi ri.

Htomaq Lé, Yesuq Htoq Shit É Hkyô

²⁴ Haú chángzo raxe í yuq má bo é, Zozûm le gâ é Htomaq gi, Yesuq lé jé é hkûn, haú chángzô pé eq rahá a nyi to nghut ri. ²⁵ Haú mù luî, gotû chángzô pé gi, yhang lé, "Haú Yhumsîng lé, ngamoq myàng bê." ga tâi kyô akô.

Nghut kôlhang, yhang gi, yhangmoq lé, "Ngò gi, Yhâng é loq pé mâ é shamtoq zuhkô lé myàng mù, ngá é loqnyhui èq joí wú é eq, Yhâng é namcham má, ngá é loq èq myang lap wú é za a nghut jáng, haú lé ngò lumjîng râ a nghut." ga tâi ri.

²⁶ Rabat myáng jáng, chángzô pé gi, haú yhúmkaû má dum nyi tô akô; Htomaq le, yhangmoq eq rahá nghut nyi ri. Haú hkum pé myhî to kôlhang, Yesuq gi, lé jé mù, yhangmoq é agùng má yap to luî, "Nungmoq nguîngón yuqyo nyi sháng gaq!" ga tâi ri. ²⁷ Hau htâng, Yhang gi, Htomaq lé, "Náng é loqnyhui, shî má lé joí mù, Ngá é loq pé lé wú aq. Náng é loq lhâm kat mù, Ngá é namcham má lé lap wú aq. A lùm hkâkut, lumjîng nyi aq." ga tâi ri.

²⁸ Haú hkûn, Htomaq gi, "Ngá é Yhumsîng, ngá é Garai Gasang ê!" ga Yhang lé tâi ri.

²⁹ Yesuq gi, yhang lé, "Nàng gi, Ngo lé myang é yanmai, lumjîng é a nghut lhú? A myàng kôlhang, lumjîng é bang gi, hkungsô wó nyi ri." ga tâi ri.

³⁰ Laiká buk shî má a kê tô é limik kumlhá pé gotû myo myo lé le, Yesuq gi, Yhâng é chángzô

pê hí má kut shit bê nghut ri. ³¹ Nghut kôlhang, Yesuq gi, Garai Gasâng é Yhangzo Hkrisduq nghut é lé, nungmoq wó lumjínq râ matú eq, lumjínq é yanmai, nungmoq Yhâng é mying má asak wó kó râ matú, shí hkyô pé lé kê tô é nghut lhê.

21

Ngozo Wó Chyup Yu É Limik Kumlhá

¹ Hau htâng má, Yesuq gi, Tiberi nhông yàm má, Yhâng é chángzô pé lé dum htoq shit ri. Yhang htoq shit é hkyô gi, a-ô mâ é dông nghut ri. ² Simun Petruq, Zozûm le gâ é Htomaq, Galile mau Hkanaq wà mó mâ é Nahtanelaq, Zebedi é yhangzo nhik eq gotû chángzo í yuq pé gi, rahá nyi to bum akô. ³ Haú hkûn, Simun Petruq gi, yhangmoq lé, "Ngò gi, ngozo kóng ê râ." ga taí jáng, yhangmoq gi, "Ngamoq le châng lé râ." ga taí akô. Haú mù luí, yhangmoq gi, htoq ê mù, haú lhai má wàng bekô nghut ri; nghut kôlhang, haú myîn, radu lhang a wó kóng kó nghut ri.

⁴ Htang napkyó maubó lo é hkûn, Yesuq gi, wuyàm má yap tô ri; nghut kôlhang, haú chángzô pé gi, Yesuq nghut é lé a wú sé kó nghut ri.

⁵ Yesuq gi, yhangmoq lé, "Luzúm wui ê, nungmoq, ngozo wó akô lhú?" ga, wut myi kat jáng, yhangmoq gi, "A wó." ga tû taí akô.

⁶ Haú hkûn, Yhang gi, "Nungmoq é gùn lé, haú lhai é loqyo hkyam shut dú hkyô kat keq; haú jáng, nungmoq wó kông yù kó râ nghut lhê." ga taí ri. Haú mù, yhangmoq gi, gùn dú hkyô kat é hkûn, ngozo lûm myô é yanmai, haú gùn lé lhang a wó lhang yù lo kó nghut ri.

⁷ Haû mù luî, haû Yesuq chyitdap é chángzo gi, Petruq lé, "Yhumsîng ru nghut ri." ga taî ri. Simun Petruq gi, "Yhumsîng ru nghut ri." gà é lé wó gyo eq yhang, yhang gi, mebu hkyut pyâm tô é yanmai, buhîng mó lé, yhâng é gùng má baiyup yù mù, wuì hkaû má byam wang ló bê nghut ri. ⁸ Haû chángzo góbang gi, wuiyàm eq ngo xê làm kô za wê é yanmai, ngozo byíng tô é gùn lé, wuiyàm shut lhaî mai she jé lo akô nghut ri. ⁹ Yhangmoq gi, wuiyàm má jé dap ló kô é hkûn, myigye gyúng é myihkyóm htoq má ngozo nyhîn tô é lé le, muk ratsuí joq tô é lé le, myang akô.

¹⁰ Yesuq gi, yhangmoq lé, "Haû, ahkuî za nungmoq wó kông yu é ngozo, ra-am yù lé keq." ga taî ri.

¹¹ Haû mù, Simun Petruq gi, lhaî má doq ji luî, kô é ngozo rasho ngó xe sùm du yhang bo é gùn lé, dùng yàm má she htoq tô ri. Ngozo haû myhó myo kôlhang, gùn gi, a jeq nghut ri. ¹² Yesuq gi, yhangmoq lé, "Napzang lé zo keq." ga taî ri. Chángzô pé gi, Yhang, haû Yhumsîng nghut é lé sé kô é yanmai, ó yuq lháng, "Nàng, ó yuq nghut lhê?" ga, a wám myi kó nghut ri. ¹³ Yesuq gi, lé mù, muk lé ê yù luî, yhangmoq lé byî ri; ngozo lé le, haû su kut ri. ¹⁴ Yesuq gi, shî é mai lhoq dui toq yû huî é htâng, Yhâng é chángzô pé lé htoq shit é má, shî gi, sum dâm nghû râ dâm nghut ri.

Yesuq Eq Petruq

¹⁵ Yhangmoq bàn zô bùm kô é htâng má, Yesuq gi, Simun Petruq lé, "Yohan é yhangzo Simun ê, nàng gi, shí bang htoq má, Ngo lé teng za je chyitdap lhê lhú?" ga myi jáng, yhang gi, "Nghut lhê; Yhumsîng

ê, ngò, Nàng lé chyitdap é hkyô lé, Nàng sê lhê." ga tû taí ri. Haú hkûn, Yesuq gi, "Ngá é sau zô pé lé, baú aq." ga, yhang lé taí ri.

¹⁶ Hau htâng, Yesuq gi, "Yohan é yhangzo Simun ê, nàng gi, Ngo lé teng za chyitdap lhê lú?" ga dum myi jáng, yhang gi, "Nghut lhê; Yhumsîng ê, ngò, Nàng lé chyitdap é hkyô lé, Nàng sê lhê." ga tû taí ri. Haú hkûn, Yesuq gi, "Ngá é sau pé lé, rém aq." ga taí ri.

¹⁷ Dum radàm, Yesuq gi, yhang lé, "Yohan é yhangzo Simun ê, nàng gi, Ngo lé chyit lhê lú?" ga myî ri.

Haú hkûn, Petruq gi, "Nàng gi, ngo lé chyitdap lhê lú?" ga, yhang lé Yesuq èq súm dam dà m taí é yanmai, yhâng myit nò luí, "Yhumsîng ê, Nàng gi, lhunglhang lé sê lhê; ngò, Nàng lé chyitdap é hkyô lé, Nàng sê lhê." ga taí ri.

Haú hkûn, Yesuq gi, "Ngá é sau pé lé, baú aq.
¹⁸ Ngò, nàng lé teng za taí lé, nàng, zorâm nghut é hkûn gi, yhumsîng gùng yhumsîng hpyihit baíyup* yù mù, ê nau é jowò hkangmó má wó ê é nghut lhê; nghut kôlhang, nàng mang jáng gi, loq í loq lham luí, nang lé góyuq èq hpyihit baíyup byi mù, nàng a ê nau é jowò shut shuí ê râ nghut lhê." ga taí ri. ¹⁹ (Yesuq haú su ga taí é gi, haú Petruq, hkâsu kut shi é dông mai, Garai Gasâng é hpungwup shing kang lé dan hu nhâng râ nghut é lé, taí nau é nghut ri.) Hau htâng, Yesuq gi, yhang lé, "Ngá htâng cháng aq." ga taí ri.

* **21:18** Hpyihit baíyup gá é lichyúm gi, mebu wut luí ri ri kut tô é lé gâ lhê.

²⁰ Haú hkûn, Petruq gi, lêng wú kat le, haú Yesuq chyitdap é chángzo, yhangmoq htâng châng wún é lé myàng ri. Chángzo haú gi, hí hkûn, myinzang zô é u lé, Yesuq chyáng leq ngè mù, "Yhumsîng ê, Nang lé ap pyám râ sù gi, ó yuq lú?" ga, myi wú é sù nghut ri. ²¹ Petruq gi, haú yuq lé myàng jáng, Yesuq lé, "Yhumsîng ê, shí yuq gi, hkâsu dut râ lú?" ga myi ri.

²² Yesuq gi, "Ngò jé lé é hkûn jé shoq, Ngò, yhang lé dui nyi nhâng nau é nghut le gi, nàng eq haí sêng lê lú? Nàng gi, Ngá htâng cháng aq." ga tû taí ri.

²³ Dang hau é yanmai, chángzo haú yuq a shî râ nghut lê gâ é danglám gi, haú gumang wui chyáng byo myín to bê nghut ri. Nghut kôlhang, Yesuq gi, haú yuq a shî râ hkyô lé taí é a nghut, "Ngò jé lé é hkûn jé shoq, Ngò, yhang lé dui nyi nhâng nau é nghut le gi, nàng eq haí sêng lê lú?" ga, taí é ru nghut lê.

²⁴ Shí pé lé saksé hkám mù, shí pé lé kê tô é sù gi, chángzo haú yuq nghut lê. Yhâng é saksé gi, têng é lé, ngamoq sê lê.

²⁵ Yesuq gi, gotû muzó myo myo le kut ashî nghut ri. Muzó haú pé lhum jup lé, kê htoq yu é ru nghut le gi, kê tô é laiká buk haú pé gi, mingkan gón má lhang ngo râ a nghut nghû, ngò wó myit ri.

Chyoiyúng chyumlaiká: dangshikaq asik; Zaiwa

New Testament in Zaiwa

copyright © 2009 Wycliffe Bible Translators, Inc.

Language: Zaiwa

Translation by: Wycliffe Bible Translators, Inc.

Copyright Information

© 2009, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

Printed book ISBN 9781921445408

The New Testament

in Zaiwa

© 2009, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses,

cvi

please contact the respective copyright owners.

2014-04-30

PDF generated using Haiola and XeLaTeX on 11 Nov 2022 from source files
dated 29 Jan 2022

23f9fc55-a8a4-59ef-9513-707ec336b0ee